

**NATIONAL ASSEMBLY OF
SEYCHELLES**

*Wednesday 20th October,
2021*

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. E bonzour nou piblik a lekout pe swiv nou, nou a repran travay ozordi avek *Unemployment Relief Scheme (Repeal) Bill* e pour sa nou ava apel Minis avek son delegasyon silvouple. Madanm Raporter?

Bonzour e byenveni Minis Patricia Francourt. Minis pou Lanplwa e *Social Affairs* e byenveni osi egalman bann Zofisye Mr Jules Baker PS pou Lanplwa, Mrs Letimee Dookley Direkter Zeneral pour Promosyon Lanplwa e Mr Adam Furneau Assistant Legal Draftsperson AG's Office.

I en plezir pou annan ou avek zot avek nou. Avan nou komanse lo *Bill* Minis in ti a kontan pas, profit lokazyon pou pas en pti mesaz lo *breast cancer*.

E mon konnen poudir i en size ki Minis in enplike bokou avan dan son

partisipasyon dan *Cancer Concern*. Alor i ava en plezir pou akord Minis sa de minit pou li fer sa mesaz. Minis.

**MINISTER PATRICIA
FRANCOURT**

Mersi Mr Speaker. Bonzour tou Manm Onorab. Bonzour tou dimoun a lekout. Mersi Mr Speaker pou donn mwan sa loportinite pou dir de pri parol, a lokazyon *Breast Cancer Day* ki ti yer.

Mr Speaker madanm otour lemonn osi byen ki isi Sesel, pe kontinyen anmenn sa gro batay e fer fas ek sa maladi kanser tete. Sa kondisyon i reste premye lakoz pou fatalite dan tou kanser k asosye avek madanm, me i pa devret leka si i ganny detekte byen boner.

Se pour sa rezon ki nou bezwen sakenn de nou, pe regilyerman fer nou egzaminasyon tete e osi tan ki i posib fer nou tes *mammogram*.

Isi Sesel madanm pe vreman sirviv sa kondisyon e repran zot lavi normal. Se sa ki nou aspire vwar e ki nou kontinyen akonplir dan le fitir.

Pour tou madanm ki pe fer fas avek sa kondisyon oubyen ki lo semen gerizon, mazin en kot ou ti komanse. Mon tir mon sapo a Onorab Deshiela Bastienne ki avek bokou kouraz ti partaz son

leksperyans yer pandan sesyon Lasanble e Lokazyon Lazournen Kanser Tete. Kontinyen gard sa lespwar e reste touzour for. A sa moman sipor fanmir ek zanmi i primordyal. Avek lagras Bondye tou i posib.

Mon ve se ki tou madanm ki pas atraver sa kondisyon e ki'n reisi sirviv pou zwenn avek lezot ki pe pas atraver sa menn defi, partaz ou leksperyans pour ki zot a kapab kontinyen annan lespwar e reste for dan zot prop parkour. Mon swet tou bon kouraz a tous. Mersi Mr Speaker.

MR SPEAKER

Mersi Minis. Nou ava komans lo *Bill*. E mon ava envit Leader Biznes Gouvernman pou prezant Mosyon pou *Second Reading*.

HON BERNARD GEORGES

Mersi Mr Speaker. Bonzour Mr Speaker. Bonzour Minis ou delegasyon. Bonzour tou bann koleg Onorab e tou dimoun ki pe swiv nou dan lakour.

Mr Speaker anba *Order* 69(2) nou *Standing Orders* mon *move* ki *The Unemployment Relief Scheme (Repeal) Bill*, 2021 i ganny lir en Dezyenm Fwa. Mersi.

MR SPEAKER

Mersi *LGB*. Mon a ganny en segonnman pou Mosyon. Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour Minis avek ou delegasyon, tou Manm prezan e tou dimoun a lekout. Mr Speaker mon ti a kontan segonn Mosyon anmennen par Onorab Georges. Mersi.

MR SPEAKER

Mersi. Nou a envit Minis pou fer prezantasyon *Bill*.

MINISTER PATRICIA FRANCOURT

Mersi Mr Speaker. Mr Speaker permet mwan pou adres Lasanble pou eksplik rezondet aköz ki mon pe vin prezant sa Prozedlwa, pou aboli oubyen *repeal Unemployment Relief Scheme Act, 1995*, mye koni koman *URS*.

Mr Speaker *URS* ti ganny entrodwir an 1995 avek bi pou asiste bann endividi ki ti lo *welfare* e osi sa ki pa ti pe kapab pran en lanplwa kontinyel, an vi zot bann defi sosyal. Olye depan lo lasistans *welfare*, zot ti ganny klase dan en lanplwa tanporer ouswa demi zournen - *full day*, ouswa demi zournen - *half day*, oubyen lo baz *part-time*, pou gard zot prodiktiv ziska ler zot reisi trouv en lanplwa formel e a plen tan.

Bann partisipan ti ganny plase dan bann lorganizasyon gouvènmantal e prive pou en peryod 6 a 12 mwan, e zot ti ganny peye lo lakantite zour e erdtan i zot ti travay.

Pandan program reform makro ekonomik an 2008, ti ganny vwar ki sa program ti nepli soutenab e Gouvènmant ti deside pou pran mezir pou gradyelman ferm sa *Scheme*, o fir an mezir ki partisipan ti konplet zot letan.

An Novanm 2017 Gouvènmant ti reentrodwir *URS*, pou fer revizyon pou asiste bann dimoun ki ti pe ganny difikilte pou ganny en lanplwa a plantan e ti pe depan lo *welfare*.

URS ti pe al met sa bann endividi tel ki bann *ex-prizonnyen* bann dimoun ki ti pe swiv tretman pou zot adiksyon drog e lalkol; bann ki ti pe viv avek en dezabilite e osi bann ki'n reste san en lanplwa pou bokou letan, pour ki zot osi zot kapab zwenn marse lanplwa e fer kontribisyon dan lekonomi pei.

Zisteman bi sa re lentrodiksyon ti pou promot sa prensip an en responsabilite partaze, kot olye ki zot kontinyelman depan lo *welfare*, zot ti ganny en loportinite pou travay e osi ganny *on the job training* baze lo zot kondisyon sosyal e fizik.

An Zilyet 2020 an vi sityasyon *COVID-19 scope URS* ti agrandi, pou osi asiste bann ki ti'n perdi zot lanplwa - sirtou bann *self-employed* ki pa ti pe ganny kouver anba *SETS*. En total 8860 endividi ti anrezistre lo sa *Scheme* depi Desanm 2018 ziska Fevriye 2021.

Pandan letan ki en partisipan ti lo sa program, i ti son responsabilite pou li retrouv en lanplwa formel. Departman Lanplwa ti asiste bann i ti rankontre difikilte. Dan sa kantite ki ti anrezistre nou ti reisi plas 2440 ki zot *skills* ti an demann dan en lanplwa formel e zot pa ti bezwen antre lo program.

Mr Speaker an Fevriye 2021 avek nesesite pou reform lekonomi pi an vi *COVID-19*, Program *URS* ti terminen. Rezondet pou en tel desizyon se ki avek sityasyon ekonomik ki pei pe pas atraver, sa program pa finansyerman soutenab.

Deplis anba sa *Scheme* sa *allowance* R7056 ki sa bann partisipan ti pe resevwar ti ganny *exempt* lo kontribisyon *personal income tax* ek pansyon. Sa i fer ki sa bann partisipan pa ti pe kontribye anver *tax* ek Fon Pansyon pou zot prop benefis a lonterm.

A sa pwen ler program ti terminen pei ti'n rekonmans

vwar en amelyorasyon pozitiv kot marse lanplwa i konsernen. Atraver lakantite *job vacancies* ki ti pe ganny anrezistre atraver *job adverts*, ouswa laplikasyon pou *recruit* travayer etranze, i ti ganny vwar ki i posib ki sak sa bann endividi i reisi antre dan an lanplwa formel.

Mr Speaker pou note ki an preparasyon pou sa terminasyon ki ti pe predir byen boner Desanm 2020, Departman Lanplwa ti'n entansifye zefor pou ed bann partisipan pou ganny en lanplwa. Deplis ki sa, Gouvernman pa ti zis termin sa Program *URS*, me i ti met lezot stratezi an plas pou asiste sa bann dimoun.

Premyerman nou ti temwannou louvertir en nouvo lofis kot *Ocean Gate House*, kot bann *job seekers* sirtou bann ki ti lo *URS* ek *SETS* ti ganny ankouraze pou vin anrezistre pou en lanplwa. Sa kanpanny ti ale pou mwan Mars antye e ganny bokou piblisite lo medya.

Pou note dan sa 1095 *job seekers* ki ti anrezistre dan peryod mwan Mars selman 399 ki ti *ex-URS*. Avek led Minister Finans nou i osi ganny Bidze ekstra, pou kapab anploy plis travayer pou travay ek sa lakantite *job seekers* ki ti'n ogmante.

Departman in osi travay an kolaborasyon avek bann *employer* pou *advertise* zot bann *post* avek nou, pou asire ki tou *job seekers* i ganny ase avek loportinite lanplwa ki i annan.

Sa bann *vacancies* i osi ganny partaze avek tou nou bann *partners*, enkli nou bann Manm Lasanble Nasyonal pour ki koman en sel lekip nou kapab ankouraz bann dimoun pou *apply* bann diferan louvraz ki a zot laporte.

Stratezi pli signifikan se agrandisman *Program Skills Development* pou anmenn li ziska laz 60an, pour ki bann *job seekers* ki ti lo *URS* e lezot ki'n perdi zot lanplwa avek *COVID-19*, zot kapab ganny *reskilled*.

Sa program i annan bi pour donn plis formasyon ou *job seekers* ki enterese e ki'n anrezistre kot Departman Lanplwa.

Apre ki tou formalite ti'n ganny konplete kot *Procurement Oversight Unit Program Reskilling* ti ganny lanse an Zilyet sa lannen. Pour le moman nou pe ofer *training* dan plizyer sekter sirtou bann ki an demann.

Departman Lanplwa in ofer 13 diferan *training courses* dan diferan sekter tel ki *tourism*, *domestic care*, sekirite, administrasyon zis pour nonm enn de.

Nou'n fini *train* 63 dimoun dan 125 ki'n anrezistre pou ganny *training* e formasyon pe kontinyen. Nou lentansyon se ki firanmezir ki zot ganny formasyon, sa bann dimoun a kapab fasilman antre dan en lanplwa oubyen menm fer zot prop biznes.

Mr Speaker depi Mars ziska le 15 Oktob 2021, in annan 2214 *job seekers* ki'n anrezistre;- ladan 1008 ki'n ganny en lanplwa. I reste selman 925 *job seekers* ki nou ankor pe asiste atraver bann *referral, interviews, job counselling*.

I osi annan bann *repeated cases* ki fer ki nou bezwen *re-register* e aziste zot ankor. Nou'n fer plizyer *referral* me malerezman serten zot pa'n al *attend interview*, oubyen zot *decline post* oubyen menm komans travay me apre detrwa zour zot kite.

Mr Speaker malgre sa, foudre fer resorti ki sa legzersis anrezistremman bann *job seekers* in enn ki'n aport bokou sikse. Akoz in fasilite plasman an konsiderasyon bann *skills* e kalifikasyon ki en dimoun i annan, baze lo loportinite lanplwa ki ganny *advertise*.

Depi Zanvye ziska 15 Oktob, Departman Lanplwa in rikord 4527 *vacancies*. Sa i vedir ki loportinite lanplwa i

annan, e mon pe demann avek *job seekers* pou reste angaze dan zot demars e pran loportinite lanplwa ki annan an se moman.

Montre zot komitman pou reste e devlop en karyer dan domenn ki an demann. Foudre ki zot vin pli rezilyan e determinen pou asire zot lavenir e osi lavenir zot zanfann.

Mr Speaker ankor pou reasir sa Lasanble, ki posibilite pou tou dimoun enkli bann ki ti lo *URS* ki pe rod en lanplwa e ki disponib, pou zwenn lemonn travay i la.

Minister pou kontinyen met tou zefor posib avek korperasyon tou ki konsernen, enkli anplwayer pou gard *unemployment rate* pli ba posib. En sityasyon ki nou kapab mentenir e fer bon sikse sorti 2.3poursan par Desann 2019, pou ariv 4.8poursan milye lannen 2020 e desann 3.3poursan lafen lannen 2020.

Avek sa de mo mon prezant avek Lasanble sa *Bill* ki pe demann ki *URS Act 1995* i ganny *repeal* pou zot konsiderasyon e aprouvasyon. Mersi Mr Speaker.

MR SPEAKER

Mersi Minis. Avek sa nou a komans deba lo *Bill*. Tenir lanmen en pti moman silvouple. Mersi, kapab poz lanmen aköz mon pou pas lo

lalis pou mon verifye, fer sir ki komans lo sa kote.

Mon annan Onorab Georges, Henrie, Naidu, Zialor, Andre, Loizeau, Romain, Loze, Sophola, Uranie, Cosgrow, Vidot, Aglae. Eski mon'n mank okenn dimoun? Vidot mon'n dir, Onorab Gabriel, Onorab Gill, Onorab Lemiel, *ok*. Onorab Pillay, wi e Onorab William e Onorab Woodcock. Byen.

An vi la kantite Manm ki oule entervenir, mon pou pran opsyon ki *Standing Orders* i *afford* mwan pou met en limit 10 minit pou bann *speech*. Me selman les mon a dir, mon pa kontan enteronp bann Manm ler zot pe koze, alor silvouple disiplin zot lekor e regard zot lekor zot menm.

Mon pou sey pa enteronp zot ziska ler zot in ariv 12minit pou dir zot ki zot *overtime*. Fotespere nou a kapab fer sa mars byen.

Byen, mon pa'n toutafe sezi lord lekel ki'n lev lanmen premye eksepte enn de ki mon'n war, so mon pou zis melanz le de kote. E nou a bezwen zis pran enn isi e enn lot kote e les mon a komans avek Onorab Andre.

HON CLIFFORD ANDRE

Mersi Mr Speaker. Bonzour Minis avek ou delegasyon. Bonzour Manm Onorab.

Mr Speaker sa *Bill* ki devan nou parey nou'n ganny dir pe ganny demande pou *repeal The Unemployment Relief Scheme*. Mr Speaker in annan bokou komanter. Mwan mon enn bann dimoun ki ti vin dan sa Lasanble e dir poudir i annan labi par sekter prive an referans avek *Unemployment Relief Scheme*.

I annan biznes ki ti pe *operate* e si ou annan en kontra ou pe fer larzan, i otomatikman pa nesese ki ou al anba striktir ki Program *URS* ti pe fer provizyon e ki Gouvernman *taxpayers money* pe pey travayer ki pe travay ek ou le ou annan en kontra.

Definitivman ou bezwen kapab pey dimoun anba en kontra prive ki ou'n gannyen.

Me Mr Speaker an dizan sa in annan bokou bann zenn ki'n vin kot mwan, bann ki ti pe travay ek Minister Lasante, bann ki ti pe travay ek Minister Lanvironnman.

E zot ti'n etabli zot dan sa pozisyon ki zot ti pe travay ladan, e letan nou'n vwar ki sa *Scheme* in annan serten modifikasyon, serten rektifikasyon, serten *stop* ki'n ganny fer avek sa *Scheme*, sa bann manrmay in war zot dan serten difikilte.

E i annan ziska ozordi Minis mon pou dir ki ankor dan difikilte. Mon annan mon detrwa zenn manman, nou

konnen nou pei e lemonn antye i annan bokou zenn manman.

E zot annan zot zanfan zot ti pe travay anba sa *Scheme*, e ozordi zot war zot an deor travay, akòz Minister in dir napa finans pou kontinyen soutenir zot dan sa lanplwa ki zot ti annan.

E Minis sa i sagrin mwan dan en sans, menm si in annan, ou'n dir ki i annan lofis ki'n ouver *Ocean Gate House* pou zot anrezistre.

E mon ti a'n prefere ki Gouvernman - vi ki nou konnen lekel ki ti lo *URS*, nou ti otomatikman transfer sa bann non anba sa lofis, ki zot ti ava ganny anrezistre otomatikman, epi pran kontak ek zot. Akòz par ler mon santi ki nou permet bann zenn fer letour.

Mon'n menm pran kontak ek *PS Baker* a plizyer repriz pou met serten sa bann sityasyon devan li e non sa bann dimoun devan li. Par ler i dir mon ki zot ganny ofer en travay ki dan lotel. I annan en zanfan ki i pa konnen kot i pou kit zon zanfan. I pa kapab ale, oubyen i komanse li parey ou'n dir.

Me selman akòz i annan serten kontrent lavi, ki pa permet li kontinyen e i war ki letan i ti pe travay *8 to 4* e i annan son piti, i ti kapab kit son piti ek son granmanman

ki pa pe travay ki annan laz, konmsi i *over 63* e letan i vini i pran son piti 4er. Me selman i pa kapab fer sa si i pe travay *shift* aswar ale-vini koumsa.

So i annan serten sityasyon mon krwar ki nou bezwen revwar. Mwan mon *all in favor* ki nou bezwen aboli e *repeal* sa *Scheme*, akòz parey mon'n dir ti annan labi. Me selman nou pou bezwen osi vwar ki mannyer koman Gouvernman *we go the extra mile*, pou asiste sa dimoun pou li ganny en lanplwa ki *suit* son kondisyon.

Par ler i pa zis en dimoun i pa kontan en travay. Non! I annan sa bann kontrent ki antase avek li ki i war ki i dan difikilte e par ler i telefonn bann limero ki zot donn li, personn pa reponn Minis, oubyen zot reponn zot dir zot pou pran kontak ek li.

Prezan li sa dimoun i dir ou'n dir ou pou pran kontak ek mwan, mon esper ou pran kontak ek mwan. Sa kontak zanmen, zanmen i arive!

E nou koman bann *MNAs* nou ganny sa konplent pou nou sey adrese. E nou sey anmenn, mon pou dir dan sa konteks *PS Baker* i reponn mazorite mon *call at least* ler mwan mon *call* li, (mon pa konn pou lezot) i reponn mon *call*.

E i sey *find out* ki pe pase e i donn mon en *feedback*,

mwan osi mon sey donn sa dimoun ki'n anmenn sa konplent kot mwan.

Me selman parey mon'n dir *Unemployment Relief Scheme* i en *Scheme* ki bezwen ganny *repeal* aköz i ti pe *drain* tro bokou larzan, kot pa neseler. Si nou ti servi li byen i ti pou en *Scheme* ki ti pou fantastik, me aköz in annan bokou labi.

E se dan sa konteks on konnen pou annan komanter kekfwa ki pou ganny sorti, kot pou ganny dir ki letan i annan labi annou get sa bann ki pe abize e annou *deal* avek sa ki pe abize, me annou pran sa ki pa pe abize dan en konteks ki byen.

I annan en wi i annan en non osi, me selman parey mon'n dir mon ti a swete ki Minister i pran konsiderasyon sa bann pwen ki mon met devan, e gete ki mannyer nou kapab asiste sa bann zenn dimoun.

Akoz i annan bokou zenn dimoun ki lo la. Avek sa de mo Mr speaker mon ti a kontan remersi ou.

MR SPEAKER

Mersi Onorab Andre. Mon apel Onorab Gabriel.

HON CONRAD GABRIEL

Mersi Mr Speaker. Bonzour Minis ek ou delegasyon. Bonzour tou dimoun a lekout,

espesyalman bann zabitan Pointe Larue.

Minis atraver ou Mr Speaker premyerman nou get meaning *Unemployment Relief Scheme*. I dir bokou ladan li menm, Mr Speaker atraver ou i pou toultan annan dimoun ki pou napa en lanplwa e ki pou bezwen en *relief* e serten fason ou en lot.

Lo sa pwen i enportan pou note ki i annan bokou dimoun ki ozordi i dan bann bon pozisyon dan nou sosyete, e sa se gras a sa *Scheme*.

Kot zot in donn tou e zot in debrouye pou aprann en metye dan diferan Minister gouvènmantal, osi byen ki prive. Zot in progrese e ganny sa sans kontribye anver devlopman nou pei.

Legzanp e sikse sa *Scheme*, sa program i annan bokou. Me parkont mon pran konsiderasyon ki ti pou bezwen annan serten azisteman, pou sa *Scheme* vin azour avek la realite lavi ozordi.

I pa ti zis en kestyon pran dimoun, donn zot en larzan koman en faver zis pou politik - parey bokou in fer nou krwar.

In annan parmi sa bann dimoun ki ti devoue, ki'n ganny bon *training*. Ozordi nou dir ki i annan en group travayer ki pa ekivalan ek louvraz ki annan. E baze lo la

ki sistenm ki nou anvizaze met la? Ki responsabilite ki nou annan anver nou pep?

Akoz pa bliye ki i annan en *right to work* anba nou Konstitisyon, kot par ler nou bliy sa, poudir sa i en *human right*. I paret ler *LDS* in vin o pouvwar, zot krwar ki dimoun mwen kapab dan sosyete pa bezwen ganny proteksyon e pa bezwen ganny ede. Sa i zot desizyon.

Lefe i reste ki pa nou tou ki pou aprann lekòl; pa nou tou ki pou vin dokter; pa nou tou ki pou von enzenyer, e pa nou tou ki pou ganny sans al liniversite.

Dan semen lavi tanzantan i annan dimoun ki pou tonm par kote. E nou pa kapab les nou frer tonm dan rigol. Nou, nou bezwen rod en fason kot i ganny en lasyet manze.

Sa i ankor enn fwa responsabilite moral anba nou konstitisyon. *URS* nou kapab dir ti en platform pou dimoun la pli devan dan lavi. Nou pou toulta annan problem kot dimoun i trouv li san en lanplwa pou diferan rezon. E i enportan annan sa *Relief Scheme*.

Mr Speaker la i Semenn Festival Kreol e koman en Kreol Seselwa se pa nou. Sa kalite sistenm liberal i pa enn ki adapte ek nou kalite mantalite e nou fason viv.

Dimoun la deor i konn tre byen kote nou sorti koman en pep e ki zistans nou'n arive anba ansyen Gouvernman oparavan.

Nou konnen ki sa detrwa mwan ki'n pase, i pa'n fasil pou bokou fanmir ki ti *involve* lo sa *Scheme*. E bokou fanmir Seselwa in ganny afekte severman e sa i konpri moralman. La avek sa reform *IMF* ki pe al ganny enplimante, bokou plis fanmir Seselwa pou dan gro difikilte finansye.

Trezyenm Mwan Lapey i dan sonm, bokou dimoun pe trimouse pou konbat sa lavi ki pe vin deplizanpli pli dir e pe kontinyelman monte toulezour. Lavi pa fasil e in vin pli difisil pou fer de bout zwenn sirtou pou bann *single mothers out there*.

Bann zabitan Pointe Larue, mon partaz zot soufrans e mon asire ki zot osi konpran mon pozisyon. Mon pou kontinyelman ede kot mon kapab e mon dir zot mersi kot malgre nou'n annan diferan lopinyon, sa pa'n anpes nou travay ansanm.

E mon kontinyelman, mon pou kontinyen mon lalit pou vwar en meyer Sesel kot tou dimoun i ganny menm sans. Mersi Mr Speaker.

MR SPEAKER

Mersi Onorab. I annan serten Onorab ki'n anmenn en

konversasyon kontinyel la dan sa dernyen soz. Mon pe dir zot, si zot in met zot non lo lalis zot pou kapab koze, alor silvouple fer zot komantr lo *mic* e evit bann komantr *off-mic*. Mersi.

Onorab Georges mon'n war ozordi ou'n lev ou lanmen premye. So mon pa pas ou laparol.

HON BERNARD GEORGES

Mon remersye ou Mr Speaker. Efektivman mon ti anv i koz en pe boner lo sa Mosyon, lo sa *Bill* ki devan nou ozordi.

Mr Speaker, Minis mersi pou ou kontrandi lo sa lazisteman ki pe ganny fer dan program ed e siport bann dimoun ki napa en lanplwa. Mon ti a kontan - avan ki mon komans mon deliberasyon bomaten - fer en pi komantr lo sa ki Onorab Gabriel fek dir.

E Onorab Gabriel i koz lo en sistenm liberal konmsi set en move keksoz. E i pe servi sa koman en zouti pou fer dimoun mefyan e kekfwamenm per.

Mwan mon ti a kontan Mr Speaker reasir dimoun ki en sistenm liberal se pa *LDS* ki'n evante, sistenm liberal in la toultan menm anba *US*. Pa bliye ki ler zot in deside pou vann *shares* dan *SACOS* avek dan *Seychelles Commercial Bank*, sa set en sistenm, liberal ki zot it pe aplike!

Ler zot ti deside pou *Open Sky Policy* pou le *Emirates* ek *Etihad* antre ek *Qatar* e fer *Air Seychelles* perdi son *market shares*, ti sistenm liberal sa ki zot ti pe aplike!

(APPLAUSE)

HON BERNARD GEORGES

Nou, nou napa *monopoli* lo en sistenm liberal nou.

(Interruption)

HON SEBASTIEN PILLAY

(Off-Mic)

MR SPEAKER

Wi-wi Onorab Pillay.

HON SEBASTIEN PILLAY

(Off-Mic)

MR SPEAKER

Onorab Pillay permet mwan deside. Mon'n remarke i annan 2 Onorab ki'n fer remark ankor.

Mon repet mon komantr silvouple si zot pou koze esper zot trou zot aköz lo *mic*! E evit bann komantr *off-mic*. I deranz mwan! I deranz Lasanble! Mersi. Onorab Georges kontinyen silvouple.

HON BERNARD GEORGES

Mersi Mr Speaker. Mr Speaker sa ki nou pe fer la depi detrwa zour, mon konnen i konserne bann Manm lo lot kote latab. Yer nou ti koz lo en nouvo prosedir pou regard *social housing* avek *housing* zeneralman dan nou pei.

E i al kont zot prensip ki Gouvernman i bezwen fer lakaz pou tou dimoun. Nou konpran sa. Apremidi nou pou koz lo en *National Institute for Culture* e nou konnen san ki mon esey regard dan sa ki zot pou vin dir, oubyen antisip zot deba apre midi, nou konnen ki zot, zot pou dir nou non-non- non, nou devret reste dan en sistenm kot i annan en Minis pou Kiltir.

Nou konpran sa. *Old habits die hard*. Zot, zot in travay dan en sistenm e sa Onorab ki'n koz avan mwan, in montre tre byen ki zot *mindset* i ankor dan sa sistenm e zot pa anvi ki sa sistenm in sanze.

E, me mon pa kapab aksepte Mr Speaker ki an manm Onorab i dir ki sistenm liberal pa adapte avek nou fason viv, ler en gran mazorite Seselwa lannen pase in dir ki wi zot aksepte sa e se pour sa rezon ki zot in vot pou en Gouvernman LDS!

(APPLAUSE)

HON BERNARD GEORGES

Nou pa'n ariv la par laverti nou! Nou'n ariv la akòz en mazorite dimoun laba deor in krwar ki sa sistenm in adapte e se pour sa rezon ki zot in vot pou nou! E se pour sa rezon ki Minis i vin devan nou ozordi.

E parey en lot Minis pou vini apre midi pou dir ki nouvo fason, nouvo Gouvernman, nouvo fason fer nou bezwen aziste. I pa en keksoz radikal ki nou pe fer la bomaten Mr Speaker.

Tel parey i pa pou en keksoz radikal ki nou pe fer apre midi. Se bann lazisteman ki bezwen pran an konsyans. Pa lafet ki en Gouvernman in sanze, me lefet ki *on the ground* sityasyon in sanze.

COVID in arive e in fer nou revwar nou fason fer. Lekonomi touris in desann e nou'n bezwen donk trouv en nouvo fason pou aziste e pou ed bann dimoun ki pli dan bezwen. Zanmen person in dir ki pa pou annan lasistans.

E se sa mon krwar Minis li menm li bomaten in fer sa kler. Alor annou pa fer krwar ki lannwit i lizour e ki lizour i lannwit! Napa naryen ki'n sanze apard en ladministrasyon e en diferan fason fer.

Sa ki bezwen pou ganny proteze, me sa ki in fer en karyer dan lasistans pou bezwen re mazin e re balans

zot fason fer e komans travay pou zot prop byennet.

E setou Mr speaker ki sa Lalwa pe fer. E mon ava menm al pli lwen, e mon ti dir yer ki diferan letan i anmenn diferan solisyon. E i ti, mon pou repete ozordi akòz i annan en bann ki pa'n tann mwan yer.

Ti nesese pou Gouvernman entervenir dan sityasyon lakaz 40an pase akòz ti annan en mankman, e sel dimoun ki ti pou kapab fer lakaz vit sete Gouvernman. Nou'n rekonnet sa. I ti nesese ki Gouvernman *when the going was good*, entervenir dan bann problem lanplwa, e fer sir ki tou dimoun ki bezwen i annan en lanplwa.

Olye asiste zot ek *welfare* met zot dan en sistenm *training* ki zot, zot ti apel URS.

Ozordi osi i nesese pou nou sorti dan sa sistenm, e vin dan en sistenm pli konpetitif, akòz nou pe viv dan en lemonn, nou pa pe viv dan en zil dan milye Losean Endyen nou. I annan en lemonn *out there* ki egzizan.

Nou bezwen realize ki nou napa en larzan endefini. Nou bezwen travay dapre nou mwayen.

E nou bezwen fer sir ki saki nou annan, sa pti git ki nou annan nou servi li dan en fason pli avantaze, pli byen, ki

target bann dimoun ki bezwen e non pa bann dimoun ki fer en karyer lo lasistans.

Mon ava vin lo sa sistenm *blow-back*. Ou vwarler ou fer en keksoz avek ou leker, menm si ou krwar i pou byen pou annan de sikonstans kot pou annan labi. E URS in enn, lakaz in enn.

Mon pa pe dir ki zot in *set out* pou fer e sistenm ki pou abizif. Non! Se sa sistenm ler zot in komans li avek tou zot bonnfwa, ki dimoun in abize parey Onorab Andre in fer nou konpran bomaten.

Mr Speaker ler Gouvernman bann administrasyon oparavan ti entrodwi *carer - home carer*, zot nide ti bon, e zot nide ti nob.

Kot olye fer bann *homes* pou bann dimoun aze al reste ladan ki pou kout en kantite larzan dan sosyete, i preferab pey en endividi pou donn lasistans enn ki pa kapab vey son prop lekor.

E sa ti en tre, tre bon nide. Me ki'n arive avek sa nide? Ki'n arive avek sa nide, olye vin en lasistans pou serten dimoun dan bezwen, *home carer* in vin en destinasyon. Dimoun ki lekol zot anvi fer en karyer dan *home carer*. E nou tou nou konn sa e i pa ti zot lentansyon.

Me se sa ki mannyer keksoz in arive e nou bezwen aziste ozordi akòz sityasyon ekonomik i fors nou pou asiste.

Lakaz egzakteman menm zafer *URS* egzakteman menm zafer. Fodre Mr Speaker ki nou konpran sa e nou konpran sa tre byen. Nou nepli kapab! E sa Gouvènmàn, sa ladministrasyon in dir sa plizyè fwa. Nou nepli kapab akòz nou napa le mwayen pou nou donn dimoun tou lasistans ki zot bezwen e kan zot bezwen.

Nou bezwen fè sir ki dimoun i vin pli responsab e dan sa lazisteman e dan sa reform, tout an gardan e protez an bann ki pli bezwen, nou sosyete i avay vin en sosyete pli dinamik;- en sosyete kot i annan plis responsabilite, kot dimoun pa pou war sa bann karyer ki ganny sipòte par Lazans Proteksyon Sosyal koman en destinasyon, me koman en landrwa tanporer pou zot ariv a en lot destinasyon.

E se sa kot zot bann bon nide in annan bann konsekans ki zot pa ti'n prevwar, e ki ozordi sa ladministrasyon i bezwen vini e sanze e remet nou lo en bon semen. Se tou Mr Speaker!

Yer nou'n koz lo bann dimoun - e mwan mon ti mansyonn Mrs Doricia Albert

e mon mansyonn li ankò ozordi ki'n antre dan *emergency house* 14an pase pou 3mwan e 14an pli tar zot ankò dan *emergency house*.

E se sa bann keksoz ki'n arive, akòz en lide, en lespri en *emergency house* i en bon lespri. Me ou bezwen servi li koman *emergency house*.

Tel parey carer, i en bon lide me fodre ou donn dimoun *carer* zis ler zot bezwen, me ou pa fè li vin en karyer pou bann manrmay anvi kit lekol anvi vin an *carer* pou larestan zot lavi! Sa nou bezwen sanze dan sa sistenm!

E si zot konpran sa zot a konpran akòz nou, nou o pouvwar ozordi e zot, zot dan Lopoziyon! Se sa Mr speaker ki nou bezwen aksepte. E mon enplor zot silvouple pou vwar ki sa *repeal URS* ozordi, i pa sa ki zot krwar. Me i en mouvman dan en pei dinamik e dan en lemonn ki *interwoven*.

Akòz nou bezwen fè li pou nou prop sirvi e pou fè nou bann dimoun annan plis keksoz pou zot menm. Nou pa pe aras zot okenn keksoz isi. Ler ou tir en dimoun lo *welfare* e ou met li dan lanplwa e i pey son *tax* i kapab *afford* son lakaz. I kapab ganny en pansyon ler i *retire*. I kapab ganny vakans.

E ou pa bezwen ler ou en *carer* rod vakans, akòz nou,

nou pa ganny konze anyel eksetera. Se akòz se bann dyob tanporer. Se pa bann *carer for life!*

E alor Mr Speaker avek sa detrwà mo mon ti a kontan, annou rekalièb nou deba bomaten. Mon pe kòz avek bann Manm Lopoziyon.

Realize ki sa ki pe ganny fer la set en nesèsite;- en nesèsite pa selman pou ozordi me set en nesèsite pou revaloriz e redinamiz nou lekonòmi e donn nou popilasyon sak endividi plis lalibète pou li pran son desizyon pou li menm.

E se sa, sa ki nou pe fer bomaten lo nivo lanplwa e se sa ki nou pou fer apre midi lo nivo kiltir, e se sa ki sa ladministrasyon pou kontinyen fer ziska ki nou'n kapab rekalièb nou pei e fer li vin en pei modern. Mon remersye ou Mr Speaker.

MR SPEAKER

Mersi Onorab. Nou a ekout Onorab Egbert Aglae.

HON EGBERT AGLAE

Mr Speaker bonzour. Bonzour Minis avek ou delegasyon.

Mr Speaker depi yer mon pe ekout tre atantivman lentervansyon *Leader of Government Business* e la fason ki i pe penn en portre avek bann size. *Anyway* i en avoka par profesyon, mon

krwar i konnen ki mannyer i pou vann diferan kalite prodwi dan diferan kalite fason.

Pou mwan Mr Speaker ozordi nou'n ariv en letap kot i annan en Lalwa ki pe ganny *repeal* ki ladministrasyon oparavan ki ti met li anfers, avek bi anmenn soutyen dan bann moman difisil. Bann ki pli vilnerab ki fer ki zot a kapab ganny en lasyet manze pou kapab met lo latab zot fanmir.

Mr Speaker mon'n osi ekout Onorab Clifford Andre ki'n kòze, ki'n osi fer sorti serten pwen kot i pa kontan la fason keksoz in ganny fer. Akòz i ankò annan dimoun ki ti lo sa *Scheme*, ki pa ankò kapab ganny en travay pou bann rezon e defi sosyal.

E pou mwan Mr Speaker ler nou pe kòz en sistenm liberal, mon krwar sa ki mon koleg Onorab Gabriel in sey dekrir se ki pou mwan si *LDS* in vin o pouvwar ozordi se akòz i pa ti vin kler ek son elektora.

E bokou dimoun ozordi pe dir ou parey dikton kreol i dir ou, kabri dan sak. En keksoz ki mon ti a kontan petet fer resorti Mr Speaker. Si en parti politik dan sa lenstans i *LDS* ti vin fer son kanpany pou dir i pou koup *URS* ler i vin o pouvwar definitivman i pa ti pou ganny sipor en kantite dimoun.

Si i vini i dir ou i pou koup *welfare*, i pou fer *redundancy*, i pou ferm *STC*, i pou fer monte pri bis *SPTC*, *PUC*, mon pa krwar Sesel ti pou donn zot en mazorite.

Si zot ti vin kler zot ti dir nou pa krwar dan en sistenm *social housing*, nou pou get zis lentera nou bann gro biznes, nou pou fer dimoun aze pey *home*, revwar en sistenm *carer*. Mon pa krwar Seselwa ti pou donn zot sa mazorite ozordi.

Rezon i kler ki zot pa'n vin kler ek sa pep e ozordi sa pep pe rekolte serten desizyon ki mon santi kot ou pase zot pe konplent. Mr Speaker dan letan difisil bokou pei in pran bann mezir nesaser pou zot kapab aport soutyen fas a sa pandemi COVID-19.

Kot plizyer milyon lanplwa mondyal, biznes in ganny afekte e i annan diferan mekanizm ki'n ganny met an plas atraver lemonn. I annan en lorganizasyon ki apel (*ESSA*) ki li i *oversee* en pe bann program sosyal ki ganny met an plas par diferan pei.

Nou'n war pei ki'n vin avek bann *Unemployment Scheme*. Bann *Job Retention Program*, bann *partial employment* ki'n ganny entrodwir e osi entrodwir ban *Wage Subsidy Scheme*.

E bokou pei in bezwen war li vin avek bann *massive package bailout* pou sey kapab ed sa bann biznes pou zot kapab reste alaflo, e an menm tan par fer sa zot kapab retenir travayer kot i napa nesosite ou annan bann *massive redundancy*.

E se sa lentansyon ki Gouvernman ti pe fer ler i ti pe reentrodwir en *Scheme* parey. An menm tan apre i ti re anmenn en lot lorganizasyon sa se *SETS* pou kapab vin sa pon.

Akoz nou ti pe tann en pe leokri par Lopozisyon sa letan, se ki dimoun pa kapab reste lo *URS* baze lo son Lalwa ki egziste ki pou en peryod 6 mwan, apre ou pou bezwen kapab pe bouz dan lot direksyon.

Sa enn bout mon ava dakor ek zot, wi ou pa kapab reste lo *URS* pou lavi. *URS* i en veikil ki anpar ou dan moman difisil, pou fer ki napa en kriz sosyal ki devlope dan pei kot dimoun zis pe perdi lanplwa, napa reveni ki antre kot lakaz e fanmir i soufer pa kapab pey zot litilite, manze, *loan* ensidswit.

E pour mwan Mr Speaker lanons ki *LDS* ti vin avek ler i ti antre, i ti vin o pouvwar se pou aboli, pou mwan sa mon ti war poudir *it's too soon*. *Timing* pa bon, mon krwar zot ti kapab fer li dan en lot fason

san mazin bann rezon politik par deryer.

E ler mon koz lo rezon politik bann largiman ki zot ti vin avek se ki *URS* ti ganny servi pou ganny vot. Parey zot in dir avek enn de bann lezot keksoz, be si nou ti kre tousala pou ganny vot aköz ki se zot ki'n ganny eleksyon?

Seselwa ozordi lizye i ouver, i matir. Ou kapab vini don li sa ki oule ozordi me dan bwat vote ki i fer son desizyon li. Alors sa manrmoun ki zot pe sey donn nou, mon pa krwar i ladan.

Lot keksoz Mr Speaker mon krwar ki nou bezwen reflesir byen, malgre parey Onorab Georges in fer sorti i pe vin ek en lot kalite fason fer e ki nou, nou'n pri dan vye fason lepase.

Me sa fason lepase ki nou ti fer Mr Speaker malgre ki ti annan bann defi, i ti anmenn serten rezilta, sirtou pou bann vilnerab.

Petet i pa ti ava anmenn rezilta pou bann ki annan, pou bann ki pos i plen, aköz zot, zot pa krwar dan sa kalite sistenm aköz zot, zot in ariv lo en nivo. Me i ti aport soutyen pou sa ki pli vilnerab.

Ou pa kapab koup en pye dibwa ki pe aport fri zis aköz petet ou war poudir i annan zwazo ouswa sousouri, ki vini i vin donn bal ladan e ou vini ou koup pye ou zet ater.

Si i annan keksoz ki mal - ki pe ganny mal administre, ki annan *loophole* ladan, ki kre loportinite pou labi, rod fason parey fason Lalwa i annan i egziste tou Lalwa menm ou kre en Lalwa i annan *loophole* kot en endividi i servi pou li ganny son semen pase.

Ki ou ti devret fer se pran bann mezir nesaser pou ferm sa bann *loophole*. Si i annan labi rode kote ki labi i egziste, koup sa labi. E la gradyelman ler pei i a sorti dan sa problem ki i ladan, aköz nou pa ankör sorti - nou pa ankör konnen ki pou arive i kapab annan bann sok. Gradyelman lekonomi i stabilize e la gradyelman ou ti a komans *phase out* sa *Scheme*.

Si ou ti pe kre lanplwa ou ti a tir sa bann dimoun lo *URS* e ou anvoy zot dan lanplwa gradyelman. Ou pa zis arete met tou sa bann dimoun deor ki i annan i ankör lo semen la.

E i annan ki ti annan bann problem ki'n retourn dan bann lenfliyans e vol in rekomanse ankör dan sa pei. Nou pe tann diferan konplent ankör pe pase. Sa i aköz sa *URS* ti donn zot en lokipasyon, ti donn zot en travay, ti donn zot en reveni.

Mr Speaker pa aköz ou ki'n fer sa, ki ler ou vini parey ou'n ante dan en lakaz, kot ou vini ou kraz tou keksoz en sel kou, ou met aplat ater, ou

pran tou sa bann meb ti ki la ou pran ou zete, ou met tou sa ki nef angiz ou krwar ou pe fer keksoz pli byen.

Keksoz i bezwen ganny fer gradyelman e en fason konsistans. E zot koz bokou lo letid sa nouvo ladministrasyon fer plan. Be zot bezwen etidye serten keksoz byen osi dan plas zis vini, bouldoz keksoz atraver e fer ki keksoz apre i kre en lenpak dan lasosyete li menm.

So pour mwan Mr Speaker *timing* pou tir sa Lalwa e pou fer *URS it's not a good timing*. Zot ti kapab fer li gradyelman e ler pei in stab *phase* li *out* e la mon ti a dir ne be *ok* mon ti ava donn en sipor.

E si demen i kapab dan 10an, 15an nou repas dan en lot sok ou ava re entrodwir en lot *Scheme similar* pou sey kapab anpar bann dimoun.

Akoz sa ki en Gouvernman responsab i fer si i kontan son pep si i oule war son pep kontinyen epanouir. Ou dimoun i travay i pey *tax*, i kontribye dan lekonomi pou fer anrisir Gouvernman pou li kapab ganny en Bidze pou li kapab depans ek son program.

Dan letan botan *fine*, be ler nou pas dan movetan si ou Gouvernman ou'n anmase ou'n akimile, ou bezwen rod anpar sa ki ti donn ou sa

larises li menm. E sa ki Gouvernman responsab i devret pe fer.

So avek sa Mr Speaker mon pa pou siporte sa kalite fason fer e mon santi poudir *timing* ti kapab fer li dan lot fason gradyel.

E mon konnen pou annan bann lezot ankor ki pe vini, e mon pou aret lanmenm Mr Speaker. Mersi.

MR SPEAKER

Mersi Onorab. Onorab Loizeau ou ti a kontan fer ou pwen lo *micro please?*

HON NORBERT LOIZEAU

Bonzour Mr Speaker. Bonzour Minis avek ou delegasyon. Mr Speaker sa topik i en topik ki mon konnen pou annan dimoun pou kontan, e pou annan en group osi ki pa pou kontan. Tou Gouvernman ki vin o pouvwar sakenn i annan son fason travay.

An dot mo, sakenn i vin ek en nouvo fason fer keksoz. I annan ki dir ou pou okip ou depi ler ou'n ne ziska ler ou mor, *from cradle to the grave*. Sa en parol ki Onorab Minis Dezinyen ti kontan dir.

E ki vre, e sa parfwa in fer ki dimoun i ekspekte ki Gouvernman in fer *tou* pou li, li i pa pou fer naryen, i pa pou al lekol, i pou donn lenfirme.

Apre selman sa pli bon keksoz li ki anvi. Me tandis Mr

Speaker i annan Gouvernman ler i vini parey nou Gouvernman ki la o pouvwar i dir ou vini mon pou akonpanny ou ziska la apre ou, ou bezwen bouze. E se sa ki mon panse Minis ki'n vini ek sa *Bill* i anvi fer aköz i konpran sa tre byen li.

Mr Speaker ki rezon ki mon konmans koumsa mwan? Set aköz *URS* i en *Unemployment Relief Scheme*. E ki nou'n war? En *Scheme*, si mon mal zot a dir mon bann ki lo *panel*, zot ki dan lanplwa zot ki konnen sa bann zafer *Scheme*, aköz in telman annan *Scheme* dan Sesel. I annan *Scheme* ki donn larzan pou fer pti biznes, i annan zanmen in fer.

Enn pe fer en *Scheme*, *Scheme* menm tousala. I annan tro bokou *Scheme*. Be la nou pou koz lo sa enn la *URS*, *URS* i sipoze en *Scheme* kot nou akonpanny en dimoun dan son moman difisil, i kapab pou en semenn, i kapab pou en mwan, pou de mwan.

E pandan sa moman nou bezwen fer sir ki sa dimoun pa mor la dan sa *Scheme* li, parey zot, zot in fer. Sa dimoun i antre dan en lanplwa. Mon'n tann Onorab Andre taler in dir ki i annan bann marmay ki travay partou kot Lasante anba *URS* zot in vin, aprezan zot in sorti zot.

Me sa *Scheme* parey Onorab Georges in dir, i pa sipoze en destinasyon, i en *Scheme*. I byen nou'n met ou *clerk* kot Lopital anba *URS*, si kot Lopital apre nou bezwen en *clerk*, la i a vin ou destinasyon ou a reste ou a travay.

Me selman si napa nou pou akonpanny ou la ziska ler nou ganny en lot nou pou met ou ladan, se sa en *Scheme*! *URS* pa sipoze en destinasyon kot en dimoun i vini 10an ou lo *URS*? 3an ou lo *URS* menm ou? Mon'n tann i annan in dir *URS* ti pe ed dimoun *reskilling*.

Mr Speaker nou, nou en Gouvernman ki nou anvi dimoun i al lekol. Mwan mon pa'n al *reskilling* anba *URS* mwan. Ou konnen ki mon ti fer Minis, mon ti al lekol Bel Eau primer, segonder Belonie.

Mon ti al *NYS*, mon ti al politeknik, mon ti anvi vin en elektrisyen, mon ti al dan *School of Engineering*. Mon'n aprann, mon'n anvi fer refrizerasyon? Mon'n al fer en *course* kot *SIT* mwan, *handling of gas whatever* aköz pou mwan kapab fer sa.

Mon pa'n al anba *URS* pou *reskilling* mwan! Nou bezwen ankouraz nou zenn Mr Speaker pou pran ledikasyon serye, pour ki an grandisan letan i ariv en laz zot kapab ganny en travay nob, zot pa

bezwen al anba *URS*, anba en *Scheme*!

Ou bezwen lev, konmela i annan dimoun pa oule al lekòl zis asize bwar diverti-kontan, Gouvernman i bezwen okip zot! Mr Speaker sa la in arive akòz Gouvernman avan in dir ek sa bann dimoun li *from cradle to the grave* mon pou anmas ou mwan e la kot labi i antre.

Mr Speaker ozordi nou pe koz *URS*, nou pe koz lanplwa, kantite lanplwa i annan. Minis pou dakor ek mwan in nonmen. Mwan koman *MNA* distrik Bel Air, tou le semenn i annan en madanm, (ki manner i apele) Mrs Azemia, mon telefòn i plen ek *vacancies* Mr Speaker - deborde.

Mon biro in ouver kot distrik la, la mon pe dir dimoun Bel Air bann ki ti lo *URS* ki ti napa lanplwa la, desann, lanplwa tro bokou! Mon *clerk* i la depi Lendi ziska Vandredi, *DA* osi pe donnen, i annan lanplwa. Be i annan lanplwa akfer nou bezwen *URS*?

Dan lepase ti napa, pa dir mwan sa bann lanplwa - nou dan en moman pandemik Mr Speaker *vacancies* tro bokou! Yer dan nouvel, avan nouvel 7er lo televizyon en lalis in pase ankòr. Prezan mon pe demande, mon dir be i annan lanplwa Sesel, be ki manner i

annan *unrelief* napa lanplwa, sa ta *vacancies* ki mon war ?

Be dan letan *US* ti napa sa ta *vacancies*? Mon panse ti annan, zis selman en fason pou soutir dimoun. Mr Speaker sa zafer *URS* la i a fer en Gouvernman reste o pouvwat ziska leternanm li! Wi. Wi Mr Speaker akòz i annan en group dimoun Mr Speaker ki pa anvi travay. Zot plifere abiz sistenm.

Gouvernman avan i kontan li, i kontan, bann ki en pe fay, fay i ganny met ater, bann ki koz en pe gro lavwa zot per pangar zot a koze sa i reste, i abiz sistenm.

Onorab Deshiela Bastienne in dir mwan yer, i annan en dimoun son larzan, en larzan pe antre lo son kont anba *URS or ASP* pou sepa konbyen lannen.

Selman li i dan Lari Bazar kot en laboutik pe soz, selman larzan pe antre. Ki travay ou fer Mr Speaker? Be pa labi? Minis ti vini avek son *CEO* lotrozour ti dir ki ti annan en nespes '*tiy*'o ki ti'n ouver!

Mon war Onorab Cosgrow i get mwan, (mon pa pou nonm ou non. Mon pa pou sa...

(laughter)

HON NORBERT LOIZEAU

Napa naryen kont ou. Ti annan en tiyo ki ti'n ouver Mr

Speaker. Tiyo ti'n ouver, me ler Minis Francourt i vini i war en tiyo in ouver e delo pe devide ki i fer? Minis Francourt i bezwen ferm sa tiyo, manti Minis? I balans latet i dir mon wi. *Good.*

Minis i bezwen ferm tiyo Mr Speaker. E Mr Speaker mwan mon pou siport sa *Repeal Bill* aköz, dan mon distrik ozordi apre ki *URS* in fermen mon pa pe tro, tro war dimoun obor semen bann zenn.

Dan lepase ler mon ti dir zot leve al travay, i annan ti krwar mon pe ensilte zot, ozordi zot pa krwar mon pe ensilte zot. Ozordi zot i leve zot pe travay. Nou ganny rekomandasyon avek en kontrakter nou pe rod 10 dimoun, 10 zenn pou al travay *Club Med landscaping* pa kontrakter.

Mon *call* en dimoun, i ti abitye asiz la, mon dir rod 10 manrmay nou pe rode travay la. Ou konnen ki i dir mwan, "be *Boss* tou manrmay i dan en zwe!" I annan travay deor la. I dir mwan tou manrmay i dan en zwe mon dir be ou ki ou pe fer? I dir mwan,

"Be mwan mon *SAVOY* mwan!"

Li osi i ti asize ater li, i dir mwan," mon *SAVOY* mon pe ganny mon bann *deal*. Mon *ok.*"

Mr Speaker i annan travay, mon zwenn en garson ki ansarz bann *deal stevedores* - mon krwar kot nouvo lasose, pe rod pwason la *Retraite* i dir mwan "Onorab ou war sa zafer *URS* in aboli I en bon *deal*." Mon dir li wi akont mwan.

I dir mwan, mwan mon ansarz *stevedores* laba. I ti dan bann lannen ler por in ouver dan bann lannen 2018 an desandan i ti annan li 500 doker.

I dir mwan Onorab pa ti ase, ler bato vini ou konnen doker i bezwen sanz *shift*, pa ti ase. I dir ou konnen konbyen doker mon annan la, mon annan 2500! 2500 doker bannla lo sa kote latab bougla in gannyen ler *Unemployment (Relief) Scheme* in fermen. 2500!

MR SPEAKER

12 minit Onorab. Silvouple, mersi.

HON NORBERT LOIZEAU

Dernyen pwen. Mr Speaker i montre mwan lo son *WhatsApp* i annan ankor pe *WhatsApp* li limero kart idantite pou zot, pou anrezistre zot koman 'dokter', koman doker pa dokter. Zot dokter dan pwason laba.

Mr Speaker ou war, i annan travay e si en *Scheme* i la, i pe vin koman en

destinasyon nou pa kapab, an menm tan mon pe al dan *L'Inde* mon ler mon ariv *Dubai* mon arete mon reste *Dubai*. Non! Arab pou met mwan deor, mon destinasyon i dan *L'Inde*.

E *URS* se sa, ou vini, nou ed ou dan pou parkour ziska ler ou antre lo en lanplwa. Ou pa sipoze mor la. Mr Speaker mon annan bokou pwen mon ti anvi fer sorti, me selman avek letan ki'n limit mwan mon ava termin la.

Mon anvi dir Minis mon pou siport sa *Bill*. Akoz koman en Gouvernman si nou war ki en keksoz pa ti pe mars byen, i enportan nou met li akote nou vin ek en nouvo fason fer ki pou mars byen.

E avek sa Minis mon anvi dir ou ki mwan dan mon distrik i annan bokou dimoun in leve in al debrouye e mon felisit bann dimoun Bel Air ki pe fer sa! Mersi Mr Speaker.

(APPLAUSE)

MR SPEAKER

Mersi Onorab. Nou a ekout Onorab Loze.

HON JOHAN LOZE

Bonzour Mr Speaker. Mersi Mr Speaker. E bonzour tou dimoun a lekout, bann oditer Mr Speaker an 1978 mon krwar an Mars

presizeman, Dokter Maxime Ferrari ki ti *the* Minis Ferrari anba Gouvernman ki ti'n fer koudeta, ti al lo lasose avek son *PS*, pou rankontre en bato ki ti'n sorti *L'Australie*.

Abor sa bato ti annan en donasyon manze. Nou ti'n ganny manze kado sorti *L'Australie* akoz nou pep ti lafen. Mon pa pe dir sa an relasyon avek *LDS*, mon pa pe sertennman dir sa an relasyon avek Gouvernman defen Prezidan Mancham.

Sa ti plito en sityasyon ti reflekte en pei ki ti'n anba kolonizasyon en pei ki lanmwatye son popilasyon ti'n lesklav. En pei ki ladan ou ti annan bann met ek bann posesyon akoz dimoun ti posesyon. E sa bann ki ti o sesyon i annan bokou vyolans e labi ki ti'n ganny fer lo zot.

An 1978, apre ki nou ti'n pran pei an '77 nou ti rekolte en pei mizer toutafe napa en sou, e non pa en pei ki ti annan \$500 milyon dan rezerv Labank Santral parey zot. An 1978 i osi lannen ki nou parti ti vin Fron Progresiv pep Sesel.

Bon mon lev sa kestyon akoz mon Johan Loze mwan mon en progresis mwan. Mon en progresis akoz en progresis li i en dimoun - i en sistenm ki o *face* redistribisyon ekonomik dan lasosyete.

E redistribisyon ekonomik dan en fason ki

kontribye pou elimin lapovrete e pou elimin inegalite dan fason ki resours pei i ganny distribye.

E sa i ganny met an plas atraver bann Polisi ki sa Gouvernman, ouswa sa parti ki dan Gouvernman i met an plas. E nou'n fer li sa bann keksoz. Nou'n fer li depi lo konmansman. *Minimum wage* i enn bann ki nou'n fer. Lasante Iniversel i enn bann ki nou'n fer. Ledikasyon Iniversel i enn bann ki nou'n fer.

En sistenm sekirite sosyal. E la mon ava dir zot *since* mon lo 1978 sa senpozyonm ki ti ganny fer pou met an plas sistenm sekirite sosyal, ki nou'n annan *for years* isi Sesel, ti ganny fer kot *Seychelles College Hall* Mont Fleuri an 1978.

Pa ni menm lan apre ki nou parti ti'n pran pouvwar nou ti konmans met an plas sa sanzman radikal, nesaser, ki nou pe ti bezwen *back then* pou byennet e proteksyon nou pep.

E se sa en sistenm progresis. Rezon ki mon anmenn sa largiman en sistenm progresis, se ki taler mon'n tann dir par en Manm konmkwa ki in annan sistenm liberal menm anba *US*.

Be wi, aköz non? Aköz non? En Gouvernman *US* ki'n fini met an plas labaz

progresis. Nou sistenm lasante iniversel i la, ledikasyon iniversel i la, en *subsidize* transportasyon ti la an plas.

En sistenm sekirite sosyal pou protez nou pep ti la. Labaz en sistenm progresis ti la. Yes nou kapab annan *free market liberal economy*. E en *free market liberal economy* i ganny *tampered* par en sistenm sosyoekonomik progresis. Ki protez sa pep. Non pa en sistenm *pseudo* liberal parey zot, zot pe profese ki i ganny kategorize konman lesefer. Ki napa sa *checks* e sa bann sistenm sosyal proteksyon.

Be zisteman serten ki nou'n met dan Konstitisyon zot pa pou kapab tire. Zot pou bezwen kontinyen viv avek *socialized health*, zot pou bezwen kontinyen viv avek *socialized education* ki Albert Rene in met an plas. *There is no way around it*. Zot pou viv avek sa!

(APPLAUSE)

HON JOHAN LOZE

E kontan pa kontan in tase lo zot. Zot pa pou kapab aras sa pep sa.

Zot kapab, *however* profes tou sa bann keksoz ki zot ti pe dir zot pou fer yer. E la ozordi mon vwar Onorab

Georges, pe fer bokou *damage control*. I pe sey efas sa bann *statement* ki in fer yer. I pe sey rod papye kado pou met lo la, fer poli fer klate pou fer dimoun aksepte.

E sa parol la ki zot kontan dir, konmkwa ki nou'n ganny elekte, nou pa ti pou ganny elekte. Be oule dir mon tou sa dimoun ki lo *URS* letan zot in al vote lannen pase, zot ti konnen zot pe vote pou zot ganny pouse lo *URS*? Zot ti konnen zot pe vote pou ganny fout a laport?

Eski i annan en dimoun lo lalis lakaz ki'n vote lannen pase pou li ganny lakaz an plans e an tol? Eski i annan en dimoun ki lo lalis lakaz ki pe atann lakaz ki'n vote lannen pase, pou li ganny miray ki fer avek boutey reste? Parey ti ganny dir al anmas boutey fer miray avek!

Seselwa pa pe ekout zot. E si Seselwa i ekout zot, keksoz ki sap dan zot labous i efreyan! Sa pep i devret port plis atansyon pou sa ki pe pase *in the House of representatives* dan sa pei.

E mwan ki'n fer mon realize poudir Seselwa pa pe ekout zot, set aköz letan in ariv sa deba, lo deklarasyon nou bann *assets*, kot zot, zot in elekte pou zot bann madanm par deklar zot *assets*, Seselwa in sorti an gran pe dir "be sa pa ankor pas devan Lasanble

ki mannyer Prezidan in *assent*." Be ti'n fini pase. Ti'n fini pase depi 21/22 sa. Prezidan in *assent* le 30.

So Seselwa pa pe swiv ki pe pase dan sa Lasanble li. i pa pe port ase latansyon avek zot.

Seselwa in elekte zot an krwayan zot pe vin fer byen, pe vin fer pli byen, pe vin fer tou byen. Be in dir be *ok*, nou'n met Sen. Nou'n elekte bann Sen, bann Sen aprezan dan Lasanble tou pou mars byen, pou napa nanryen ki pou mars mal ankor. I ferm son zorey i *relax*.

E ler li Seselwa pe *relax*, prezan zot, zot antre zot dir donn li lakaz an plans i ti vote pou li ganny pouse. Se sa ki zot pe fer.

E zot bann Sen ki le koriz tou defo zot pe rod tou tiyo lepase ki ti'n ouver tou sa ki'n mars mal dan lepase. Zot oule rode? Rod tou!

Mon ava donn zot enn pou zot al rode la. En dimoun i prezant son lekor kot Minister Ledikasyon konman en eksper tel kalifikasyon, tel kalifikasyon i ganny li gro kontra vo sepaman konbyen.

Turns out i napa en fout sou kalifikasyon in fer zis *short courses*, be zot pa al rode sa? Zot pa al rode nou larzan kot in ale? Sa enn zot pa pou rode sa ! Sa zot pa le?

Nou pa kapab deklar en lager, deklans en batay kont sa ki pli pov. Tou sa dimoun pov i benefisye en fout sou en kote kas, nou deklar en batay lo li, nou tret li tou sord fason. Napa kalite non ki zot pa servi, ki kalite mo pou dekrir dimoun

“Parese !”

“I pa le travay!”

Be konmsi si mwan mon’n ne mizer mon i stanpe lo mon ledon sa bann kouyonnad la ? Zis akòz en dimoun i mizer zot bezwen tret li dan nenport fason, dir nenport kalite sotiz lo li? *Comme* dir Ricky Ras, “Baraten !”

Zot pou dir nenport kwa lo dimoun? Be en dimoun pa’n demande. I pa en vis sa, i en *crew* byen rive. Senyer!

Mon pa konpran ki manner zot pe rezonnen. I annan en parol *SNP* in toutan kontan dir, e mon konnen Mr Speaker ou pou konn sa tre byen, e ou pou kontan sa parol 2 Sesel. I annan 2 Sesel !

Be ozordi mon pou dir zot vre, zot rev in vin vre. I annan de Sesel ozordi. Set egzakteman sa ki *SNP* in toutan profese pou arive ki pe arive ozordi – 2 Sesel !

I annan en Sesel ozordi kot serten nou, nou kapab donn bal tou le *weekend*, al dan lotel 5 Zetwal, larestan nou laboutik Tanbi in fermen 7er, sa 200 doker ki nou pe dir

la letan in pran son bis in ariv se li dan Mayeye i pa gannyen en dipen li ! I pa pou gannyen en dipen li akòz laboutik Tanbi in fini fermen 7er.

Be selman bann nou ki dan lotel 5 Zetwal, nou goberze nou balbise ziske gran maten ! 2 Sesel, e menm dan zot kan i annan de Sesel.

En fanmir byen eze i al kot en lotel pou al fer maryaz son zanfàn i ganny dir *SOP* sa lotel 45 envite, sa nou *SOP*. Sa pov fanmir konmans triye lo son lalis, lekel ki pou envite lekel ki pa pou envite.

En lot i ale, Leta pou al bann prens prenses de la Nasyon, i ale 150 goberze balbise, fer donn bal ziska gran maten, antre zot sa. Menm lotel, menm *SOP*. Enn 45 lot 150. E 2 Sesel sa !

E ozordi nou annan nou en Sesel ki’n deklar lager in deklans en konba asarnen lo sa ki i annan mwens.

Si en dimoun i annan mwens ozordi, nou ferm tou tiyo. E nou dir tiyo ti’n ouver, tiyo ti pe koule. Be sa tiyo ki li i ti al kot Minister Ledikasyon laba ti prezant son lekor anba fo preteks konman en sepa kwa gran koneser dan sepa kwa, zwe dan latet manrmay, napa enn son program ki’n marse.

Zot pa al rode sa bann gro larzan ki in fer? Sa enn

tiyo zot pa le fermen! Sa kit ouver sa enn?

Ozordi tou sa ki zot ti koz kont, i bon. In bon! Tou dalon antre asize. Tou zanmi dalon paran ami e konesans *népotisme* antre donn bal dan larzan Leta. Pou ou vin *DA* foudre ou lonbraz *MNA*. Monte desann partou avek *MNA*, ar la ou ava vin *DA*, la ou ganny plas *DA* napa problem! Kontra dalon!

CEO ozordi nou annan en sityasyon dan sa pei kot trezorye parti politik i ganny met lakle manze, lakle manze sa pei i ganny mete dan lanmen en dimoun, ki ti en trezorye dan parti politik e konfidan zot sef.

Me sa bann keksoz la pa sa ki zot ti koz kont? Pa i kont zot prensip? Pa zot ti dir zanmen zot pou fer sa bann keksoz? 30an zot pe maltret faver zot pe dir faver, faver, be pa faver sa? Ki mannyer i apele sa?

Problem i avek sa bann dimoun ki ti lo *URS*, pa avek sa bal ki zot pe donner? Mwan mon plito krwar problem i ek sa bal ki zot pe donner mwan. E zot pe donn bal! E sa pov malere Kreol, sa pov malere Seselwa i pou esper 2023 pou son pos ganny en pti larzan ladan. La mon dir la.

MR SPEAKER

12 minit Onorab.

HON JOHAN LOZE

Seselwa pou espere ziske 2023 avan ki ou pos i kapab respire.

MR SPEAKER

Onorab 12 minit, ou'n tann mwan?

HON JOHAN LOZE

Wi Mr Speaker.

MR SPEAKER

Mersi

HON JOHAN LOZE

Antretan kabri pou vin lo bes lo salad. In sorti dan son sak e i pe konsonmen ziska en pwen lobežite lo salad. Mersi Mr Speaker.

(APPLAUSE)

MR SPEAKER

Mersi Onorab. Nou a ekout Onorab Naidu.

HON SATHYA NAIDU

Bonzour Mr Speaker. Mersi Mr Speaker. Bonzour Minis ek ou delegasyon. Bonzour tou koleg Onorab e tou dimoun ki a lekout. Parler mon en pe konfize lo kwa ki lo vremen nou pe diskite.

Bill devan nou i konsern *URS*, non pa distorsyon pou *suit political agenda* ki zot, zot annan.

(APPLAUSE)

HON SATHYA NAIDU

Pep Seselwa in vot pou en sanzman, zot pou determinen si zot pou remet nou o pouvwar ankor dan 4an. Nou la pou en dirasyon 12 mwan le 25 Oktob zot pou vwar mannyer sa pep pou dir mon satisfè lafason ki mon'n pran sa desizyon.

Akoz i annan dimoun ki byen boner, apre ki Prezidan ti'n fer son deklarasyon dan Leta Lanasyon pou dir ki pou ganny aboli dan mwan Zanyve zot ti'n resevwar sa byen. Zot ti dir wi, nou bezwen tir sa. Akoz?

Minis li menm ler i ti pe prezant Bidze pou Departman ASP, ti'n dir URS ti pe kout nou R270milyon. Ozordi nou pe viv dan en moman kot napa *lockdown*, zot menm ki ti pe plenmyen, *lockdown*, *lockdown*, nou'n dir non. Nou bezwen reouver nou frontyer pou fer sir ki keksoz i mars byen.

E keksoz pe mars byen!

(APPLAUSE)

HON SATHYA NAIDU

Tourism arrivals they are shooting up! Lo kote vaksen zot in sey dekouraz sa pep pou pa pran vaksen. Be kip e arrive? Dimoun pe desann zot

pep ran zot vaksen. E pou sa *booster shot* mon ankouraz zot desann pran aköz nou depan lo Sekter Tourizm pou lemoman.

E an sa ki konsern sa renesans ki pe arive, se sa ki'n permet *IMF* pou vin donn nou sa led. E tou le semenn parey mon koleg Onorab Loizeau in fer sorti, i annan apepre 200 louvraz - 200 *vacancies* ki ganny pibliye tou le semenn.

E nou tou nou ganny en kopi sa. Mon ti ava voudre konnen konbyen dimoun Onorab Loze in mete dan sa bann louvraz. Aköz lo mon kote mwan mon'n fer mon par. E mon fyer poudir mon'n ed 50 dimoun pou rantre dan lanplwa.

(APPLAUSE)

HON SATHYA NAIDU

E Seselwa i oule ki keksoz i sanze. Wi 2023, wi zot pou vwar en lamelyorasyon. Aköz se sa Gouvernman *LDS* ki pe diriz sa pei e non pa zot.

E an sa ki konsern lamelyorasyon 2023, i annan en parkour ki nou bezwen traze. I en parkour ki annan tou son bann defi. Aköz nou pe pas dan reform *IMF*. Sa menm *IMF* an 2008 ti dir zot tir *URS!*

Zot menm zot reentrodwir li avek en bi pou

kwa? En bi pou zis fer nou pep vin en lesklav anba en sistenm *welfare*. Nou, nou krwar dan en filozofi pou liber nou pep, pou tir zot lo sa *welfare*.

E deza i annan diferan *Scheme* ki an plas. Annefe mon ti pe gete, *My First Job* i pa konsern louveraz sa? I pa konsern ed bann zenn? Annefe baze lo en lartik le 21 Septanm sa lannen in annan apepre 500 zenn ki'n antre dan lanplwa.

Nou annan *Apprenticeship Scheme* eski sa i pa konsern louveraz? E Minis in fer resorti kwa ki pe ganny fer, zot pe re devlop lafason ki sa *Apprenticeship Scheme* pe marse.

E tandis ki lo kote bann lezot *Scheme* ki an plas, nou bezwen byensir revwar pou fer sir ki azour. E *URS* i pa azour pou avek nesesite nou pei ozordi. E nou bezwen vwar sa byen.

E wi pli boner zot ti pe dir ki nou pou dir ki *URS* ti pe ganny servi konman en zouti politik, be ler ou pe regard bann statistik dan mwan Oktob ki ti en mwan eleksyon lannen pase, zot ti'n met apepre 2036 dimoun. Zis dan en mwan dan letan eleksyon. Be sa zot abitye fer sa. Zot abitye bat latet sa pep parey zot ti fer dan leparse!

Me selman sa pep in ganny ase. Zot in ganny

libere. E wi sanzman i pa fasil, me selman avek letan zot ava konpran poudir ki zot osi zot annan zot responsabilite.

E parey mon koleg Onorab Loizeau in fer resorti, i enportan ki nou konnen ki ledikasyon i en zouti kle, pou ou kapab bouz devan dan lavi. Fodre ki ou pran sa o serye. Pa mazin fer piti avan ki ou ganny en louveraz. I enportan ki ou konn sa osi.

E an sa ki konsern *URS* in annan en kantite labi. Lo kote Ladministrasyon Distrik Saint Louis, nou ti annan apepre 6 dimoun. E sa 6 mon napa nanryen kont zot, selman zot ti pe zis asize pa ti pe fer nanryen! Be oli prodiktivite? Eski ti annan *monitoring* lo sa kote, pou fer sir ki tou sa bann dimoun lo *URS* pe vreman travay? Mon krwar pa.

Wi i ti annan bann ka parey Onorab Andre in fer resorti ki zot ti pe travay. E wi zot santi ki zot bezwen en led an plis. E se la kot Lanplwa i bezwen revwar. Napa naryen mal, ler en Onorab i fer resorti en pwen feb pou nou kapab revwar aköz nou, nou pe desarz nou responsabilite vizavi nou distrik e nou bann zabitan.

Me selman pwen final lo sa size se, nou pou bezwen kapab anmenn sa sanzman ki dimoun i oule vwar. Nou pa

pou kapab kontinyen *business as usual*. Byensir lo lot kote latab zot pou obzekte, zot pou dir non, zot pou plenmyen, zot pou vin donn nou en nespes zistwar distorte pou dir tou sord kalite keksoz!

An plis ki sa zot menm zot poudir i annan laba parey Onorab Aglae ti'n dir. Wi i annan labi, wi i annan *loophole*. Nou bezwen ferm *loophole*. Be *honestly* nou pe ferm sa *Scheme* en fwa pou tou, aköz i annan tro bokou labi!

Parler mon pa konnen si sa Onorab i ekout sa ki dir.

(laughter)

HON SATHYA NAIDU

Ou konnen? Me selman dimoun laba pe tann li. Se pa si zot pe riye ler zot pe get sa televizyon, ou a dir mwan. Me selman pwen final se sanzman in arive e pep Seselwa pou ziz nou. E mwan mon konfidan baze lo sak desizyon sa Gouvernman i pran, i bann desizyon ki byen kalkile.

E wi zot annan bann *Scheme* ki la an plas nou pou fer sir ki sa bann *Scheme* i ganny enplimante parey i dwatet ganny enplimante ; -kot i pou annan efikasite dan lenplimantasyon. Se la kot zot in *fail*.

E se lo sa baz pep Seselwa in vot pou sa sanzman! Mersi Mr Speaker.

(APPLAUSE)

MR SPEAKER

Mersi Onorab. Nou ava pran en poz la, e nou ava rebran travay ller. Mersi.

(BREAK)

MR SPEAKER

Bon nou ava rebran, Onorab Lemiel ou annan laparol.

HON SYLVANNE LEMIEL

Mersi Mr Speaker. Bonzour Minis avek ou delegasyon e bonzour tou dimoun ki a lekout. Mr Speaker ozordi nou pe debat pou *repeal* Lalwa URS ki ti ganny reentrodwir an 2017.

Gouvernman presedan ti vwar li nesaser pou entrodwir en tel *Scheme* pou kapab ede tir serten group dimoun lo depandans *welfare*.

Mon pou dir ki sa *Scheme* ti ed bokou dimoun. Pe enport son bann defi ki ti vin avek. Bokou dimoun ti leve e al travay ganny en *allowance* R7,056 pou zot kapab re pey zot *loan* pey zot bann *bills*, e osi met manze lo zot latab. En tel *Scheme* mon pou dir ti soulaz bokou fanmir.

Mr Speaker bokou dimoun ki'n pas atraver *URS* in kapab reisi ganny en lanplwa permanan ozordi.

Zot ti sezi sa loportinite pou zot aprann, devlope, travay dir e ganny bann *skills* nesaser. E ozordi zot ankor pe kontribye dan lekonomi pei.

Mon profite pou remersye tou sa bann dimoun ki'n travay anba sa *Scheme URS* e ki'n ede dan en fason ou en lot dan sa bann diferan landrwa travay kot zot in pase.

Me Mr Speaker larealite ozordi se ki i annan bokou dimoun ki san en lanplwa. Bokou zot in anrezistre e zot ankor pe esper en travay. I pa nesaserman ki zot pa pe rode en travay. Oubyen zot pa anvi travay.

Me difikilte i plizoumwen vin kot zot al fer *interview*. Mon konstate ki i annan bokou *vacancies*. Mon gannyen lalis mon osi sorti kot Departman Lanplwa e osi mon fer li mon devwar lo *JOBO* kot mon'n ganny bann lalis *vacancies* e mon partaze avek bann dimoun ki mon konnen zot ankor pe rod en travay. Bokou in ale bann *interviews*.

Me zot pa zanmen ganny konsidere pou sa travay ki zot in fer laplikasyon. Parfwa ou a krwar ki i annan serten anplwayer, i fer li ekspre pou toultan rod bann kalifikasyon

ekstrenm pou bann pti louvraz ki en senp dimoun i kapab fer.

Mr Speaker, mon annan serten bann dimoun ki ti lo *URS* ki'n apros mwan, e anmenn serten konplent, konmkwa zot tanzantan al kot Departman Lanplwa dan zot fason pou zot kapab ganny en travay.

E i annan ki'n dir mwan ki letan zot ariv kot Departman Lanplwa zot zwenn serten zofisye ki zot pe rod en led avek pou plas zot dan en lanplwa, e zot ganny dir ki ou bezwen rod ou louvraz ou menm. Se pa nou zofisye kot Lanplwa ki pou plas ou dan en travay.

Sa si i vre Mr Speaker, i en pe domaz. Mon ti ava kontan lans en lapel avek bann zofisye Lanplwa pou *être* en pe pli konpasyon. E rod tou fason posib pou zot asiste sa bann dimoun ki ankor pe monte desann pe rod en travay.

Minis in dir nou ozordi, ki i annan 4000 ekek *vacancies*, e sa i plis ki dimoun ki anrezistre kot Departman Lanplwa.

Me ler ou regarde bokou sa bann *vacancies* i dan Konstriksyon, e i annan serten ki dan lotelri. Ler ou regard sa bann dimoun ki dir ou i ankor pe rod en travay, mazorite zot i bann madanm. E pa kapab al fer sa bann travay dan

konstriksyon. Zot napa sa *skills* nesese pou al dan lotelri, e se sa ki ou vwar ki zot ankor pe espere.

Departman Lanplwa i bezwen kontinyen ranforsi zot zefor ki zot pe fer, pou asire ki sa bann madanm tousel e lezot dimoun ankor ki pe rod travay, pou ganny plase dan en lanplwa.

Mon lans lapel avek bann dimoun dan mon distrik Anse Royale ki ankor pe espere, kontinyen desann al regard sa lalis la ki Minis in dir 4000 ekek *vacancies* ki annan kot Lanplwa, e petet zot ava kapab ganny konsidere pou en travay. Mersi Mr Speaker.

(APPLAUSE)

MR SPEAKER

Mersi Onorab Lemiel.
Onorab Naddy Zialor.

HON NADDY ZIALOR

Mersi Mr Speaker.
Minis, *PS* ek ou delegasyon, koleg Lasanble Nasyon, Lepep Seselwa bonzour.

Pandan ki mon pe ekout deliberasyon bomaten, mon pe demann mon lekor en keston, eski nou mezir sikse nou pep, oubyen sikse nou Nasyon baze lo lakantite dimoun ki depan lo *welfare*?

Oubyen eski nou mezir sikse nou pep, sikse nou Nasyon avek lakantite dimoun

ki nou nobou tire e fer zot viv en lavi endepandan Mr Speaker?

Bomaten sa Lalwa ki'n vin devan nou pou *repeal* parey mon koleg Onorab in dir i pou annan de kote. I pou annan en kote ki pou dir ou mon dakor. I pou annan en kote pou dir ou mon pa dakor.

Me mwan en kote ki mon pa ankor tann serten koz lo la se ki fason nou *empower* nou pep, pou pa depan lo sistenm me sistenm i montre ou ki mannyer i lapes, apre ou lapes ou menm pou ou kapab debourye.

Mon'n en travayer Departman Lanplwa, e mwan mon konn sa sistenm oubyen sa *Act Unemployment Relief Scheme* tre byen Mr Speaker.

Wi ti annan en rezondet par deryer an 2007, letan ki ti ganny met an aplikasyon 2017 e sa sete Minis ki ti mont lo televizyon e zis dir apartir Novanm Gouvernman pe al enplimant *Unemployment Relief Scheme*.

E la nou, nou ti regarde ki mannyer nou navige pou fer sa *Scheme* marse.

Me keston ki bomaten Minis in met devan nou, e ki nou dan Departman Lanplwa a sa lepok toulezour nou ti demann nou lekor se ki mannyer nou pou fer sa program vin soutenab, e eski i pou soutenab ?

Sa ki enportan ozordi, mon pa anvi al retourn dan bann paz lepase, me nou bezwen regarde ki nou fer pou lavenir.

Lavenir se ki nou annan en nouvo Gouvernman e nou nouvo Gouvernman e sa mon'n dir e mon pou repete e pou toultan kontinyen repet mon lekor, napa en moman ki *LDS* in dir pa pou donn *welfare*!

Napa en moman ki *LDS* in dir pou koup pansyon! Napa en moman ki *LDS* in dir pa pou asiste bann dimoun ki vilnerab oubyen ki lo reabilitasyon.

Mr Speaker annefe se zot ki ti dir dan letan konpany, ki si zot met *LDS* o pouvwar pansyon pou ganny koupe !

Zot ki ti dir dan letan konpany, ki si *LDS* i ganny mete o pouvwar *methadone* pou aret donnen!

Se zot ki ti dir dan konpany, si *LDS* i ganny mete o pouvwar *welfare* pou ganny koupe !

Sa ki nou nou'n dir e sa ki nou, nou pou kontinyen dir avek sa pep, se nou anvi donn ou lezel pou ou anvole. Nou anvi *empower* ou konman en zenn fiy, en zenn manman tousel, pou aprann pou vin endepandan e kot ou bezwen lasistans sa Gouvernman pou la pou ed ou.

Mon retourn lo *Unemployment Relief Scheme*, enn mon bann krentif, sete – (Minis ou'n koz lo la), sete an 2020 tar 2020 ler Gouvernman ti pran desizyon pou enn ;- ogmant sa *fixed - well back then* ti pe pey lo *casual* - ogmant sa *allowance* ki ti pe ganny donnen. Me pli gran krentif se kantite dimoun prezan ki pe rantre lo sa program.

E apre Minis ou'n koz lo *SETS* ki parfwa ou ti pe demann ou lekor eski *SETS* avek *Unemployment Relief Scheme* pa ti pe mont lo lipye kanmarad?

Me apre tousala in vin in ganny anvlope dan en sel program. Me sa ki mon bann koleg i dir, ozordi mon pou remet lanfaz lo la.

URS si ou get son *Act*, i ti kler li. i ti dir ou koumsa poudir en endividi pa merit fer plis ki 1an lo sa program. E bann zofisye ti menm dir avek resipyan ki, "menm si ou pe ganny mete kot Lasante par egzanp, nou pe *relief* ou pou 6 mwan. Me pandan sa bann letan fodre ki ou al lo *labour market* e rod en *full-time employment*.

Me ki nou'n vwar? I annan lenstans wi baze lo sirkonstans nou'n *extend* zot pou en lot 6 mwan. Ki dapre *Act* nou ti anba preokipasyon Lalwa ki dir ek ou *ok* ou fer

1an. Me i annan bokou lenstans, kot bann resipyan in fer plis ki 1an Mr Speaker.

Menm 2an. Menm i annan ki'n la depi 2017 in sorti an 2021 ler in fermen. Akoz? Akoz zisteman parfwa se nou menm nou bann politisyen baze lo serten komanter ki ganny pase, ki nou pa'n oze pou nou dir ek nou pep ou bezwen *empower* ou lekor. Nou bezwen al laba lo *labour market*.

Nou ankor krwar poudir ki tou keksoz i tonm anba responsabilite Gouvernman. E la mon anvi lans en lapel avek sakenn nou isi dan sa Lasanble. Moman pou nou fer politik avek lemosyon dimoun, avek vant dimoun, in ler pou nou arete silvouple !

Annou konman bann dirizan donn lanmen *empower* sak dimoun dan nou *constituent*. Donk fer zot konpran poudir annan en lanplwa permanan e al lo *labour market* pran sa ki i annan *available* i pou ed ou konman sa endividi pou annan en lanplwa ki stab. Me pli enportan kontribye anver lekonomi.

E mon pa pou kapab koze, san ki mon fer resorti met en pe lanfaz petet lo sa ki mon koleg Onorab Clifford Andre in fer mansyonnen. Wi nou tou nou konnen, ki pou

annan group dimoun ki nou pou bezwen atrap zot lanmen.

E la Minis, mon anvi ou mazin osi dan - mon apresye ki ou'n dir ki e petet la pa tou ki koz lo la. Minis in fer sorti en pwen ki valab li. *Skill Development Programme*, in ganny revwar. Depi lontan i ti 15 a 30an koriz mwan si mon mal - Ozordi i ale ziska 60 *years old*.

So si i annan en dimoun, ki bezwen ganny *reskilled*, mon prezimen i ava pe ganny ankadre anba *Skill Development Programme*.

Me mon pou osi fer propozisyon, ki Minis pe regarde petet letan nou pe koz *single parents* - regard osi dan posibilite entrodwir *flexible employment*, an kolaborasyon avek bann anplwayer prive.

Petet sa i ava rezourd en pe sityasyon ki Onorab Andre in met devan nou bomaten. E sa ki mon konnen osi se ki anba sa program *URS* ti pe *cater* pou bann dimoun pe viv avek en dezabilite. Mon konnen i annan serten travay ki Departman Lanplwa in fer e pe fer.

E mon ti ava kontan Minis i fer mansyon dan son *summing-up*. Fodre pa ki nou kontinyen fer krwar avek Lepep Seselwa ki pwason i kapab mont pye dibwa.

Fodre pa ki nou kontinyen fer krwar avek

Seselwa ki Beau Vallon i baze Grand Anse. Fodre pa. Fodre ki nou konman bann politisyen, zis parey letan nou ti al lo teren pou al fer konpany, pou dir ek sa pep pou dir ek sa pep si ou vot pou LDS avyon Point Larue pou aret apoze.

MR SPEAKER

12 minit Onorab.

HON NADDY ZIALOR

Mersi Mr Speaker. Fodre pa ki nou kontinyen dir avek sa pep ki anba LDS nou pou mor lafen. Kontrer Minis fer mon ti ava kontan konnen si i annan okenn dimoun ki'n raport kot Lanplwa oubyen kot *welfare* ki dir ki pe mor lafen Minis.

Parske in ariv sa moman konman en pep - pou terminen Mr Speaker - in ariv sa moman konman en pep e konman bann Dirizan nou atrap lanmen kanmarad e fer nou pep annan en sans responsabilite pou ki vreman pei i bouz delavan. Mersi Mr Speaker.

(APPLAUSE)

MR SPEAKER

Mersi Onorab. Onorab Sophola.

HON NOLINE SOPHOLA

Mersi Mr Speaker. Bonzour Minis ek ou delegasyon e tou dimoun ki a lekout. Mr Speaker, mon krwar ki i enportan ki tou dimoun i konpran tre byen aköz ti annan en *Employment Relief Scheme*. Ki nou pli byen konpran koman URS.

Sa ti la byen depi 1995. Sa ti annan pour bi pou donn lanplwa bann zenn vilnerab laz 18an e plis ki ti pe depan lo *welfare*. Gouvernman ti anvi tir zot lo sa program *welfare*, me zot ti ganny *train* dan en domenn pou antre dan en lanplwa permanan e ganny en sonm larzan ki pa plis ki en saler debaz avek bi pou amelyor zot lavi.

Mr Speaker, i annan bokou koze lo URS. I annan dimoun ki ti krwar ki fodre amelyore. Me i annan ki ti totalman kont. En konsern ki'n sorti tre for sete labi. Mr Speaker, mon demande aköz ki nou pa ti get kot labi ti ete, pran aksyon avek sa group? Nou pa kapab pini tou dimoun aköz nou annan dimoun ki onnet e ki anvi travay la deor.

Mr Speaker, alors ozordi sa *Bill* in vin devan Lasanble pou ganny *repeal*. Minis in donn nou tou son rezon posib aköz ti nesaser. Mr Speaker, Minis koman en paran eski ou pran an kont ki pou arive avek nou bann zenn, osi byen nou bann adilt ki pa dan en

lanplwa? Ki fason ki zot pou viv? Ou pa krwar ki ou pe anvoy sa group vilnerab dan en move direksyon?

Sa move direksyon ki pou kout nou pei petet pli ser ki nou Gouvernman ti pe depanse avek sa group.

Mr Speaker, parfwa nou dir ki sa group pa oule travay. Eski sa i totalman vre? Kan menm group ki pa tonm dan group vilnerab pe lager pou ganny en lanplwa. Fodre pa ki nou kategoriz tou dimoun, aköz i touzour annan bann leksepsyon.

Mr Speaker, sak fwa ki Minis i vin dan Lasanble e koz lo lanplwa i kontan dir, “dimoun ki pe rod en lanplwa, loportinite i la.”

Mr Speaker, mon krwar ki sa fraz pou bezwen sanze. Aköz ki loportinite, ki swadizan i la i pa totalman la? Sa loportinite i atase avek bokou difikilte, ki posiblerman li konman Minis i pa konnen. Mon krwar ki i bezwen ganny revwar, aköz sa group deor pe rode, pe rod travay me zot pa gannnen.

Mr Speaker, fodre ki Minis i fer en levanter aköz ki dimoun pa antre dan lanplwa e non pa zis dir ki dimoun pa oule travay. Sa fraz i fatig mwan ler mon tann dir sa!

Mr Speaker, mon dir tou dimoun ki dan URS e tou bann ki pe rod en lanplwa, mwan

mon konnen ki savedir napa. Mon konnen ki savedir anvi antre dan en lanplwa. Mon konn zot soufrans, aköz sa i konversasyon ki mon fer preski toulezour avek pep Seselwa.

Mr Speaker, mon demann tou bann *job seekers*, bann ki pa’n swiv sesyon Lasanble ozordi pou fer li zot devwar, al ekoute ki Minis in dir, aköz ki URS i bezwen fermen.

Mr Speaker, mon anvi fortman dir ki *timing* pou tir URS pa bon. Aköz avek COVID-19 bokou dimoun in perdi zot lanplwa. I annan ki pe ganny lanmwatye saler. Alor, eski nou demande ki mannyer sa bann dimoun pe fer pou fer de bout zwenn?

Aköz nou pa ti met nou lenerzi dan rod fason pou fer desann pri komodite avan? Se sa ki pe afekte tou fanmir. Apre, *repeal URS* ti a swiv.

Mr Speaker, pou terminen, mon demann Minis pou dir pep Seselwa ki provizyon ki son Minister pou mete, pou ranplas sa program URS ki pe ganny *repeal*? Aköz dimoun vilnerab pou touzour annan dan lasosyete. Mersi Mr Speaker.

(APPLAUSE)

MR SPEAKER

Mersi Onorab. Onorab Uranie.

HON ROCKY URANIE

Mersi Mr Speaker. Bonzour Minis ek ou delegasyon. Bonzour tou koleg Onorab. Bonzour tou zabitan zil pros ki a lekout.

Mr Speaker, i annan en keksoz mon'n tande bomaten kot zot pe dir zot pe ferm tiyo. Me selman tiyo in ganny fermen zis pou en serten group dimoun. Par milye zot in met lazout, zot pe les delo devide pou en serten dimoun.

Mr Speaker, sa *Scheme* ti ganny entrodwi pou fasilite lanplwa tanporer pou bann group dimoun pli vilnerab dan sosyete, pou ede tir depandans lo *welfare*;- avek bi pou anmenn sanzman pozitiv dan lavi sa group dimoun.

Donn zot en meyer kalite lavi par donn zot en lanplwa tanporer an atandan ki Gouvernman atraver son bann striktir i rod lanplwa pli permanan, pou ofer sa bann dimoun.

Mr Speaker, la mon oule fer resorti ki zot osi sa bann dimoun zot pa anvi reste permanan lo sa *Scheme URS*. Alors zot osi zot sey fer bann demars personnel pou rod sa lankadrem lanplwa pli permanan, dan plas esper zis

Gouvernman parey serten group dimoun i krwar.

Sa i montre Mr Speaker, ki bokou sa bann dimoun i konpran ki *URS* ti en tranzisyon pou pli tar ganny en lanplwa permanan. Me parkont Mr Speaker, i annan dimoun ki ti vwar li bezwen reste pli bokou letan lo sa *Scheme* pou plizyer rezon.

Pou sit enn de, parey mank kalifikasyon, mank *skill*. E osi bann rezon, se ki zot annan bann rikord ki pa tro dezirab, tel parey en *ex-prizonnyen*, ki malgre i bezwen en dezyenm sans i vwar li tre difisil e parfwa menm enposib pou ganny en lanplwa permanan.

Alors, Mr Speaker, Gouvernman avan ti vwar li oblize revwar sa bann ka koumsa e tenir zot lo sa *Scheme* ziske ler en lanplwa pli konvenab i vin dan laporte, dan plas les zot ale, e vwar sa bann dimoun al komet bann krim pou zot ganny en sirvi.

Mr Speaker, i annan ki dir oubyen ki krwar ki Gouvernman avan ti pe soutir sa bann dimoun. Me mwan mon dir non, selman plito aköz nou Gouvernman ti annan en leker pou tou fanmir, sirtou bann ki pli vilnerab, ki pe ganny difikilte lanplwa. Pou fer sir ki zot annan en saler pou anmenn lakaz lafen

dimwan pou sonny zot lekor e zot fanmir.

I annan dimoun ordiner e biznesmenn ki vwar *URS* koman en labi lo resours Gouvernman, akòz serten zot, zot lavi i eze, zot dan staz lavi tre konfortab ki Gouvernman 43an in kree pou zot.

Menm group dimoun ki an faver frem *URS*, zot pa oule ede anploy sa bann dimoun pou ed Gouvernman redwir lakantite, me plito zot dir Seselwa pa oule travay e lager pou *GOP*.

Mr Speaker, sityasyon ekonomik ki *COVID-19* ki Sesel i ladan in ogmant sityasyon mank lanplwa e lanplwa ki annan, sirtou lo mon zil toultan pe demann kalifikasyon e *skill*. E zot pa oule vreman ofer *training*.

E la mon ti a demann Minis ki la pou sey kontakte Minis Ledikasyon, gete si i pa kapab ofer bann *short courses* lo La Digue avek nou bann dimoun, kekfw a kapab ed zot ganny en kalifikasyon pou ed zot antre dan lanplwa.

Mr Speaker, nou'n vwar osi bokou *redundancy* ganny fer. Ferm *URS* pa'n ede. Kontrer la se le moman pou Gouvernman dizour montre lanmour e konpasyon pou nou bann pti dimoun la ater, e kit sa *Scheme*, ed sa bann dimoun. Si i annan labi, retir labi Mr Speaker.

Mr Speaker, i annan dimoun ki pe *struggle* la ater. Zot pe trakase, zot pe rode kot pou ganny en zournen pou anmenn en dipen lakaz. Alors Mr Speaker, dan plas sa Gouvernman ferm *URS* zis pou anmas larzan, pou fer plezir serten group dimoun e zot kalite lanbisyon, ti ava bon si zot ti seryezman get nou bann pti dimoun. Pa zis ser larzan, les dimoun soufer epi dir nou'n fer profi.

Mr Speaker, mwan mon'n vwar ki mannyer *URS* ti ed zabitan e ki difikilte zot ladan la akòz sityasyon mank lanplwa oubyen pa pe ganny lanplwa pou plizyer rezon. Zot menm zot sa bann dimoun zot pa ni konnen akòz.

La ler nou pe koze, La Digue ozordi kot *LWMA* i annan en *meeting* ki pe al ganny fer pou fer *redundancy*, dapre sa *text* ki mon'n resevwar atraver en travayer laba ki dan dout son lanplwa.

Nou'n vwar osi travayer *STC* La Digue ki pe ganny redi gos, drwat akòz Gouvernman pa ankor kapab pran en desizyon, si i pou ferm *STC* oubyen si i annan plan re met li dan en nouvo *building* kot enn zot gran aktivis *LDS*.

Me mwan, mon pa konnen si Minister Lanplwa i okouran, pou antre ladan e get ki pe arive. Gouvernman i bezwen pran li en desizyon e

asire ki sa bann dimoun pou ganny en lanplwa ki *suit* zot sityasyon lavi dan plas konplik zot lavi. Pou sa bann dimoun kapab travay e soutenir zot fanmir.

Mwan Mr Speaker, mon pa an faver *repeal*, me plito rod fason aranz li pou fer li mars pli byen. Akoz apre tou zot ti ganny elekte pou fer pli byen, me ziska la dimoun pe kriy lasasen. Mon bann koleg Digwa, Zil Pros e tou Seselwa ki pe pas dan sa bann difikilte, nou pou lager kont sa sistenm liberal malgre serten Onorab pa kontan nou dir.

I vre zot pa ti konnen ki si sa sistenm liberal, me zot pe konpran. Mr Speaker, lo sa kote latab nou pou fer Sesel pour tou son zanfani. Avek sa de pti mo Mr Speaker, mon termin mon lentervansyon. Mersi.

(APPLAUSE)

MR SPEAKER

Mersi. Mersi Onorab. Mon a pas lo Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Bonzour Minis avek ou lekip. Mr Speaker, permet mwan avan ki mon komans mon diskour pou mwan swet Madanm Teresa Sylvain ki reste Souvenir, La Misère, ki'n

ganny 100an ozordi, me aköz Lasanble, mon pa'n kapab dan son prezans kot son selebrasyon pe ganny fer.

Me mon anvi dir li, ki rezon ki mon la se li enn parmi bann dimoun ki'n ankouraz mwan pou kapab fer ladiferans dan lavi mon bann frer e ser Seselwa.

(APPLAUSE)

HON WAVEN WILLIAM

En Speaker, Lafrik ki mon pa mazin son non ti dir, "*Because you are, I am.*" E mon dir ou mersi.

Mr Speaker, mon annan gran plezir ozordi pou mwan partisip dan sa evolisyon devlopman ki Sesel in anbark lo la depi sanzman Gouvernman. Pou mwan partisip dan retir sa Prozedlwa lo URS, pou permet nou kapab fer pli byen, ki mon krwar i reponn lapel ki Onorab Uranie fek dir taler.

Ler nou pe *repeal* Mr Speaker, nou pe al fer egzakteman sa. Aköz sa ki ti la oparavan, en lepok ti bon, me parey son *Leader* i kontan dir, nou bezwen evolve e fer progre. E nou anvi asir e donn sekirite e garanti sa benefis maksimonm sa travayer ki ti lo URS letan i al dan en lanplwa permanan.

Mr Speaker, la i pa vedir ki nou pe kondann tou keksoz

ki'n ganny fer poudir pa bon. Me zot bezwen rekonnet e aksepte Mr Speaker, ki letan ou annan en nouvo Gouvernman ki vin dan dirizans i vin avek son prop lide. Pa neseserman ki i bezwen sivre menm pratik ki ou ti fer dan lepase, e krwar poudir i ti byen dan sa lespri progresif e devlopman kontinyel, Mr Speaker.

Mr Speaker, mon'n ganny sans koz ek enn de sa bann travayer ki ti lo *URS* dan distrik ki mon'n ganny elekte.

Mr Speaker, mon konpran zot, mon konpran ki sa moman zot pa ti kapab demann kestyon. Me ti napa bokou swa ki ti ganny mete devan zot. Zot ti bezwen aksepte. Me letan nou pe koz met zonm o sant devlopman, me selman ou pa montre li ki bor i komanse, ki bor i kapab arive Mr Speaker.

Me atraver *repeal* sa *Bill* ki travay in deza komanse. Minis plizyer fwa in vin dan Lasanble in vin reponn kestyon pou demontre kote sa dimoun ti ete, ki fason son benefis ti pou ganny afekte a lonterm e kote i anvi i ale.

Mr Speaker, lo sa *Scheme* mon'n ganny sans fer *meeting* avek plizyer. Zot dir mwan poudir en lepok zot ti lo kontra, en lepok kot zot pa konnen lekel ki zot sef. Menm larzan pa'n ganny peye,

meeting ki ti pou ganny fer avan eleksyon pou garanti vot, pa ti ganny fer.

Me parey mon'n dir, mon konpran zot. Me mon kontan Mr Speaker, ki ozordi sirtou dan sa mwan Mr Speaker, ankor dan 5 zour, Mr Speaker nou pou selebre sa zour. E ler ou regarde i annan en bann sanzman fondamantal atraver bann *Bill* pe vin devan Lasanble e Mosyon ki pe vin devan Lasanble Mr Speaker, pou demontre poudir nou annan en direksyon e nou konnen ki bor nou pe ale, san ki nou pe montre poudir ; -enn, nou pa konpran poudir ti annan en letap, la nou dan en nouvo letap.

E sa nouvo letap i an lye avek sirkonstans ki nou ladan e direksyon ki nou anvi ale. Oparavan nou ti *procrastinate*, Mr Speaker. Nou pa'n anvi pran bann desizyon brav aköz nou ti per pangar nou ava ofans bann voter e nou pa pou ganny eleksyon. E sa mon pe reponn a largiman ki Onorab Aglae in met devan.

Wi, be nou pa'n dir tou. Me selman sanzman dan konteks ki nou ete ozordi in bezwen ganny fer.

Mr Speaker, mon kontan ozordi. Mon kontan aköz letan mon get bann sif ki Minis i nonmen letan in fer son prezantasyon, i demontre

avek pep Seselwa ki dan Sesel ozordi i annan lanplwa.

Me Minis, mon pou demann ou avek ou lekip, zot bezwen pli proaktiv e mon pou dir dan sanzman osi nou bezwen annan en pe plis konpasyon osi tou.

Mr Speaker, atraver sa, letan serten pe dir ki ou konnen '78 mon ti fer sa, nou ti fer sa, nou en progresis. Me si ou en progresis, ozordi nou pe koz sanzman. E sanzman se progre !

(APPLAUSE)

HON WAVEN WILLIAM

E mwan mon a demande Mr Speaker, dan sa menm lepok zot ti pe enplimant sa azanda sanzman. Mr Speaker, aköz zot ti aboli sa liv kolez ki apel *Animal Farm* Mr Speaker? Mr Speaker, ou konn byen sa liv ou.

Sa liv ti pe ouver lizye Seselwa Mr Speaker? E sa liv Mr Speaker, ki Onorab pa'n mansyonnen, dan sa menm lepok ti ganny aboli, aköz sa ti donn sans sitwayen Seselwa ki ti pe lekol pou kapab annan en lespri pli ouver.

Mr Speaker, mon konn en ta keksoz ki'n pase, mon pa pou al dan sa deba. Me ler ou lespri i ouver Mr Speaker, i annan bokou leksperyans ek legzanp ki mon kapab donn

ou, me Mr Speaker i pa deba ozordi.

Me ki ganny fer, zot met ou dekote aköz ou pa les zot kontrol ou lespri Mr Speaker. Ou vin en *free thinker* e letan ou en *free thinker* Mr Speaker, zot pa dakor avek sa.

Mr Speaker, avan mon terminen aköz bokou in ganny dir, mon ti a kontan met sa detrwa pwen devan Minis. Minis mon'n koz lo konpasyon letan pe fer sanzman. Mon pou demann ou Minister pou angaze ladan aköz wi, nou bezwen fer sanzman nou bezwen aplik bann mezir.

Me mon santi ki a la baz bokou travay, bokou leksperyans, bokou bann keksoz ki pa arive ou santi li a la baz, e mon ti a kontan ki zot angaze avek bann Lotorite Distrik.

Minis mon pou dir ou, mon pa tro kontan serten bann lapros ouswa aköz mon'n santi in mank konsiltasyon. I annan serten ka ki mon santi zot ti'n devret regard en pe pli lwen pou *deal* avek Minister, atraver ou Mr Speaker.

Mr Speaker, osi mon ti a kontan demann Minis, Minis ou nouvo dan sa Minister e mwan mon anvi demann ou, si ou pa ankor fer li, petet konsider. Ou bezwen fer en lodit ou bann travayer dan ou Minister.

Rezon ki mon pe dir sa, aköz dan ansyen Gouvernman in annan bokou bann pratik ki nou pa'n dakor avek.

Ki ou vwar poudir i annan serten bann keksoz ki'n arive, kot bann investiser etranze ozordi zot in kapab pas atraver sa bann trou, e kot nou bann travayer Seselwa in ganny defavorize. Mon pou sit enn de legzanp Mr Speaker.

Mr Speaker, lontan nou ti annan bann Human Resources etranze Mr Speaker. Epi dan sa evolisyon pou devlopman nou vwar poudir investiser i donn en bon *package Human Resources* Seselwa. Me ki arive? Serten i ganny servi pou anpes lezot Seselwa avans pli devan, me donn lespas investiser pou li fer antre plis travayer etranze ki petet en Seselwa ti kapab benefisye.

Mr Speaker, lot pwèn ki mon anvi met devan se ki ou Minister, mon anvi konnen Minis, nou vwar poudir bann dimoun pe desann kot Lorloz, zot pe dir "tir sa *boufon State House !*" Mr Speaker, be eski zot vreman realize, sa bann dimoun ki'n ekrir lo sa bann plakar pou dir "tir boufon *State House*," si pa pe fer zot *boufon!*

(laughter)

HON WAVEN WILLIAM

Akoz Mr Speaker, mon pou dir sa. Ou ganny peye R500 pou ou desann. Sa bann dimoun ki pe anmenn kot Lorloz, zot pa'n zanmen demontre avek ou poudir zot in al fer en *meeting* avek Minis Lanplwa.

Zot in al fer en *meeting* kot tel lotel laba pou sey aranz ou kondisyon. Me selman ki zot in dir ou, vwar la R500, desan fer ta bel e lo plakar ou met "tir boufon *State House !*" Me lekel ki pli boufon, letan ou'n desann pou R500. Ou'n kit ou louvraz Sanmdi bomaten pou ou vin pli gran boufon! Mr Speaker ...

(laughter)

MR SPEAKER

12 minit Onorab.

HON WAVEN WILLIAM

Yes, mon pe al terminen Mr Speaker.

MR SPEAKER

Mersi.

HON WAVEN WILLIAM

Mr Speaker, mon dernyen pwèn se Minis. Minis Ledikasyon in vini isi dan Lasanble, sa semenn e lenformasyon ki in donn nou semenn pase vizavi nou problem, bagaz nou bann

zenn dan lekol ki sorti pou al dan domenn travay. Zot nivo ledikasyon i ba Mr Speaker, be lekel ki responsab pou sa? *LDS* ouswa sa 43an?

Minis mon ava demann ou, akòz sa pou nou koman Manm Lasanble nou konsernen avek sa, akòz nou pe vwar poudir dan lavenir si nou pa amelyor sa bann fason fer, bann bon kordinasyon, *UniSey*, Minister Ledikasyon, Minister Lanplwa avek bann lezot Lazans ankor Minister Speaker, Sesel nou pou dan en gro problem.

Nou pou toultan konplent poudir travayer etranze pe antre. E Minis silvouple, atraver ou Mr Speaker, annou revwar osi bann *training*, bann *needs*.

Akòz sa ki pou fer nou *back-up* sa plan devlopman. Avek sa de pti mo Mr Speaker, parey mon'n dir avek gran plezir Mr Speaker, mon pa regrete akòz mon osi mon en progresis. Mon pa en progresis ki'n kaye. Mon en progresis ki anvi avanse, mon pou vot pou *repeal* sa *Bill*. Mersi.

(APPLAUSE)

MR SPEAKER

Mersi Onorab. Onorab Cosgrow.

HON WALLACE COSGROW

Mr Speaker, mon'n ekoute, mon pa'n *disturb* e mon'n esper mon tour. Mon'n ekout ou Mr Speaker. Bonzour Mr Speaker, Minis, *PS* e en bonzour spesyal Madanm Dookley.

Pou bann ki pa konnen, sa madanm i sa enn ki travay dir, depi re lentrodiksyon *URS* li ek son tim in fer bokou. Zot in travay dir avek bokou defi, me avek bokou sikse osi. Madanm Dookley avek ou tim, nou remersye ou pou sa travay dir ki zot in fer depi ki *URS* ti ganny re entrodwir an 2017.

(APPLAUSE)

HON WALLACE COSGROW

Mr Speaker, bomaten Onorab Gabriel in dir, in fer sorti en *statement*, in dir poudir lot kote latab zot annan en bann tandans liberal. E ler in dir sa, sa ki'n dir ou sa ki'n fer sa *statement* in sot anler e zot in komans eksplike.

Mr Speaker, akòz nou dir zot annan en tandans liberal? Ozordi ler nou ekout retorik pandan sa dernyen 30an ki zot in kontinyen donn Seselwa, donn Seselwa.

Ler nou ekout langaz ki ti ganny donner pandan kanpanny eleksyon, si ou ekout byen zanmen ou ti a dir sa bann boug i koumsa. E se sa rezon ki ou vwar ozordi zot koz labous plen, zot dir

Seselwa in vot pou zot lan pase. Seselwa ti anvi sa.

Onorab Loze in dir taler. Seselwa ti anvi ganny tire lo *URS*, ti anvi perdi son lanplwa? Seselwa ti anvi pey bis R12? Seselwa ti anvi tou sa bann zafer ki zot pe fer ozordi? E ler nou analiz tousala, nou vwar zot tandans liberal kot zot pe ale.

E nou lo sa kot latab nou pou kontinyen dir, zot bann tandans i liberal, liberal brit e sa ki zot pe fer ozordi pe afekte pep Seselwa, Seselwa ordiner dan sa pei Sesel !

Mr Speaker, enn bann sikse ouswa bann rezon aköz Sesel nou'n nobou a longer ditan gard nou *unemployment rate* tre ba, ase ba, set aköz zefor ki'n ganny fer, ki'n ganny mete lo bann diferan *Employment Scheme*.

In bann tranzisyon, in annan bann *re skilling*, in annan bann *training* e in annan osi *Unemployment Relief Scheme*.

In annan bann zefor ki'n ganny mete a diferan lenstans, dan diferan faz devlopman endividi. Kot i annan serten letan ki sa endividi in bezwen ganny petet *necessary training* pou li antre dan en lanplwa formel, ouswa in bezwen ganny *re skill* pou antre dan en lanplwa formel. Ouswa in bezwen ganny *relief*,

soutenir en pti pe letan, ziska ler i vwar en lanplwa formel.

Tousala sete bann *Scheme* ki nou'n nobou fer *over the years* pou kapab fer sir ki dimoun i ariv dan sa destinasyon ki parey Onorab Norbert Loizeau, atraver ou Mr Speaker, in dir.

Mr Speaker, be si i annan en dimoun anndan petet ki konn byen sa, se petet menm *PS Baker* ki'n dan lanplwa mon krwar preski dir tou sa bon karyer travay. Mr Baker, i konn byen ki mannyer *URS* ti komanse, sa ki ti presed li se *FES*.

Mon pou fer en pti pe parkour, en pti pe parey Minis in fer dan son lentrodiksyon aköz mon krwar i enportan nou *remind* dimoun, nou *remind* pep Seselwa bann byenfe ki'n arive dan sa pei, pandan tou sa 43an ki nou'n la. Wi nou pou koz lo 43an aköz pou nou sa 43an. Zot ava koz lo zot lan apre pli tar.

(laughter)

HON WALLACE COSGROW

Mr Speaker, *URS* ti komanse parey Minis in dir an '95, me I ti presed li par *FES*, *Full Employment Scheme*. Ti ganny re aranze, ti vin *URS*. E la mon pe mazin kantite dimoun. *PS* ou pou konnen, ou konn bokou plis ki mwan.

Mon pe mazin kantite dimoun. Mon ganny en *text* taler en dimoun en O Zofisye, *Senior Management* dan Minister Later ek Lakaz ti pas lo *URS*. Mon konn bokou dimoun ki'n fer sekreter ozordi zot dan *admin position*. Bann dimoun ki'n dan *accounting position*.

Diferan pozisyon *across* Gouvernman e osi sekter prive, *in over the years* pas lo sa *Scheme* ki nou apel *URS* ek bann lezot *Scheme* ki Gouvernman a sa letan ti kree.

Zot pa'n vin asiz lo la zot, ti en pon pou zot sorti en bor pou zot kapab ariv en lot bor. En lot bor. I annan en kantite, kantite dimoun ozordi ki pe ekoute *or* pou ekoute tanto, zot pou kapab idantifye zot lekor avek sa. Zot pa ti pares zot, zot pa ti asiz zis lo *welfare* zot.

Petet in ariv en sityasyon dan zot lavi kot zot pa'n kapab *attain* sa ki zot ti anvi, parey nou la anndan nou'n kapab fer li.

Zot in ganny en loportinite, sa loportinite in fer ki ozordi kot zot ete ozordi zot in kapab *build* zot karyer, *build* zot fitir baze lo sa bann loportinite ki'n gannyen donnen. Parey mon'n dir Mr Speaker, bokou ler nou koz lo *URS* nou asosye li avek dimoun parse. Dimoun ki pe abize. I annan ki dir nou pa

sipoze vin mor lo *Scheme*. Sipoze annan en destinasyon.

Mon dakor ek sa Mr Speaker. Me get sa, eski ler nou pe koz *URS*, dimoun ki lo *URS*. Nou pe koz en *fix* pti group dimoun ki ler nou fini nou plas li dan lanplwa, nou tir li. I ale i al dan en lanplwa permanan, apre i pa egziste ankore dimoun. Pa egziste ankore dimoun ki pa *unemployed*. Pa egziste ankore dimoun ki pou bezwen en *relief*.

Si nou destinasyon ti dan Lenn. Nou pas par *Dubai*, ler nou fini ariv dan Lenn nou *call* Sesel nou dir ferm Erport, vann avyon. Sa group ki la in fini arive li. Sa bann lot ki pou vini pli tar la, zot demerd zot. Rod en bato, rod en kartyemaron, naze si ou anvi ariv dan Lenn ou.

Mr Speaker, be sa kalite latitid la. Sa kalite latitid, senmen sa ki pe fer nou vwar, demarke zot tandans liberal. Zot tandans ki zot napa en leker pou Seselwa! Zot napa en leker pou Seselwa!

(APPLAUSE)

HON WALLACE COSGROW

Scheme i la, *Scheme* i la pou ed dimoun ki dan bezwen. E nou konnen dimoun ki dan bezwen i pa fini li. I pa fini, nou bezwen touzour annan en keksoz pou anpar nou frer ek

nou ser ki dan bezwen. I pa pou abize, i pa pou fer konmsi manner i anvi, me selman kot i bezwen ganny ede nou bezwen trouv en fason pou nou kapab ed li Mr Speaker.

I anmenn mwan lo mon lot bout Mr Speaker. Minis in dir boner ki i annan an se moman (9025) si mon pa tronpe, *job seekers*. Sorry 925, eskiz mwan. Eskiz mwan, 925. Pardon, pardon. I byen ou'n koriz mwan Onorab.

Mr Speaker, be prezan ki arive ek sa group dimoun ki Minis in koz lo la. I annan bann dan sa 925 ki kapab li. I sorti i al fer son debrouy, i fer son CV, i pas en pti kou anba *Ocean Gate House*, i vin kot en zofisye.

Laba anvil i annan en zofisye, mon pa pou nonmen selman. I vin kot en zofisye, i dir ek sa zofisye poudir mon bezwen en pti led. Zofisye i *call* laba, sa dimoun i antre dan lanplwa li. *Ok?*

Me i annan sa bann Minis, sa bann ki'n reabilite apre ki zot sorti dan prizon. Sa bann ki bann *recovering addicts*. Bann ki'n perdi zot lanplwa aköz sityasyon COVID. Bann ki koman i pou al kot an anplwayer i pa *readily marketable* li. Kote nou anmas li? Ler sa *Scheme* in ale la. Kote nou anmas li,

kote nou met li ou *relief* li en pe.

Akoz welfer i dir ou pa vini la, i pa pe donn ou. I dir pa vini, i dir ou al rod sepa *statement* labank, al rod isi, al rod laba avan ou nobou ganny en pti morso. Ki manner nou *relieve* sa bann dimoun?

Si napa en *Scheme*, napa en keksoz ki anmas zot e prepar zot pou antre dan en lanplwa formel?

Mon dir tousala Minis aköz nou pou annan dimoun dan lefitir, i pa fini sa. 1995 sa zafer i la. I annan ki'n antre dan lanplwa, i annan petet ki'n mor. I nouvo ki'n vini, i annan lo. E i pou annan ankor. Petet zot pa pou la, pou annan en lot group dimoun ki la. Me pou annan ankor dimoun.

Minis, dir nou petet dan ou *summing-up* - dir nou ki manner zot pou *tackle* sa sityasyon. Kwa ki zot pou met devan? Kwa ki zot pou fer pou fer sir ki demen bann dimoun ki vwar zot dan en sityasyon san en lanplwa.

Bann dimoun ki vwar zot dan en sityasyon pete ant lanplwa. I pa neserman i pares, parey mon kontan dir zot. I arive ki i ant lanplwa. Ki manner nou anmas sa bann dimoun? Sa ki enportan, ki manner nou anmas sa bann dimoun.

Mr Speaker, pou mwan *summing-up*, pou mwan, mon krwar ki *repeal* Lalwa ozordi, annefe zot in fini aboli *URS* depi Fevriye zot. Ozordi i en formalite kot nou pe *repeal* Lawal. Mon krwar sa desizyon pou *repeal* Lalwa sirtou ozordi kot lekonomi, i pa enn ki a la oter parey ti ete lafen 2019. Mon krwar i en move desizyon. Sirtou dan labsans en alternativ, mon krwar i en move desizyon.

En dimoun ti dir bomaten, dan pe reflesir lo la. Konmsi si i annan en lera dan ou lakwizin, ou rod en pwazon.

MR SPEAKER

12 minit Onorab. Ou kapab *wrap-up*....

HON WALLACE COSGROW

Mon pe al *wrap-up*.

Ou rod en pwazon swa ou rod en ratyer ou anmas li. Ou pa bril ou lakaz aköz ou konnen i annan en pti lera pe taye.

So rod solisyon. Pa aboli *Scheme*, pa fer Lalwa zis aköz nou krwar i annan labi ouswa dimoun, dimoun pe tro konplent. *Ok?*

So, Mr Speaker, pou *wrap-up* mon ti a kontan ki Minis i reflesir lo la, rod en alternativ. Mwan mon pa dakor ek sa zafer e mon pe dir kler mon pa dakor. Mon pou vot kont sa mon. Mon pa

dakor, aköz mon krwar nou Seselwa i devret annan en fason pou kapab ganny asiste.

Avek sa Mr Speaker, mon dir ou mersi.

(APPLAUSE)

MR SPEAKER

Mersi Onorab. Nou a pas lo Onorab Vidot.

HON AUDREY VIDOT

Mersi Mr Speaker. Bonzour tou Koleg Onorab, Minis ek ou delegasyon. En bonzour spesyal zabitan Roche Caiman.

Mr Speaker, enn bann gran sikse Sesel in kreasyon lanplwa pou nou pep. Nou rekonnet sepandan ki malgre tou loportinite travay ki annan, pa tou nou pep ki pe travay.

Gouvernman *United Seychelles* in etabli bann mekaniz e program parey *My First Job, Centre for Skills Development e Unemployment Relief Scheme, (URS)*. Avek loptik pou kontinyen devlop bann *Scheme* travay spesifik e eksplor nouvo fason pou nou amelyor standar lavi bann travayer, e siport sa kiltir e met an pratik dwa e responsabilite travay.

Si ozordi en kantite Seselwa in progrese dan zot lavi, atraver ou Mr Speaker. Wi Onorab Loizeau. Se

zisteman gras a sa bann *Scheme* ki ou'n koz lo la pli boner. Si i annan ki pa'n servi li byen, sa i reste lo zot konsyans pou zot anmennen.

Mr Speaker, Gouvernman *LDS* ti promet met larzan dan pos Seselwa depi Septanm 2016, ler zot ti dir "fer li zot Lasanble." Apre laviktwar Oktob 2020, zot komans koup larzan *FA4JR*, koup *welfare* sa bann manman san okenn notifikasyon. Koup *part rental* avek *URS*.

Wi, Onorab Zialor, atraver ou Mr Speaker. Sa bann manman ki pe travay, me zot in ganny dir. Menm si zot pe debout for pou sey fer de bout zwenn, zot pti R500 ki zot ti pou gannye ki soutenir zot ek zot zanf an ganny koupe.

Dapre zot dan *LDS* tou sa bann ki ti pe resevwar sa bann lasistans ti annan labi e pas en sel mesaz, menm si zot ti merit ganny sa lasistans. Dan bal kafe napa triyaz pou *LDS* aköz zot ki pe *rule border*.

Dan plas ranforsi striktir e mekanizm an plas pou idantifye kot i annan labi avan zis koupe, zot koup tou! Apre dir avek sa bann paran re fer laplikasyon. Zot pe ganny difikilte pou ganny led menm si zot re *apply*. Zot pa pe gannye.

Zot gran lesplikasyon se pou ranpli sa kof vid ki

Gouverner Labank Santral lontan in dir pa'n zanmen egziste. Selman zot vwar larzan pou zot monte desann lo zil, zot pa annakor kapab. Zot ankor pe *enjoy* zot *retreat*, kree pozisyon pou zot dalon ek zot bann aktivis apre dir ki zot pe fer li byen, pli byen ki *United Seychelles*.

Sa bann pwen ki mon pe refer sorti Mr Speaker, i santiman sa bann Manm ki'n plenny zot sor dan sa bann vizit ki nou'n fer, ki mwan mon'n fer dan mon distrik. *LDS* kontan, pa kontan se sa bann paran ki santi. Pa nou ki pe vin bat latet Seselwa.

Mr Speaker, etranze ankor pe antre par grap dan pei pou travay. Seselwa ankor pe monte desann pe rod louvraz. Apre *LDS* i zeneraliz Seselwa, i dir zot pa oule travay.

Selman ler *URS* ti pe siport en group Seselwa dan en lanplwa zot pa'n enteres pou revwar sa sonm dan plas zis pran en desizyon pou zis koupe.

Yer mon koleg lo lot kote latab, Onorab Labonte atraver ou Mr Speaker, ti sey eksplik lenterpretasyon *US* ler nou dir kabri dan sak. Me les mon a fer mon koleg konnen, ler *LDS* i servi en manman 34an pou koz lo son *PPB* Oktob 2020.

E zis apre 5mwan apre ki in donn lanmen met zot Gouvernman la zot aboli *URS*, kot i vwar li bezwen aksyon son figir dan en program *SBC* pou plenn son sor.

E lavey lan zot manda zot vin devan Lasanble pou retir sa Lalwa. Se sa ki apel kabri dan sak.

Ler sa zenn manman, Petra, i ti gro vant 3mwan pou li kapab anploye dan en louvraz, pe seye. I ti anba program *URS*. In sey rod louvraz li, me ki ti arive avek li?

3mwan ler zot, zot in deside pou zot koup *URS*, Petra li i san en lanplwa ek en gro vant 3mwan. Son premye zanfan. Rod landrwa kote i kapab ganny en louvraz ek en vant, i ganny son zanfan 7mwan.

In fer en nouvo laplikasyon, i pa'n kalifye, in *appeal* i pa'n kalifye. Ankor pli tar ankor i sey ankor, i pa kalifye menm. Sanmenm sa ki zot dir zot get dan *welfare* dimoun.

Mr Speaker, *LDS* pe dir ki sa *Scheme* ti annan labi. Me nou dan *United Seychelles*, nou dir ki sa *Scheme* ti en loportinite pou kree lanplwa pou Seselwa. E ankouraz pratik travay dir. Ki si annan labi, pe enport ki Gouvernman ki la, se sa Gouvernman ki pe diriz sa *Scheme* i bezwen

kapab idantifye defayans e adres problem. Me non pa zis vini, koupe.

Wi, dan en kriz ekonomik. Me aköz zot pa ti revwar sa sonm ki sa *Scheme* ti ofer? Zot pran desizyon pou koupe, selman zot kontinyen donn bal. Bal avek zot dalon, pou fer zot dalon kontan.

Atraver ou Mr Speaker, Onorab Georges in vin dir nou ki Seselwa in vot pou sanzman. Onorab avek tou respe ki mon annan. Seselwa in vot pou sanzman pou met larzan dan zot pos !

Seselwa ti vot pou sanzman pou sa retorik faver ek koripsyon ki zot ti sante dan zorey Seselwa. *LDS* depi Septanm 2016 ziska Oktob 2020. E Seselwa pe vwar ki *LDS* in vann zot en rikord reye koman kabri dan sak.

Zot vin koz koripsyon, labi ek Seselwa, selman zot menm *LDS* ki vot lo Lalwa pou anpes zot bann *spouse*, zot mari, fanm e zanfan pou pa deklar zot byen.

Ler Seselwa pe demann latransparans, zot fer tou le kontrè e kas konfyans ki zot bann voter ti donn zot Oktob 2020.

Mr Speaker, mon oule asir *LDS* ki nou dan *United Seychelles* nou respekté desizyon e swa Seselwa ki zot ti fer le 20 Oktob. E mon oule osi asir *LDS* ki nou dan *United*

Seychelles nou pou kontinyen fer nou travay e koz pou tou Seselwa. Enkli tou sa bann *LDS* ki'n fini komans regret e pe anvoy 'dan pa nonmen.'

Mon koleg Onorab Georges Mr Speaker atraver ou, in koz lo labi *carer*. Labi dan *carer*. Kot i annan labi, se responsabilite Gouvernman ki la ozordi pou amelyor kot ti annan defayans. Me sa ki Onorab pa dir, se bann *carer* pe ganny enformen ki zot bezwen zis fer louvraz *carer* pou zot viv, aköz si zot fer en lot louvraz zot pou perdi zot plas *carer*.

Me Mr Speaker, ek sa lavi ozordi. Gouvernman *LDS* i espekte dimoun siport son lekor, son fanmir e son lakour avek en lapey *carer*? Zot in amande pou bann kapab fer lezot louvraz, selman pou *carer* zot dir li fer zis *carer*. Sanmenm sa sanzman ki Seselwa in vot pou tir larzan dan zot pos?

Konstitisyon in koz lo dwa travay. Sa *carer* in fini son zournen parey kondisyon *ASP*, me apre son 3er ler i fini travay li be si i anvi al debrouye, aköz ki zot bezwen anpes li ale al debrouye pou met manze lo latib son fanmir?

Wi, zot ki la ki *pe rule border*, nou lontan nou'n konpran sa nou. Me sa bann ki ti met zot la, la, se sa bann

ki pa ti tro, tro fini *digest sa rule border*. Kontinyen sakouy pye, manz tou fri zot menm. E Seselwa li ki ti vot pou zot, zot pou sanzman i a kontinyen ser sa sang.

E wi Onorab Naidu, Seselwa pou ekoute. Seselwa la deor, i pe ekout li e i pe note aköz Seselwa i konnen lekel ki'n *fail* zot depi Oktob 2020!

Mon poz sa la Mr Speaker. Mersi.

(APPLAUSE)

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, sa *Bill* ki devan nou ozordi pou *repeal Unemployment Relief Scheme* i enn ki vremen, vremen enportan. Annefe ler mon asize la mon ekout bann entervenans lo lot kote latib, enn ler mon panse poudir aköz ozordi zot dan Lopozisyon, zot krwar aköz zot dan Lopozisyon zot bezwen opoz tou keksoz.

Enn ler zot opoz nenport kwa *for the sake of* opoze, menm si Gouvernman i met bann keksoz rezonnab devan zot, zot kontinyen opoze menm.

Mr Speaker, ler mon'n ekout Onorab Wallace pli boner en keksoz i kler. Se ki i enportan pou zot konpran e ankadre keksoz dan son konteks ki i ete. Enn ler zot oubliye bann keksoz ki'n ariv dan lefase.

Unemployment Relief Scheme Act ti vin an fors le 3 Avril an 1995. Sa *Scheme* in la, in kontinyen ziska an 2008 ler Sesel ti antre lo en program reform ekonomik. Me zisteman Onorab Wallace in dir poudir la ki nou dan en kriz ekonomik, nou pa merit pe koup en program parey *URS*.

Me se annefe an 2008 se egzakteman sa ki ti arive. An 2008 ler nou antre dan program reform ekonomik, *URS* ti al *dormant*.

URS ti ganny koupe e *URS* ti ganny re entrodwir an Novanm 2017. E mwan mon kestyon pou Onorab Wallace Cosgrow, se ki mannyer zot in anmas sa bann dimoun dan sa dernyen 10an ?

Mr Speaker, mon a dir ou en keksoz.

(Interruption)

MR SPEAKER

Silvouple Onorab, annou ekoute.

(Interruption)

MR SPEAKER

Ale Order please! Order! Wi.

HON WAVEL WOODCOCK

Mr Speaker, lavey eleksyon avan nou antre an 2018, zot in re entrodwir sa program *URS*. Lavey eleksyon Mr Speaker. Fodre ou konpran, aköz *US* koumsa i marse. Sak fwa eleksyon pe aprobe la, tiyo i ouver.

Mon a dir ou ki ti arive ape ki *URS* ti re ouver an Novanm 2017. Annou pa bliye, zot akiz nou ki nou liberal, wi nou liberal.

Me annou pa bliye ki *US* i en parti sosyalis, kominis, marksis. E zot annan en sistenm - Sa sistenm marksis, kominis, sosyalis la i en sistenm manipilasyon e kontrol !

Zot kontan ler Lepep Seselwa i depan lo zot. E senmen sa bokou fwa ler eleksyon, apre osi i annan bann *Scheme* osi ki zot entrodwi pou sey atrap nou bann dimoun e met zot dan en serzwen.

Annefe mon a akont ou ki'n arive Mr Speaker, zisteman avan eleksyon anba program *URS*, bann aktivis *US* ti pe pas partou pe dir, ou vwar i annan program *URS* la, ou kapab antre lo la, ou a ganny ou en pti larzan. Tousala in pase.

Mr Speaker, sa programm *URS* i en programm tanporer. I pa en programm kot ou met en dimoun, i dan louveraz permanan. Bokou sa bann dimoun ki lo sa programm zot travay *half day*, zot travay *part time* e zot ti pe ganny zot en *allowance* R7056. E *URS* i sipoze zis pou 6 a 12 mwan.

Me i kler e nou, nou konn sa. In ganny fer resorti dan lepase ki i annan bann dimoun ki'n lo programm *URS* pou bokou lannen, depi ler in ouver zot in kontinyen lo sa programm. Zanmen zot o ganny met dan lanplwa permanan.

Zot pa ti pe ganny en saler apropiye, zot pa ti anploye. E aköz zot ti lo *URS* bokou zot in vin kot nou, bann *MNAs* dan lepase, zot in fer sorti poudir i difisil pou zot ganny en *loan*, aköz zot pa pe ganny en saler, zot pe ganny en *allowance*.

E bann ki ti lo sa programm zot pa ti pe kontribye dan *Pension Fund*, zot pa ti pe kontribye *towards progresiv income tax*, aköz zot pa ti dan en lanplwa.

E Mr Speaker, ozordi apre ki nou Gouvernman in reouver nou pei, ozordi i annan en kantite louveraz Sesel.

E i sagrinan ler mon tann en Manm la ozordi lo lot kote latab i vin devan Lasanble

i dir koumsa, ki Minis i bezwen fer resansman en resers aköz dimoun pa oule antre dan lanplwa, menm si i annan travay, menm si i annan louveraz deor!

Pa bezwen fer okenn resers pou sa. Si annan lanplwa, dimoun pa oule antre dan lanplwa savedir sa dimoun pa serye, i pa responsab. Ozordi pei in ouver, louveraz i annan en kantite, 900 *job seekers* i annan, plis ki 2mil louveraz Sesel.

Eski Minis i bezwen fer resansman aköz dimoun pa oule antre dan lanplwa kan lanplwa i annan? I nou responsabilite. Nou bezwen pran nou responsabilite. Si louveraz i annan, be annou travay!

Mr Speaker, ozordi louveraz i ganny pibliye partou. I ganny pibliye dan zournal, *online*, lo *Job Plus*, lo *SBC*. Louvraz i an abondans. Tou le semenn e sak *MNA* dan sa Lasanble Nasyonal i ganny en lalis bann lanplwa ki annan tou le semenn.

E sa lalis i sorti kot *Senior Information and Communication Officer* kot Biro Lanplwa.

Tou le semenn nou ganny lalis. Nou'n fer ganny lalis pou le 19 ziska le 25 Oktob, louveraz Mahe, Praslin, La Digue. Lo lot kote latab

eski zot in sey fer zefor pou ede plas enn de zot bann *constituents* dan louvraz?

Mwan mon'n fer Mr Speaker. Mwan Onorab Woodcock, plizyer in vin kot mwan, mon'n ekrir CV pou zot. Mon'n pran kontak ek *Employment*, mon'n anvoy zot laba. Mon'n swiv avek Madanm Vicky Aglae ki travay Biro Lanplwa Praslin, mon'n toultan an kontak avek li pou ede plas nou bann dimoun dan distrik, dan lanplwa.

Ki zot in fer zot? Kontinyen kit dimoun anba kontrol, anba manipilasyon en sistenm kominis, marksis, sosyalis?

(Interruption)

HON WAVEL WOODCOCK

Mr Speaker, sa Gouvernman tou sa ki zot fer - Sa Gouvernman lepase sete pou kontrol, manipil nou dimoun. Zot pa'n anvi nou dimoun i epanouir, depan lo zot prop lekor. E zot ankor anvi retourn dan en sistenm kot zot manipil nou dimoun.

Zot pe koz ozordi Gouvernman pe get. Lekel ki ti dir "zot ti tro get zot?" Pa Onorab Simon Gill ki ti dir, regre Albert Rene. Le *fame* Prezidan Rene ki Onorab Loze in koz lo la. "Nou ti tro get nou!"

Zot in tro get zot ziska ler Lepep Seselwa in zet sa pye dibwa ki Onorab Aglae in koz lo la. Ki'n pouri ozordi, in zet dan bannann le 25 Oktob 2020!

(APPLAUSE)

HON WAVEL WOODCOCK

E Lepep seselwa pa oule sa sistenm sosyalis, kominis, marksis ki'n la pou pandan sa dernyen 43an.

Departman *Employment* i annan en gran rol pou zwe ozordi e zot pe zwe sa rol. Pou met Seselwa dan lanplwa. Pou ed avek *training* avek *re skilling*. E mon felisit zot bann travayer *Employment* pou sa zefor ki zot pe fer. Mon remersi zot aköz mon konnen i pa fasil. Sirtou apre ki nou fek sorti dan en sityasyon.

Nou pa ankor vremen sorti 100poursan, me nou'n pas dan en kriz ekonomik kot ti annan *redundancies*. Kot bokou dimoun ti ganny met deor. Kot bokou dimoun ti ganny fer *redundant*, kot ti annan bann ki biznes in fermen, bann ki biznes ti bezwen *downsize*. I annan bann ki biznes pa ti kapab *afford* en *full* saler.

Me granmersi desizyon ki sa Gouvernman in pran pou reouver nou Erport kan lot kote zot ti pe opoze. Granmersi desizyon

Gouvernman pou fer en fason ki ozordi Lepep Seselwa nou tou nou kapab ganny akse avek vaksen.

Granmersi travay ki Minis pou *Foreign Affairs*, granmersi travay ki bann Minis in fer pou negosye avek bann pei deor ki ozordi nou pei in reouver e sa bann pei zot in reouver zot lafrontyer, pou zot sitwayen kapab vin Sesel pou nou lekonmi kapab refer.

E zot ki zot ti fer Mr Speaker? Ki lot kote latib ti fer? Zot ti opoze re ouvertir Erport. Zot ti *boycott* program vaksinasyon. Zot pa ti oule al pran vaksen apre pli tar zot ti pase an misouk, misouk par deryer. Olye donn lankourazman sa pep Seselwa pou vin devan pou pran vaksen pou pei kapab *recover*.

La ozordi lepep, pei. nou pei pe *recover*, touris pe vini, bann *airline* pe tournen. Larzan pe retourn dan nou lekonmi. E ki zot fer? zot zis konplent, gele. Desann ek *board*, donn bann dimoun R500 pou desann avek *board* obor Lorloz. En bann i dir i lafen - pli gro ki en bef, pe debout obor Lorloz!

(laughter)

HON WAVEL WOODCOCK

Mr Speaker, annou donn en lape dan sa pei, annou serye dan sa pei! Sa bann dimoun.

Mr Speaker, sa parti ki apel *United Seychelles* la, sa parti zanmen in annan lentere lepep Seselwa a ker. Si zot ti annan lentere lepep Seselwa a ker zanmen zot ti pou pran 46 morso bout later, zanmen zot Minis ti pou 51 bout later, zanmen zot ti pou met milyon dan pos bann Irlande aletranze.

Si zot ti vreman serye zot ti pou viktimiz nou frer ek nou ser – ‘ek nou, pa ek nou.’ Pini nou bann frer ek ser Mr Speaker! La ozordi zot annan lodasite pou dir nou napa lentere pep Seselwa a ker? Kan si nou pa ti’n vin met en lord dan *FA4JR* ki ozordi Minis in bezwen met enn lakonpannyen Ankour ki’n ganny sepaman konbyen milyon ki zot pa ti merite. Mr Speaker, Zanyve sa lannen ti pou napa saler pou pey travayer dan Gouvernman.

Akoz kantmenm zot pa kontan nou servi sa term kof vid. Wi nou ti annan en kof vid, aköz larzan pa ti pe antre dan sa pei. Zot in depans larzan mal apropo, *FA4JR*. Avan Lasanble i dizourd nou ti donn zot plis ki R1milyon ankor, ler nou ti retournen napa larzan nou bezwen re aprouv en Bidze siplemanter ankor pou donn zot aköz zot in gaspiy larzan ki’n met nou pei dan en trou san fon! Ki

ozordi sa Gouvernman pe sey tire.

E nou pe tire. Gouvernman *LDS* pe retire sa pei dan sa trou e sa pei pou sorti dans trou. Ki ozordi ti annan en letan ti napa lanplwa Sesel. Mr Speaker, ozordi i annan travay dan sa pei pou tou Seselwa ! Telman i annan louveraz, nou pa pe ganny Seselwa kot bann biznes pe dir Gouvernman pran konsiderasyon, ed nou.

Re donn nou *GOP* pou fer vini travayer etranze aköz louveraz i annan. Napa ase Seselwa ouswa Seselwa pa pe travay. Selman travay i annan Mr Speaker. Travay i annan en Departman ki la pou ede met nou dimoun dan travay.

Akoz nou pou bezwen en program *URS* kot en dimoun i vin travay zis lanmwatye zournen i ganny li en pti *allowance*, kan i ganny li en lanplwa, i kapab ganny en louveraz ki i ganny en saler ki kapab ed son fanmir, ki kapab ed zon zanfán? Ki kapab pey son *tax* e kontribye dan lekonomi nou pei.

Mr Speaker, pou konklir mon konnen napa bokou letan -

MR SPEAKER

Mersi. Ou vwar mwan pe get ler?

HON WAVEL WOODCOCK

Onorab Aglae in fer referans avek en pye dibwa ki si en pye dibwa pa aport fri ou pa koupe, me la realite se ki sa pye dibwa ki *SPUP/SPPF/PL/US* in plante, ti'n fini pouri ! E Lepep Seselwa ti koupe e zot in zet sa pye dibwa dan bannann. Le 25 Oktob 2021, Lepep Seselwa ti koupe, lepep Seselwa ti koupe sa pye dibwa e zot in zet sa pye dibwa anba.

E ozordi Gouvernman *LDS*, nou Gouvernman pe plant en nouvo pye dibwa ki pou aport fri pou tou Seselwa. Pa zis pou enn de bann endividi parey zot dan sa Gouvernman avan in benefisye ki ozordi zot bann miltimilyonner. Mersi bokou Mr Speaker.

(APPLAUSE)

MR SPEAKER

Mersi. Mersi Onorab. Onorab Gill.

HON CHURCHILL GILL

Mersi Mr Speaker. Bonn apre midi Minis ek ou delegasyon. Bonn apre midi tou Manm e tou dimoun ki a lekout.

Minis mon'n ekout ou leksplikasyon pou *Bill* ki ou'n anmenn devan nou e mon'n osi note ki ou'n fer resorti ki i annan 4527 *job* e i annan 925 dimoun ki pa dan lanplwa.

Kestyon avek sa se si annan sa kantite *job*, akòz sa 925 pa ankor ganny *job*? E sa i montre nou ki nenport ki fason nou pou get li, nenport ki fason ki nou pou pouse pou tou Seselwa antre dan lanplwa, i annan en keksoz ki nou pa pe pran an kont dan sa *equation*, se ki sa bann lanplwa ki i annan, zot *warrant* ki sa bann dimoun ki pou ganny aksepte dan sa bann lanplwa, zot pou annan serten kalifikasyon.

Aprezan, sa 925 dimoun ki pa kapab - Me selman ou'n osi fer nou konpran ki i annan petet i kalifye, me selman zot pa kontan sa *job*, sa osi mon'n note. Me selman natirelman i pa pou tou sa 925.

E sa i montre nou ki menm si i annan sa kantite *job*, nou problem se pa nou annan en kantite *job*, nou annan dimoun ki pa oule al travay. Se i annan nou dimoun osi ki pa kalifye pou sa bann travay.

E la, lanmenm ler ki sa size *URS* i antre dan zwe. Akòz bann dimoun ki kalifye, menm si zot pa oule en travay, me selman zot pa pou kapab vini, vin *apply* pou *URS* akòz zot kalifye e i annan bann travay pou zot kalifikasyon.

E sa i montre nou ki *URS* li menm, mon'n tann diferan lenportasyon depi bomaten, me selman mwan mon pou

stick avek lesansyel. Dan tou pei nou tou nou konnen i annan ledikasyon ki met laporte tou son pei.

Me selman menm si i annan sa, toultan i annan en serten *segment* dan sa bann pei, ki zot pou en rezon ou en lot zot napa sa bann abilite akademik pou zot kapab prosper parey lezot. Toultan i annan sa pti group.

E dan bann pei diferan ladministrasyon, zot desid ki fason zot pou *deale* sa group. I annan ki met striktir, i annan ki deside pa fer naryen lo la. Me selman i kler ki ler sa bann group dimoun napa striktir pou zot, i annan bann lezot pratik ki devlope ki anti-sosyal e ki koz en problem dan sosyete.

Alors i enportan ki nou bezwen deside, be pou sa group dimoun, si nou krwar poudir sa *URS* i devret ganny *repeal*, alors dezyenm kestyon ki vini. Me ki nou pou fer aprezan pou sa group dimoun ki zot, zot pa tonm ni dan sa group ki annan lanplwa *available* pou zot e an menm tan zot napa sa abilite akademik pou zot kapab vremen al fer en deboury lo zot menm?

Mon krwar sa ki petet Minis ou devret petet eksplor sa *area*, petet donn nou dan ou bann plan. Si kekfw sa *area* ou pe touse e sa i ava ede

pou bann dimoun ki tonm dan sa *segment*, zot a kapab konnen kwa ki annan pou zot.

I normal ki bann Prozedlwa i ganny revwar a plizyer lenstans, akòz parey nou konnen, Prozedlwa i ganny fer dan en letan e anmezir letan i ale keksoz i evolye, nou bezwen adapte nou. Mon pa vwar okenn naryen la avek sa.

Me selman rezondet ki sa bann Prozedlwa ti ganny fer, sa nou pa devret *lose sight* akòz si zot la ti bezwen annan en rezon. Me selman ki manner ti pe ganny zere, sa mon dakor nou bezwen revwar. Petet son rezondet ti bon me selman fason ki in ganny zere, nou bezwen re vizite.

Vwar si amelyorasyon pa demande lo la, dekouraz bann pratik ki an deor son rezondet. An menm tan si nou vwar i pa devret la, nou devret osi annan en alternativ ki nou met a laporte sa bann dimoun ki tonm dan sa group.

Mon krwar si nou annan en lapros dan sa fason, tou dimoun pou santi i pa'n ganny kit deryer e bann ki dan sa group zot a kapab realize poudir menm si napa *URS*, me selman nou annan en landrwa ki nou kapab ale.

Oubyen en striktir kot menm si nou'n koz bokou lo *reskilling*, mon asir ou i annan

bokou. Depi ler nou pe koz lo *reskilling* 2020, mon asir ou i annan bann dimoun ki pa'n ganny sans pou zot pas dan sa bann program.

E petet nou bezwen re vizite. Eski fason ki program pe ganny fer i ape tous tou dimoun, oubyen petet i la. I annan dimoun ki li i pa enterese pou vin ladan. Konmsi nou bezwen get en pe ki pe pase dan tou sa bann stratezi ki ti ganny mete an *late* 2020 ziska la, pou nou kapab reziste nou lekor kot nou neseler. Mersi Mr Speaker.

(APPLAUSE)

MR SPEAKER

Mersi Onorab. Onorab Romain. Wi.

HON SEBASTIEN PILLAY

Zis en pti pwen klarifikasyon anba *Order* 8. Mon'n vwar poudir par egzant lo nou kote ou'n fer a de repriz 2 Manm koz konsektivman enn deryer lot. Be lo lot kote ou'n swiv en lapros toultan ki zot swiv en Manm *US*.

MR SPEAKER

Wi.

HON SEBASTIEN PILLAY

Eski i annan okenn rezon spesifik.

MR SPEAKER

Yes, i annan en rezon, akòz i annan en pe plis Manm lo ou kote ki lo mon lalis. Donk mon'n *move* par 2 pou gard la mezir egal e la i reste zis ou avek Onorab Henrie pou koze.

HON SEBASTIEN PILLAY

Ok, tre byen. Savedir apre Onorab Romain, Onorab Henrie ki pou koze?

MR SPEAKER

Non, ou a koz avan apre Onorab Henrie i a koze.

(APPLAUSE)

(laughter)

(Interruption)

MR SPEAKER

Mersi. Lord *please*, silvouple. Lord *please*! Onorab Romain ou annan laparol.

HON SEBASTIEN PILLAY

Mon ti pe zis. Mr Speaker, mon pa'n ganny sans klarifye.

(Interruption)

HON SEBASTIEN PILLAY

Aret *disturb* silvouple, mon pe demann Speaker en keston pou klarifye!

(Interruption)

MR SPEAKER

Order silvouple! Ok, Onorab Arissol pa antre ladan. Pa antre ladan! Onorab pa antre ladan silvouple!

HON SEBASTIEN PILLAY

Ase, *relax*. Pa fodre ki ou ankoler.

(Interruption) (laughter)

MR SPEAKER

Onorab, Onorab Romain ou annan laparol.

HON SEBASTIEN PILLAY

Mr Speaker, mon pa ankore ganny mon klarifikasyon, mon pe espere.

MR SPEAKER

Onorab Pillay mon'n eksplik ou,

HON SEBASTIEN PILLAY

Wi ok ...

MR SPEAKER

mon annan 3 Manm pou koze la. Onorab Romain, ou, apre Onorab Henrie.

HON SEBASTIEN PILLAY

Non, non. Mon pe zis klarifye si prosedir ki ou pe fer se ki ler i annan plis Manm lo en kote ou pe fer bann Manm koz par de ?

MR SPEAKER

Wi.

HON SEBASTIEN PILLAY

Si sa i prosedir ki ou pe pran?

MR SPEAKER

Wi.

HON SEBASTIEN PILLAY

Mersi.

MR SPEAKER

Mersi. Onorab Romain.

HON GEORGE ROMAIN

Mersi Mr Speaker. A lafen defen. Bonzour Minis avek ou delegasyon. Mr Speaker, bokou, bokou in ganny dir lo sa *Bill* e i annan bann ki menm mon pa krwar zot ti vreman konnen ki zot pe koz lo la.

Mr Speaker, mersi pou donn mwan parol pou dir enn de mo lo sa *Bill*. Sa Lalwa ki ti an plas ti la prensipalman pou plas bann dimoun ki ti napa en lanplwa akoz swa zot ti'n kit lekol boner e pa ti'n fini zot ledikasyon formel oubyen zot ti pe ganny difikilte pou ganny en travay.

Sa *Scheme* ti plas sa bann dimoun dan bann diferan landrwa travay tel ki dan Ladministrasyon Distrik, lekol, Lopital, eksetera.

Me sa ki nou'n vwar Mr Speaker, se ki sa ansyen Gouvernman i pa'n byen zer sa *Scheme*, akoz ti annan en labi dan son lenplimantasyon. Bokou dimoun lo sa *Scheme* in

reste lo la pou en kantite letan, me parkont sa *Scheme* i ti la pou ed sa ban dimoun pou aprann en metye e pli tar i kapab servi son *skills* ki in gannnen pou rod en lanplwa permanan, parey Minis in refer resorti dan son lentervansyon bomaten.

URS ti sipoze tanporer e dimoun pa ti devret lo la pou plizyer lannen. Annou mazin en ki kondisyon lanplwa pou en dimoun lo *URS* i pa parey pou enn ki annan en louvraz permanan. E alors sa bann dimoun ti pe perdi lo sa *Scheme*, an vi ki zot ti pe reste lo la pou tro bokou letan.

Mr Speaker, nou kapab vwar lannen pase ki ti en lannen eleksyon, kot nou ti vwar bokou dimoun ti antre lo sa *Scheme* e nou tou nou konnen ki sa ti en zouti pou *US* servi pou sey ganny sa eleksyon. E la parey mon'n tann mon koleg Onorab Sathya in dir bomaten kot St. Louis ti annan 6, me parkont Anse Etoile ti annan 7.

E la Mr Speaker, atraver ou mon ti a kontan demann Minis ler i fer son *summing-up* si i ti kapab donn nou en sif, kantite dimoun ki ti antre lo sa *Scheme URS* pandan lannen eleksyon.

Ozordi Mr Speaker, nou fyer poudir ki bokou sa bann dimoun in servi lezot mwayen tel ki anrezistre ek biro

lanplwa ek bann *job centers* e menm fer bann lantrennman pou zot kapab ganny plis *skills* pou antre lo en louvraz permanan. Bokou zot in fini ganny anplwaye e pe travay avek bann meyer kondisyon ozordi.

E la mon ti a kontan profite pou felisit sa bann dimoun, espesyalman sa bann zenn ki'n determinen pou al devan pou rod en travay formel.

Mr Speaker, nou konnen ki ozordi dan nou pei nou annan bokou loportinite travay pou nou bann zenn e mon lans en lapel avek bann Lorganizasyon Travay pou met konfyans e donn loportinite sa bann zenn. Koumsa zot a kapab demontre zot abilite e ganny sa leksperyans ki nesesser pou zot kapab kontinyen *perform* pli byen dan zot travay.

Alors pou terminen Mr Speaker, mon pou donn mon sipor total pou *repeal* sa *Bill*. Mersi Mr Speaker.

(APPLAUSE)

MR SPEAKER

Mersi Onorab. Mon vwar in ariv midi edmi, me selman vi ki mon annan 2 Manm pou koze e apre Minis i bezwen fer son *summing-up*, mon mazin en pou napa gran deba lo *amendments*, aköz i annan

tre pe e i en *Bill* zis en laliny mon krwar.

Donk, nou a regarde. Nou a pran sa 2 Manm e si posib nou a termin sa *Bill* ozordi dan sa sesyon. Onorab Pillay ou annan laparol.

HON SEBASTIEN PILLAY

Mersi Mr Speaker. Bonn apre midi Mr Speaker, e bonn apre midi tou dimoun ki a lekout.

Mon'n ekout deba atantivman lo *repeal* sa Lalwa e plizyer keksoz ki'n ganny dir e mon annan gran plezir osi pou aport mon kontribisyon lo sa deba.

Premyerman mon oule reasir lepep Sesel ki mon pa en marksis, mon pa en kominis. Mon reste *from* en perspektiv filozofik, en sosyalis aköz mon krwar mon devret toultan kapab fer sa ki plis e sa ki pli byen pou mwan fer aköz mon reste dan en kominote ki pli pti, en kominote ki depan lo nou tou e ki nou tou nou kapab ed kanmarad.

Mon osi oule fer kler ki mon pa en miltimilyoner e ki dan mon karyer ki mon'n travay mon'n toultan sey mon mye pou fer tou ed lamazorite dimoun ki mon'n travay avek.

E dan sa konteks koman en ansenyan mon'n osi sey asire ki tou bann etidyan ki pas dan mon lanmen i en zour kapab fer en karyer. E dayer mon vwar i annan ozordi ki'n

ariv dan Lasanble Nasyonal e dan lezot landrwa osi.

Mr Speaker, mon krwar i enportan pou nou etabli byen konteks deba e pou nou aret servi bann retorik ek bann largiman ki popilis, ler nou ti pe fer kanpanny. Me ki ozordi i vin pli serye akòz ou en Gouvernman e ou en Gouvernman avek en mazorite absolli dan Lasanble Nasyonal.

Premyerman Mr Speaker, i lalang pou dir i annan dimoun ki'n fer 10an lo URS. I lalang pou dir tou senpleman akòz senpleman URS ti ganny aboli an 2008, i ti re pran an 2017 e la mazorite dimoun in ganny plase dan sa peryod 2017 a 2020 ki fer 3an.

So, ler Onorab Romain i vin dir nou en kantite letan, Onorab Romain ki en bon etidyan Matematik, fer en pti pe plis resers e vin koz laverite ek Lasanble. E mon en pti pe dezapwente avek li, akòz i pa sa kalite Onorab. Me *anyway* in tonm dan sa ki son bann koleg pe fer e in sey swiv parey.

Dezyenmman Mr Speaker, wi koman en Lopozisyon nou pou opoze kot i neser pou opoze, zis parey nou'n opoze ek sanzman Lalwa dan *Declaration of Asset* pou fer ki *spouse e family* pros pa deklar zot *assets*! I normal pou nou opoz sa. I normal osi

pou nou opoze ki pri bis i monte. I normal osi pou nou opoze ki lakantite etranze ki pe antre dan pei, pe ganny *GOP* pou travay dan plizyer landrwa.

I normal osi pou nou opoze ler Gouvernman i vin dir ek nou koumsa poudir li ek son bann *Leaders* i kapab pran *Pfizer* e ler ou pou demann li, i pou dir ou la ou pe al en pe tro lwen. Me mwan avek lezot dimoun nou a pran *Covishield* ek *Sinopharm*.

Annou pa koz lo misouk ler i ariv lo vaksen. Akòz misouk sa ki'n pran vaksen i anler *State House*! Pa la. E dezyenmmen si nou bezwen benny dan sansib tou le swar, mon kapab ed ou. I enportan sa.

Ou konnen akòz ou pa kapab vin dan Lasanble e lo en Lalwa ki serye - rezon akòz ou'n dir sa, e vwar la kot ou'n vwar diferans. *Night and day difference* ant Onorab Churchill Gill, ki'n pran sa Lalwa e get li *from* son loptik e Onorab Wavel Woodcock atraver ou Mr Speaker. E mon *asire* zabitan Grand Anse Praslin i bezwen dezapwente.

Ou ti kapab vin fer en prezantasyon e sirtou par lefe ki Praslin in ganny tape par *COVID*. Lakantite dimoun ki pe rod lanplwa Praslin, malgre tou dimoun pe sey ede pou donn zot lanplwa, me sa ki

Onorab Gill in dir, lekel ki ed sa bann dimoun ki dan milye?

Ki kalite *Scheme* ou annan an plas. Sete sa lesansyel sa *repeal* ozordi. Se sa lesansyel nou pozisyon. E mon pa krwar poudir senserman, petet Minis i a koriz mwan si mon mal. Senserman mon pa krwar Minis li menm i krwar i devret pe *repeal URS* ozordi. Pa a sa moman.

Me sa i en desizyon ki'n ganny pran par Prezidan Larepiblik e i paret mwan ozordi dan *LDS*, zour Prezidan i leve e i deside pou li pran en desizyon, zis i pran en desizyon. *Attorney Zeneral* i ekrir, "*according to the decision of the President,*" ki i ti dir tel zour *and let's repeal the law*.

Onorab Zialor, mon pa ti tan ou pe koz lo Lalwa Konsey Dezabilite ler ti pe ganny *repeal*. Mwan mon ti dan *COVID*, ou pa ti la. Me mon ti espekte ki ler ou retournen ou fer en pe tapaz, aköz ou ti dan menm *meeting* avek mwan, parmi sa bann dimoun dezabilite ki ti pe koz lo la? Onorab!

Mr Speaker, mon espekte poudir nou *stand by* nou bann konviksyon.

(Interruption)

MR SPEAKER

Onorab, Onorab aret en pti moman. Silvouple mon pe demann zot annou fini sa deba annord parey nou'n fer tou bomaten.

Mon pa tro konnen ki pwen ki Onorab Pillay ti pe fer, selman mon pa'n tann li pe fer okenn pwen kontrè. Onorab silvouple kontinyen avek ou largiman kalman e evite lev lavwa tro bokou. Mersi.

HON SEBASTIEN PILLAY

Mersi Mr Speaker. Mr Speaker, mwan i pa mon lentansyon pou fer okenn pwen kontrè or maltret or denigre okenn dimoun, aköz sa i pa mon stil koze;- i pa mon stil travay e i pa keksoz ki mon fer.

Mon ava koz lo sa ki pou'n dir *from* perspektiv sa ki ou'n dir e largiman ki ou pe avanse. E largiman ki zot, zot pe avanse i se ki nou, nou en parti ki zis krwar dan fer dimoun reste sibalte son prop konsyans e ki i ava depan lo nou pou lavi.

Be mon annan zis pou get la anndan, sa kantite dimoun ki sa sistenm in ede kree ki ozordi in arive *MNA*, ki ozordi in ariv Dokter, ki ozordi in ariv menm enzenyer, menm Minis Finans ki ozordi in ariv Minis Finans, ki'n ganny letid atraver sa 43an ki Gouvernman in o pouvwar, pou montre zot poudir nou

pozisyon lo *repeal* sa Lalwa napa naryen pou fer avek fer dimoun sibalte son prop konsyans.

Nou pozisyon lo *repeal* sa Lalwa i annan pou fer avek en senp keksoz, e sa se lekel ki anpar sa bann dimoun ki dan sa konteks, sa sityasyon ki zot ladan ozordi, prenon kont sityasyon ekonomik ki nou'n fek pas ladan. Se sa nou pozisyon.

E si Departman Lanplwa napa en alternativ, *then why repeal the law?* Akoz ler mon ti demann Minis sa PNQ ki mon ti demann li o komansman lannen e sa ti le 31 premye mwan lannen, si mon pa tronpe.

Mon ti anmenn sa PNQ e Minis ti vin reponn mwan dan Lasanble Nasyonal. Merkrete li 3 Fevriye sa Verbatim ti ganny ekrire e sa letan Minis ti pe eksplik nou lo lakantite dimoun sorti lo URS ki ti sipoze pe ganny plase dan lanplwa.

E bokou zot ti pe tap latab. Me larealite i se ki sityasyon pa'n sanz oubyen amelyor par gran kantite. Zot pa tap latab ankor? Ki mannyer zot kapab pe tap latab en zour zis aköz pou zot prouv en pwen politik?

Mon largiman sa zour sete sa, eski Minis pou Lanplwa i kapab donn detay lo sa apepre 1800 dimoun ki lo

sa program? Konbyen ki madanm/msye, kote zot ete, si dan sekter prive oubyen dan Gouvernman?

Eski in annan okenn evalyasyon lenpak sosyoekonomik avan ki sa desizyon in ganny pran? Ki pou arive avek sa apepre 1800 dimoun, e ki garanti ou pe donn nou Lasanble ki sa bann dimoun, oubyen bann ki depan lo zot pa pou al dormi vant vid apartir Mars sa lannen?

Zot ti tap latab, sa ti zot pozisyon. Me malerezman nou, nou'n mentenir nou pozisyon. E ozordi par egzanp sa bann dimoun ki'n trouv zot dan sa problem, ler i al kot ASP e vwar la mon largiman Mr Speaker, sa bann dimoun i bezwen swiv en prosedir difisil kot ASP. Ki mon asire menm zot koman MNA zot in rankontre e ki zot pe demann zot lekor ki mannyer sa bann dimoun pou *come out of it*.

In annan kot mwan mon'n ganny difikilte avek Departman Lanplwa vizaviz serten dimoun. E mon'n tann Onorab William koz lo la. E la kot mon konfize, dan largiman Onorab William, si ou pe siport sa *repeal from* sa perspektiv, me ou largiman ki ou pe servi vizaviz difikilte ki ou bann dimoun pe gannnen i pa *match!*

Petet *then* ou osi ou pe santi poudir *repeal* sa Lalwa i pa neseserman the *right step* ki bezwen ganny fer *now*. A sa moman la. Akoz ou largiman sete sa ki ou'n avanse. Mon'n not ou bann pwen ki ou'n dir.

Mon pa pou al dan ou bann lezot largiman politik. Mwan sertennman mon pa'n zanmen fer ou pas par lafnet parey lezot pe dir. So, mon pa konnen ki kote sa i sorti.

En lot keksoz ankor ki enteresan dan tou sa bann largiman ki'n ganny avanse ozordi bomaten. Nou'n koz lo destinasyon en dimoun. Me i pa korek Onorab Loizeau pou ou dir poudir nou'n fer dimoun reste pou lavi lo URS. Si URS in pou 3an Onorab, ou'n fer en bon politik bomaten, *very convincing*. Me selman ler mon ekout ou mon'n konekte sa ki ou'n dir, mon realize poudir be Onorab in tap nou ek en kart.

Pa kapab depi 2017 ziska 2020 dimoun in tou son lavi. Me sa dimoun in viv 3an. Nou annan en gran group dimoun ki viv pou 3an dan nou pei.

Sa bann doker, be napa doker ki travay La Retraite. Ou konpran ? Onorab ou'n fer en bon politik. Ou'n fer en bon politik ou. Ou vwar? Ou'n fer en bon politik. Ou dir ou'n zwenn sa boug La Retraite ou pe koz ek li. *Ok*, la mon konpran ou.

MR SPEAKER

Onorab ou pa dan deba la.

HON SEBASTIEN PILLAY

Ou konnen Mr Speaker. Mr Speaker, sa i en keksoz ki enteresan se ki, sa ki nou'n tandé ozordi se ki nou'n tann Gouvernman vin fer en zistifikasyon aköz zot pe sipòrt *repeal* sa Lalwa, par maltret nou lo sa kote latab, pou tou sa ki nou'n fer pandan sa bann dernyen lannen.

Onorab Cosgrow in dir en keksoz, in repet sa ki nou ti dir yer. Wi, nou pou *own* sa 43an. En *mistake* ki ladministrasyon avan ti pe fer se sa lafason *apologetic* ki nou ti pe get sa 43an, sa per ki nou ti pe get sa 43an in ler pou nou arete sa.

Aküz pandan sa 43an nou'n fer en kantite keksoz, sa ki byen e sa ki mal. E si Onorab Naidu in nobou dir nou, atraver ou Mr Speaker, ki in plas 50 dimoun. Fotespere zot ankor dan sa bann lanplwa sa 50 dimoun. Zot kapab donn nou serten levidans pli tar lo la. 50 Seselwa.

Aküz i enportan serten keksoz ki nou dir dan Lasanble kot nou met li an perspektiv Mr Speaker. Nou met li an perspektiv, aköz fodre nou aret fer Seselwa krwar ki nou, ki dan Lopozisyon, ki dan

Gouvernman e zot ki dan
Gouvernman zot dan
Lopozisyon.

Pa le ka, se zot ki dan
Gouvernman. So, si zot in
vwar labi, kot nou bezwen fer
pli byen. Be eski fer pli byen
ki nou, se retir Lalwa. Zis
repeal Lalwa partou, *left, right*
and center san demande ki
konteks sa bann *repeal* pe
ganny fer.

E mwan en kestyon mon
ti a kontan demann mon lekor,
dan tou sa bann *repeal* i
annan en devwar
konstitisyonnel ki
Ombudsman i sipoze annan.
Eski *Ombudsman* pe ganny
enformen lo sa bann *repeal*?

Akoz kontrerman avek
konmela, letan
ladministrasyon ava ti la,
Ombudsman ti annan en
kantite keksoz pou li dir.
Ozordi i trankil. Lo tou size i
trankil! I napa naryen pou li
dir! Bann lenstitisyon Leta in
trankil.

Menm *Human Rights*
Commission ozordi, (mon a
ganny korize), mon tande pe
work from home. I mean come
on, kot nou pe ale?

Sa, mannyer mon pe
koze i pa en marksis, kominis
sa! Ok? I en koze fransizm. E
mwan mon ti a kontan *remind*
zot e mon ti a kontan enplor
zot, avan nou pran desizyon
final lo sa Lalwa annou swazir

pou mazin tou sa bann
dimoun ki pe vin kot nou.

Akoz mwan ler mon pe
koze la, pou annan menm zot
siporter ki reste Au Cap, ki
reste Mont Buxton. Ok, i
annan ki pe *text* ki pe dir
mwan poudir be nou'n arete,
nou pe espere, nou'n al rode
en lanplwa.

Nou ganny dir poudir be
i pa posib pou ganny sa
louvraz. Oubyen nou ale, i dir
nou vini landmen. Me apre i
dir nou louvraz in fini ganny
donnen pou en lot dimoun.

(Off-Mic)

HON SEBASTIEN PILLAY

Mon a *forward* kot ou en pti
moman, aköz i paret mwan ou
nepli konnen kote ou *MNA*
prezan!

(Interruption)

MR SPEAKER

Silvouple, aret bann
enteripsyon. Mon anvi fini ek
sa deba.

HON SEBASTIEN PILLAY

Mr Speaker, sak fwa zot
enteronp mwan, mon pou
arete, mon pou kontinyen?

MR SPEAKER

Wi, Onorab Pillay ou'n depase
12 minit. Mon'n donn en pe
leeway aköz lenteripsyon. Me

selman mazin pou al ver en konklizyon. Mersi.

HON SEBASTIEN PILLAY

Wi, be si zot kontinyen enteronp mwan Mr Speaker, mon pou bezwen kontinyen.

MR SPEAKER

Mersi Onorab.

HON SEBASTIEN PILLAY

Thank you. So, mwan mon krwar ki fodre zot realiz en keksoz. Zot in fer en promes ek Lepep Seselwa ki keksoz pou bokou pli byen apre ki zot ganny elekte.

Zot in vann lepep Seselwa en sitasyon kot nou pei i sipoze pei ki pli *worse* dan lemonn. Pep Seselwa pe konmans vwar diferaman e i pou *up to* zot pou delivre lo sa standar ki zot in met devan lepep Seselwa.

E nou, nou pou fer sir ki zot delivre lo sa standar. E si zot pa kapab, sed la plas nou a montre zot ki mannyer i fer. Mersi Mr Speaker.

(APPLAUSE)

MR SPEAKER

Mersi Onorab. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, napa person ki pou sed la

plas. Onorab Pillay pou bezwen esper ziska 2025, met son kandidatir parey nou, nou'n fer la anndan e *then* Lepep Seselwa a deside!

(APPLAUSE)

HON GERVAIS HENRIE

Mr Speaker, kondir Onorab Sebastian Pillay li menm, plito Onorab Gill ki ti *sum-up* lo zot kote, aköz olye koz lo sa *Bill*, in pas son letan vin *lecture* nou. Konmsi en Dokter *Konn Tou*.

Sa ki mon dezapwente dan son lentervansyon Mr Speaker, se koman en ansenyan i ti merit pe enspir nou bann zanfàn pou dir zot poudir travay dir lekòl e ou lanbisyon, i pa dwatet pou antre lo *URS* koman ou premye *job*.

(APPLAUSE)

HON GERVAIS HENRIE

E alors nou eksprim nou dezapwentman e mon ti ava dir ek zot koumsa, aköz zot pa demann li pou sed la plas koman Dirizan Lopozisyon, donn Onorab Gill ouswa donn Onorab Cosgrow!

(APPLAUSE)

HON GERVAIS HENRIE

Mr Speaker, *right to work*. Nou'n tann koz lo la bomaten, lartik 35 nou Konstitisyon. E

Lartik 35 i dir, Leta i rekonnet drwa sak sitwayen pou travay e pou travay dan en kondisyon zis e favorab. I annan bann *subclauses* depi 'a' ziska 'g' e ki konpri *basically* sa ki pe dir ou, ou pa ganny drwa anpese travay. I ou drwa partisip dan en aktivite prodiktiv. Ou lib pou swazir ou landrwa ki ou travay. Me i pa dir okenn par ki Gouvernman i forse donn ou en louvraz. Alors annou konpran sa.

Ozordi Lalwa i URS pe ganny *repeal* pa san en ranplasman. Akoz par egzanp *Scheme My First Job* e osi *Skills Development Program* pe reste.

Ler en Gouvernman i *repeal* en Lalwa, souvan i aköz en Lalwa i nepli efektiv, ouswa i aköz sa Lalwa pe annan plis konsekans negativ ki inisyalman zot ti pe anvizaze.

Annou konsider premye pwen. I nepli efektiv. Letan *Unemployment Relief Scheme Act* ti ganny entrodwir inisyalman koman *Act 3 of 1995*, i ti annan en bi tre, tre spesifik. Asiste dimoun ki'n anrezistre avek Minister Lanplwa, *comme quoi* zot pe rod en lanplwa. Met zot dan en lanplwa tanporer pou en peryod 6 a 12 mwan, lo bann program travay aprouve.

Pey zot atraver en fon ki devret ganny odite tou le

lannen par Oditer Zeneral. E sa *Scheme* ti merit anba responsabilite en Sef Egzekitiv, par lao li ti annan Minis, ki ti kapab ranvers serten desizyon ki sa *CEO* i pran atraver prosedir *repeal*.

Me eski nou konn *Scheme URS* mars koumsa? Larepons i non. *URS* ti vin en gran parti en zouti politik pou ladministrasyon avan pou gard dimoun depandan. Sa ti mal e in fer detour lepanouisman nou pep e met retar vre lespri 'leve debourye' e soutir krwayans, "Gouvernman i la e pou soutir ou depi nesans ziska lanmor."

Letan nou vwar ki pandan 4an ant 2018 a 2021 en total 2394 dimoun in benefisyé finansyerman anba *Scheme URS* peye par ASP, nou bezwen rode aköz. Ziska konmela sonm total ki'n depanse lo *scheme URS* i R112 milyon 110mil 378. 66sou.

Sa pa vedir ki nou pa konsyan ki dan serten ka spesifik sirtou apre pandemik *COVID-19* an 2020, ti enportan soutenir en kous laform travayer Seselwa ki ti'n perdi zot lanplwa, par egzanp dan domenn tourizm.

Nou ti vwar en logmantasyon dramatik ki reprezant 240poursan laplikasyon pou al lo *Scheme URS*. Lakantite partisipan dan *URS* ti sorti 210 an 2019 pou

ariv 480 an 2020. Sonm ki ti depanse pou peye ti sorti R15.9milyon pou ariv R68.6 milyon.

Going forward eski pei i kapab soutenir sa kalite depans, an menm tan ki lafors travayer etranze pe reparti an mwayen \$5milyon ouswa R75 milyon par mwan?

Eski i pa pou pli efektiv ki travayer Seselwa i sorti lo URS otan ki nou kapab *retrain* e *re skill* zot pou pran en pe sa bann travay ki bann *expatriates* pe fer?

Annou aprezan konsider dezyenm pwen ki konsern lenpak negativ. Menm ler 2394 dimoun pe benefisye finansyerman anba *Scheme URS*, ant 2018 a 2021 en total 4234 madanm e 4628 zonm ouswa 8860 Seselwa, in fer laplikasyon pou zwenn sa *Scheme*. Sa ki trakasan se ki pli gran group i bann zenn aze ant 15 a 19an, 1953 zot antou.

Ki sa i vedir? Koman en pei nou pa pe prodwi ase mendev kalifye. Nou pa pe prodwi zot ase vit pou kapab antre dan lemonn travay pare e kalib. Dan bann lenstitisyon segonder, pos-segonder, savedir zot pa pe delivre lo zot manda malgre larzan ki *tax payers* Seselwa ape depanse atraver Bidze anyel.

Statistik i montre nou ki sa demann sorti da bann distrik, souvan i penn portre

en lot kote, ki nou bann kominote ki nou bann Manm isi anndan nou dwatet konsernen avek.

Ile Perseverans - 552.

Anse Au Pins - 478.

Mont Buxton, (anvoy sa *text* kot mwan silvouple) - 446.

Anse Boileau - 393 e

Anse Etoile - 392.

Sa i lakantite dimoun par distrik. Savedir sa *top 5* ki'n fer laplikasyon pou zwenn *Scheme URS* depi 2018. Me i pa vedir ki zot tou ti kalifye pou benefisye anba la.

Mr Speaker, letan en parti annan konsansis parmi son bann Manm dan son vizyon apre plizyer lannen ki in dan Lopozisyon, i normal pou li anmenn pei dan en nouvo direksyon ki nou ti abitye avek.

Parfwa sa bann sanzman pou soka, kontroversyal, menm radikal. Me otan ki nou annan en plan e target i kler, Lepep Seselwa napa naryen pou per, malgre propagann parti Lopozisyon e sa bann swadizan nouvo Linyon Travayer.

Bokou in akiz nou pou vann kabri dan sak Mr Speaker. Jude, Keith, Wallace Cosgrow. Clifford, Egbert, Aglae avek Audrey, *Mar...yona* Vidot. 3 Onorab la anndan, Sanders konmela,

HON AUDREY VIDOT

Mary..ona.

HON GERVAIS HENRIE

Maryona.

Mr Speaker, letan Prezidan Wavel Ramkalawan ti etal son vizyon pou premye fwa avek Lepep Seselwa dan en *landmark speech* an 1990, Onorab Cosgrow i ti annan li selman 12an. Onorab Aglae ti annan 10an, Onorab Vidot ti annan li 3an. Zot pe rod nou'n aste kabri dan sak?

Tou sa letan ki in koze, lepep Seselwa in pran li letan pou ekoute, pou analize, pou aksepte. E finalman ki'n arive? Oktob 2020, *voup vap* - US dan bin listwar, li i *State House*!

(APPLAUSE)

HON GERVAIS HENRIE

Lepep Seselwa, letan *LDS* ti promet li sanzman 1an pase, pa ti zis en slogan politik dan vid. I ti pe dir bann lobzektif gouvrenans reel ki nou pou fer en diferan. *LDS* i oule kree en sosyete kot sak sitwayen i garanti son plas e son par dan nou pei.

Me sa ou pa pou gannyen zis dan en plato, frer avek ser. Fodre ou pare pou pran ou responsabilite personnel, an komansman par valoriz kiltir travay. E travay dir !

Letan sa Lalwa pou ganny *repeal* ozordi nou pa pe fer li pou nou, nou pe travay pour Sesel e asire ki travay ki atraver nou manda, Seselwa i eksperyans en nouvo komansman pou anmenn en nouvo klima sosyoekonomik. *LDS* i annan en plan.

Si ou'n atantiv avek sa ki pe arive otour atraver bann aksyon Gouvernman, ou a remarke ki i pe enkilke en nouvo kiltir, en nouvo valer parmi nou pep. Sorti lo *welfare* e vin pli endependan. Vin pli responsab e depan lo ou prop lekor an premye lye.

Letan *URS* i ganny *repeal* nou pe ede promouvwar nouvo loportinite, kot lavenir pei pa devret depan selman lo aksyon Gouvernman me osi sak sitwayen ki merit travay dan en klima ki ankouraz linisyativ.

Koman fasilitater Gouvernman *LDS* pou la pou fasilit bann bon lide e ede devlop bann propozisyon, ki pou epanouir nou lafors travayer. Letan *URS* i ganny *repeal* nou pou pe dir avek bann *MDAs* vin pli efikas dan fason zot donn servis Lepep Seselwa. Reponn pli byen e pli vit a zot bezwen pour ki laspirasyon sa pep i ganny akonplir.

Letan *URS* i ganny *repeal* nou pe dir avek sekter prive ki nou pou asire zot diversifye e

adapte dan nouvo klima ekonomik kot plis lanfaz i ganny mete lo lokalizasyon bann post e *reskill* bann travayer.

LDS i anvi vwar bann lendistri lokal travay marse eksportasyon avek bann prodwi tradisyonnel, e osi sa ki nouvo.

Letan setyenm Lasanble Nasyonal ti ratifye Konvansyon *African Continental Trade Area* an Zen sa lannen, tousala i form parti en plan elabore. Kree nouvo loportinite lanplwa isi. Se sa bann platform *LDS* pe kree, pou moderniz nou lekonomi par ankouraz evolisyon dan bann *Seychelles branded products*.

Letan *URS* i ganny *repeal*, nou pou pe dir avek bann investiser Seselwa, ki Gouvernman pe ankouraz zot pou zot investir dan larezyon. Pou bann ki pli enn sezi plan Gouvernman pou devlop lekonomi nimerik ki pa merit ganny restrikte isi.

I annan plis ki 1500 Seselwa aze ant 17 a 35 an ki annan potansyel pou donn zot en koudmen, koman lafors travayer dan zot lanbisyon.

Letan *URS* i ganny *repeal* nou pe dir nou oule vwar lazenes Seselwa ganny bann pozisyon travay avek plis satisfaksyon dan domenn

tourizm, lanvironnman, proteksyon lanatir e lenerzi.

Dan servis finansyel e teknolozi lenformasyon e komunikasyon e osi prodiksyon manze. Se sa transformasyon ekonomik ki nou pe kloz lo la. E kot saler nou travayer i kapab ogmante, larises i kontinyen ganny partaze e stabilite sosyal i asire.

Letan *URS* i ganny *repeal* nou pe dir avek Sekter Lapes e Lekonomi Ble annou ogmant par nou nasyon dan sa sekter. Donn pli bon servis e promouvwar zot prodwi. Fer plis prodwi valer azoute e ogmant reveni atraver leksportasyon. Servi nou bann zil elwanye e investir dan *mariculture*.

Alors kote zot pou ganny travayer? I annan omwen 800 dimoun la deor aze ant 36 a 49an ki pa dan lanplwa stab ou permanan, e ki merit loportinite dan kreasyon sa nouvo larises.

MR SPEAKER

12 minit Onorab, ou ava ariv lo en konklizyon.

HON GERVAIS HENRIE

Mon pe *wrap-up* osi Mr Speaker. Letan *URS* i ganny *repeal* nou pe dir avek Sekter Lagrikiltir elarzi zot rol koman en lantrepriz nasyonal. Reabilit nou bann montanny e

lafore. Elev nivo prodiksyon elevaz zannimo e prodiksyon fri avek legim. Servi nou bann zil elwanye.

An konklizyon Mr Speaker, i annan loptimizm, akòz parmi bann lorganizasyon ki'n partisip dan *Scheme URS* depi 2018 - 4 Lorganizasyon i paraetatik, 30 bann MDAs e 52 lorganizasyon prive. Alors mon napa krentif ki sekter prive pou kontinyen apiy bann atraver Seselwa.

Si nou get bann sif bann dimoun *URS*, 139 La Digue. Baie Ste Anne Praslin, 131 e Ile Perseverance 106. *Tourism* pe re *flourish*, nou Erport in re ouver, vaksen in ganny entrodwir, loportinite travay i la pou zot.

Me parmi tousala Mr Speaker, nou pa kapab ale. Nou'n fek diskrit lo ledikasyon semenn pase pou dir avek nou lazenes Seselwa, e mon swete *Leader* Lopozisyon i zwenn nou lo la, ki ledikasyon se lakle pou ouver tou laport sirtou pou bann ki oule en nouvo loportinite.

Nou konpran ki pa tou dimoun ki akademikman doue, e la kot nou bann zenn i devret ganny sa loportinite pou zot idantifye bann talan ki zot annan e ganny konseye pou zot pran bann karyer byen.

I pa devret lanbisyon personn pou al lo *URS* letan zot fini lekòl. Tou zenn i merit eksite pou al travay ler zot fini lekòl e pou zot ganny zot premye saler me non pa en *allowance* anba *Scheme URS*.

Nou a rapel ki anba sa *Scheme* zot pa pey pansyon e menm *personal income tax*. Alors ki kontribisyon ou pe fer dan sistenm ki pe soutenir ou zanfàn ki pe ganny ledikasyon gratwit, lasante gratwit pou ou fanmir e sekirite sosyal pou ou granmoun.

Me pli enportan, ki kontribisyon ki ou pe fer dan ou prop lekòl, ou prop lavenir? Akòz sa letan ki ou fer lo *URS* pou sa saler R7056 pa pou reflekte lo ou kontribisyon pansyon ler ou retrete.

Mon admet ki i annan ankor bokou ki nouvo Minister i bezwen fer pou Seselwa, met zot dan lanplwa, asire ki kondisyon travay i desan parey zot kontan dir. Ki nou vin en nasyon travayan.

Me pli enportan annan lafyerte dan nou travay e realize ki ler nou annan en saler lemwan ki regilye sa i defini nou karakter, nou personnalite e i fer nou vin en sitwayen egzanpler, responsab e endepandan.

E finalman Mr Speaker, fondasyon pou nouvo Sesel ki appartenir a tou son zanfàn in ganny mete. Sa ki krwar *LDS*

i napa en plan e pe zis pil lo bann vilnerab i en manter, i pa en lezann me en lerer.

Zot a rapel tou sa kalonmni ki *US* in fer lo nou e pou fer dimoun fer per *LDS*. E zot ankore pe fer. *Still* Seselwa in zet zot dan bin listwar lan pase. Sanmenm in arive, nou pe viv sa sanzman. Evite ganny kit deryer! Mersi Mr Speaker.

(APPLAUSE)

MR SPEAKER

Mersi. Bon mon ekspekte bann Manm i annan ase pasyans e zot a donn mwan zot konprenezon pou nou terminen ek sa *Bill* la, byensir i pou depan lo si i annan lamannman ki pe propoze. Me selman mon propoze la nou a pran repons Minis. Silvouple.

**MINISTER PATRICIA
FRANCOURT**

Mersi Mr Speaker. Mersi tou bann Onorab ki'n donn zot kontribisyon. Mon'n ekout atantivman avek nou tim e nou'n pran bokou *notes*, pou nou kapab regard ki mannyer nou *move* par devan, e pou fer sir ki nou manda pou met dimoun dan louvraz i reste solid e i reste for.

So mon pou adres en pe bann keksoz ki'n sorti, ki pertinan. I annan bokou ki repet son lekor. Me selman

mon komanse pou fer resorti poudir responsabilite travayer vin anrezistre e vin kot nou i reste lo '*li*.' Ler in fer sa premye pa nou, nou atrap son lanmen.

Nou pa kapab mars sa *journey fully* avek li, nou atrap son lanmen e nou fer sir nou met li *on the right track*. So, i annan bokou zefor ki bezwen ganny fer lo travayer ki vin anrezistre pou zot osi vin kot lofis, *follow-up*, telefonnen, mesaz e pou fer sir ki zot pe travay avek nou pou nou kapab met zot dan lanplwa.

Nou annan en *survey* ki nou fer tou le 'mwan' – tou le 3mwan (*sorry*), pou nou tyeke lo bann aplikan koman en *job seeker* e ladan parey nou'n dir i deza bann dimoun ki'n sorti lo *URS*, lo *SETS*, pou nou regarde kote zot ete.

E sa i en sirvey fizikal. So, *we call them*. Nou pran telefonnn. Bann *staff* i pran telefonnn i *call* zot. Ou kapab *imagine* pa toultan ki nou ganny dimoun, i annan nimeron i sanze e i annan ki zis pa enterese. Oubyen i annan, vreman pozitiv i dir ou, be mon'n fini ganny louvraz, zis mon pa'n fer zot konnen. So nou annan tou sa bann keksoz ki ganny fer.

Dimoun i kontinyelman reste en *active job seeker* e zot toultan ganny asiste *by ASP*. I annan en laranzman, si *at the pint* ki zot montre ki zot en *job*

seeker aktivman pe rod en louveraz, zot pou gannnen zot lasistans ziska ler zot antre dan en louveraz. Ler zot merite avek zot kriter.

Departman Lanplwa i kontinyen travay for pou nou kapab anmenn en pli bon servis pou nou met dimoun dan lanplwa. Kot zot in dir nou, nou *fall short*, mon'n pran *note*.

Me selman nou pou *intensify* nou bann zefor pou nou *improve* sirtou lo *job matching with the skills* avek bann leksperyans. E nou rekonnet dan pei i annan en *mismatch between the jobs and also* leksperyans ek kalifikasyon ki dimoun i annan. Se sa ki ou vwar nou depan lo *GOP*.

Me selman apre ou vwar, pou bann dimoun ki konsernen ;- Par egzant bann dimoun ki pa kapab travay *full time*, Onorab Andre letan ou pe dir. Nou dan sa laliny, *part time hours* i egziste. I annan *flexible working hours* ki nou'n anmenn en papye deza kot *Cabinet*. Nou pe travay lo la, nou pe rod lasistans.

Actually nou'n fini demann lasistans *ILO*, pou nou kapab ganny sa *technical and financial support* pou nou devlop sa. E nou pe travay *close* avek bann *entities* oubyen *employers*.

I annan lotel par egzant ki dir ek nou, nou *provide* en *daycare* pou en paran ki oule vini pou vin travay *part time hours*. E tousala i montre poudir nou *current*, nou pe al dan sa laliny *flexible working hours* e sa nou *embrace*.

Onorab George in koz lo lasistans. E nou konnen poudir anba *ASP* i annan sa *social safety net assistance budget* ki *available* e i pou toulta la pou donn *supplementary benefits* depandan kriter ki zot *meet*. Wi, nou *rigid* dan nou aplikasyon, aköz parey mon'n koze plizyer fwa nou konnen ki kantite labi ki'n arive. So alors nou pe fer sir ki nou zer larzan Gouvernman byen.

I annan kantite louveraz. I *tailor* pou diferan dimoun. E nou donn loportinite. Pa tou louveraz ki aplik pou tou dimoun. Me selman i varye. Si zot get nou bann *adverts*, louveraz i vremen varye.

Pou Onorab Gabriel letan ou'n demann nou alternativ pou ranplas *URS*. Nou'n koz for e mon'n dir mon *statement*, sa *reskilling and upskilling program* i vremen pe mars byen. Bann *job seekers* i ganny loportinite pou zot pran louveraz. Me i annan louveraz ki *readily* parey nou dir *available*. So zot bezwen pran sa premye pa pou pran sa

louvraz epi nou *reskilling* i kontinyen.

Nou fer bokou avertisman, menm lo televizyon zot vwar nou, nou met bann *advert* kot nou kontinyelman dir ek dimoun tel mwan pou annan tel *training*. Vin devan, vin anrezistre.

Alors nou depan lo dimoun pou pran zot responsabilite. Zot in koz lo la, nou annan *My First Job Scheme* ki ankor la, so sa i pou bann *graduates* avek bann zenn ki sorti dan bann *professional centers*. Sa 2 *Scheme* i ankor la e i pe mars vreman byen e *My First Job* i en sikse.

Bann zenn ki sorti dan *professional centers*, *almost* garanti ki zot dan en louvraz. Si zot konn okenn zenn la deor ki ganny sa difikilte *please* pran kontak avek nou.

Parey mon'n dir dan mon *statement*, dan 1705 *job seekers*, zis 399 sorti lo *URS* ki ti vin *register*. So nou pa kapab tay deryer dimoun pou dir vin *register*. Nou ti met loportinite la, nou ti ouver biro espesyalman pou sa e nou ti konsantre lo la. Dimoun i bezwen pran responsabilite.

E mon krwar sa enn bann pli gran mesaz sa Gouvernman, pou dir dimoun bezwen pran responsabilite.

Just going back to Onorab Aglae. I annan bann *establishment* ki ti pran bann dimoun ki ti deza lo *URS*. Nou ti ganny en bon group, ti ganny pran par Minister Lasante aköz ti *still* annan bann louvraz pou zot fer letan *COVID*.

Nou'n ganny en group zenn ki ti abzorbe *by* Minister Ledikasyon e nou menm nou kot Departman Lanplwa nou ti pran. I annan bokou bann sekter prive osi ti pran dimoun.

Nou'n remarke poudir kantite dimoun ki pe *seek welfare on 'grounds of unemployment'* in desann drastically aköz i annan sa bon travay avek *ASP*, poudir ler en dimoun pe vin kot *welfare* ou pe *refer* li kot *Employment first*.

E la nou travay ansanm pou regarde oli sa dimoun e pou nou vwar, in al premye *interview*, in *successful*. Si in al dezyenm i pa'n *successful*.

Ki nou, nou pe fer e nou fer *ASP* konnen. Sa louvraz i vreman byen ansanm. E lamazorite ditan sa dimoun i ganny en louvraz. Si pa premye fwa i kapab dezyenm fwa osi.

The timing mon krwar is *right* aköz nou *approach* sa Gouvernman se '*empowerment*' rather than *dependency* lo Sate, so, travay

i bon. Travay i bon pou nou tou si nou oule devlop nou konfidans, nou *pride*, nou *accomplishment* pou nou avek nou fanmir. Nou tou nou konnen poudir nou al lekòl, nou ganny nou *academics*, nou bezwen travay.

En *active job seeker*, letan i pe rod son louvraz parey mon'n dir, i *still* annan son posibilite pou li ganny son *benefits*. Me selman nou'n kontinyelman dir, letan ti en pti pe difisil, *don't be selective*. Pran en louvraz apre ou ava regarde lekel sa louvraz ki ou prefer.

Pou Onorab Loizeau, nou'n dir dan mon *data*, ou pou vwar i annan plis louvraz ki dimoun ki pe rod louvraz. E sa i en *fact*.

Parey nou konnen kot Departman Lanplwa, nou travay bokou lo *statistics* e sa ki *inform* nou bann desizyon avek nou bann *Policy*. Mon oule *congratulate* zot tou bann MNAs avek zot DAs ki pe fer en gran travay an kolaborasyon avek nou, pou met zot bann *constituent* dan louvraz.

Mon konnen poudir zot mesaz nou en kantite. Nou *embrace* sa e si i annan okenn *issue* zot fer nou konnen e nou *follow-up*.

E mon remersi zot akòz on konnen poudir sa lalis i sorti *once a week for one week*,

tou le Mardi. Dimoun in fini konpran sa, tou le Mardi 7er mwen 5 lalis louvraz i montre lo *SBC*. Tou le Zedi 9er 05 avan *Telenovela* i pas ankòr i fer dimoun vwar i annan louvraz. So, i annan 2 letan ki nou pas lalis louvraz epi lo nou *Facebook page*, i lo nou *website* osi.

Mwan mon vwar piblik tou le semenn avek mon tim. So si i annan dimoun ki ganny difikilte ganny louvraz pou *specific reasons*, si zot *feel* i viktimizasyon, si zot *feel* zot in seye. Lotel pe fer en *ploy*, i pa pe donn zot, zot louvraz. Oubyen en lot landrwa. Mon vwar zot direkteman.

E mon annan en tim ki asiz avek mwan *from ASP*, *from Sosyal*, *from Lanplwa* e leres *agencies* a nou regarde ki mannyer nou rod en solisyon pou met sa dimoun dan louvraz. E sa nou fer vreman byen.

Si zot annan okenn dimoun ki oule apwentman, fer nou konnen. Se sa ki Minis i fer tou le Zedi, nou vwar piblik. Mon pa krwar poudir - dimoun i dir poudir *we have to stay in poverty. No, we don't have to stay in poverty*. Nou pa ne in poverty, *circumstances* nou lavi i kapab sanze depandan ki nou, nou fer.

Nou tou ki la dan lasal mon krwar nou en *testimony to that*. Nou kapab in ne dan

en fanmir ki pov, me selman si mon oule sanz mon lavi i annan en kantite keksoz ki mon pou kapab fer. Travay dir e *go all the way* pou mwan kapab sorti ladan.

E si i annan difikilte, nou get bann entervansyon ki kapab ede pou kapab tir nou dan sa laliny.

I annan en kantite dimoun ki travay vreman for dan Departman Lanplwa pou fer si ki dimoun i ganny en louveraz e zot fer sa louveraz vreman byen. E zot travay *as professional as they can to get results*. I annan en kantite nou osi nou'n travay avek nou leker pou fer en diferans. Nou pa fer propaganda politik.

Vacancies Onorab Lemiel, as ou'n byen dir, i annan *right across the board*. Lontan ti en realite, kekfw nou ti dir i annan zis dan *tourism* avek *construction*. Me la i bokou *diversify*. Nou annan dimoun ki pe par egzanp letan nou get nou lalis louveraz i varye, i *right across the board*. E nou letan nou fer *reskilling program* nou regarde ki bor sa *re skilling* i merite e i annan plis demann.

Pou donn zot ankor enn de bann legzanp, nou ti vwar poudir par egzanp dan *security operations* ti annan dimoun ti pe ganny met *redundant*. Nou ti ofer, nou ti pas *advert* lo televizyon pou

ofer dimoun poudir nou pe al fer *training dan security operations, come forward*. E nou gannyen dimoun. Annan defwa zot vini, zot *attend training*, apre pa nesesman ki zot reste dan sa domenn. Me selman nou pe regarde ki annan deor.

The basic HR. So i pa toultan konstriksyon avek *tourism* ki nou dir. So *the basic HR*, nou pou konnen ki louveraz i annan, kote ki i annan sa *mismatch*. Nou'n ofer *training* dan *HR*.

Nou'n ofer *training*. En *training* ki'n vreman popiler dan *excel word*. Nou vwar ki bokou dimoun petet ki'n *drop out of school*, zot ti napa sa bagaz e zot antre dan sa program *training*. Nou'n vwar sa *it's ongoing*, i vreman popiler.

Basic customer care. *It doesn't have to be in hotels*. I kapab dan laboutik, i kapab dan en kot landrwa. So, i vreman varye. *Basic accounting, sewing*. 2 semenn pase mon'n fek *attend* en *graduation* pou bann madanm ki ase vilnerab, ki'n pran zot *sawing sessions for 3 months, I believe*.

E zot pe deza annan en metye pou zot komans ladan. Si i pa prive, me zot pe atase avek en landrwa ki deza i bezwen dimoun.

Hairdressing i en lot *area* ki nou vwar poudir nou bann fiy i enterese. *And then of course* nou al dan bann *tourism sectors*. So, i varye e mon ti ava ankouraz zot. Par egzanp ler zot vwar nou bann *adverts* e nou kapab anvoy zot nou bann *adverts for reskilling programs* si zot ti a kontan.

Entise zot bann *constituents* pou kapab anrezistre, *we need people to register*. *Job seekers*, zot bezwen *advice* si ou vwar zot pe ganny difikilte. Annan de defwa menm dan mon sesyon *surgery*, mon pe asiz avek en dimoun ki'n vin vwar mwan. Ou pe *teach* li *the basic interview techniques*. So nou fer tousala.

Body language letan ou al en *interview*. So i *vast*. Senmen sa ki nou dir nou *counselling* ki nou fer. E tou bann bagaz ki mwan mon'n konn depi avan, mon anmennen, mon *share*. So *that we empower* nou tim pou nou kapab fer.

So tousala si zot ganny bann difikilte pou bann *interviews for example, they can come forward* e nou aranz zot CV pou donn zot sa loportinite. *After all* nou bi se pou fer sir ki bann dimoun i al dan loubraz.

Pou Praslin, La Digue. Onorab Gill, so nou pe annan an, nou pe travay *very close*

avek *TGMI*. Nou pe komans devlop en program pou prepar en *work program* pou *cater* pou bann zenn, pou kapab devlop zot konfidans.

Aprè pou *discover* en pti pe zot abilite e prepar zot pou lemonn travay. So, sa i pou baze lo *work ethics*. *How to groom them for interview* avek *entrepreneurship at the same time*. So *this is to come*.

E sa nou'n ouver sa pou *job seeks* an zeneral, komansman *next month*. Pa bliye poudir nou *still* annan nou *Skills Development Program* on Praslin. I mars parey.

Onorab Cosgrow, travay pou bann dimoun vilnerab. Ou'n koz lo la. Nou *pay very good attention to that*. I annan bann kategori ki nou port byen latansyon e nou konnen poudir i annan bann program ki *COVID in get in the way* e i annan kontrent, nou pa'n kapab fer.

Me selman nou pe met la devan ki keksoz i *better*. *Put in back on the table* pou nou fer nou *reskilling, self-empowerment* avan bann dimoun par egzanp ki sorti prizon.

Nou travay *very close* avek *Probation*, pou kapab form en program pou zot. Me selman ou kapab *imagine* avek kontrent *COVID* i pa tro facil. Me selman mon okenn poudir

Madanm Dookley avek son tim pe fer en bon louvraz pou devlop sa bann program.

Nou travay vreman *inclusive*. Alors bann *targeted group* ki nou pe donn latansyon se dezabilite, bann *teenage parents*, bann *teenage mums* ek *drug dependence* parey mon'n dir. Apre osi i annan en gran group ki bann *informal sector*. Zot, zot pe travay, me selman zot pa *formal*.

E en kantite louvraz, nou'n koz ek *ILO* lo la poudir sa i enn bann group ki nou bezwen *target the most*. *Because again* zot pa pou pey zot *tax*, zot pa pou pey zot pansyon si zot kontinyen travay *informally*, kote zot pou ete ankor dan 10an *and so on?* Si zot tonm malad, zot pa ganny *benefits and so on*.

So therefore even nou bann group *vulnerable* ki nou pou donn bon latansyon.

Pou Onorab Zialor, *again disability* i en nou *vulnerable group* ki nou konsantre lo la. Mon kapab dir nou pour nou annan en group la ki nou pe travay avek, an kolaborasyon avek en *fasilitater to provide training*.

Sirtou lo *self-empowerment* parey mon'n dir. *Training base* lo zot bann abilite ki zot deza annan. E nou annan 10 dimoun ki nou'n deza *targeted to world*

on the program e this is ongoing.

Onorab William, si mon kapab adres ou pwen. Nou osi nou *believe* ki *manpower planing is important* pou pei. Alor i annan en bon pe mwan - *months* Minister Lanplwa ek *Social Affairs is meeting with the Ministry of Education*, pou nou regard *ANHRD* e son rol e ki mannyer nou *look at* sa *national human resources* devlopman dan pei.

So very soon nou pe prezant en papye kot *Cabinet* pou nou kapab adres sa e nou annan bokou kolaborasyon avek Minister Ledikasyon pou nou kapab adres sa bann pwen.

Mr Speaker, mon oule zis, i annan bokou keksoz i *repetitive*. So mon'n kouver lo bann ki mon krwar ti pertinan. Onorab Romain ti'n demann mwan bann *figures* ki mon annan. 2018, *total count* lo *URS* mon ti annan 73 - 73 e Bidze ki nou ti depan lo la 9milyon. *Almost 9.1milyon*.

2019, lo *total count of URS* nou ti annan 210, Bidze ki ti depanse 15. 9milyon.

2020, *total count for URS* nou ti annan 480 e nou ti depans 68milyon.

E 2021 nou ti annan, *with the total account of URS* ti 1631, zis pou 2 mwan - Zanvye, Fevriye ziska ler *URS*

ti *phase out*. Nou ti'n depans 19milyon.

So ou kapab vwar sa bann *figures* pa ti soutenab pou pei komans reste lo la.

Mon oule osi refer sorti akòz URS i ganny bokou konnotasyon labi ki'n vin avek. E mon oule fer resorti poudir i annan bann *figures* ki mon kapab donn zot ki bann *URS payments* pa'n ganny kolekte.

So letan nou koz an zeneral e nou dir dimoun i vilnerab, dimoun pa pe *make it*. Dimoun i dan povrete. Mwan mon demann mon lekor, be akòz dimoun pa vin kolekte zot larzan URS?

So nou ti annan en total 191 - zis anba 200 URS partisipan ki pa ti kolekte zot larzan *from January 2020*, ziska Fevriye 2021. 1an 1mwan. Sa larzan ti ariv 3milyon, *almost 3.9milyon* ki dimoun pa'n kolekte. 3.9.

So ler nou *break it done*, nou annan nou 2.8milyon an 2020 e letan nou regard li. *January to February 2021* nou ti annan nou 1milyon 55mil *again not collected when URS ended*. Zot, zot kapab met zot *own* enterpretasyon akòz, nou osi nou kapab met nou *own* enterpretasyon akòz.

(APPLAUSE)

MINISTER **PATRICIA**
FRANCOURT

E Fevriye 2021 dan dernyen mwan kot ti URS, nou ti annan nou 100 endividi ki *did not come to collect their last URS payment amounting to a total of 348mil*. So ler nou ti pe fer tapaz, nou ti pe dir ek dimoun *you know - i tough out there - again* 100 endividi pa'n *come forward* pou zot vin kolekte zot larzan URS.

Pourtan ASP ti met lanons lo radyo, ti fer dimoun konnen, ti dir zot larzan i la zis vin devan, vin kolekte. Me selman pou rezon ki zot, zot kapab enterprete, dimoun pa ti vini.

Annan de fwa nou tann koze, nou dir i annan bann louvraz nanm. Me selman mon krwar kot URS ti annan dimoun ki ti nanm ...

(laughter)

MINISTER **PATRICIA**
FRANCOURT

... akòz ti annan 100 dimoun lo *database* ki pa ti egziste kot Lanplwa. So, kote sa 100 dimoun in sorti, nou pa konnen. E ziska prezan nou'n *call auditor* pou regarde. Tousala nou bezwen *refer* avek odit, menm ACCS si fodre pou regarde bann dimoun ki ti nanm, *how come they were not on the list of employment?*

So an konklizyon, i annan bokou dimoun ki'n pran loportinite pou *better their life*. Zis pou mwan fer dir, sa ki nou'n erite sa. Sa bann *figures* ki mon pe dir i bann ki mon'n erite, ki mon pe dir. *I do not make up those figures*.

Contrary to the saying ki nou dir i annan en kantite dimoun ki pa pe travay, ler nou prezant *statistics* tou le 3 mwan, nou montre kot Departman Lanplwa ki bann *statistic* ki nou pe prezante e *most of the time* i accurate.

So alor nou dir poudir pou kontinyelman dir sa mesaz, poudir en kantite dimoun deor la pa pe travay, i pa korek. Regard nou *statistic* si zot oule konnen demann nou, nou ava anvoy kot zot.

So dimoun ki pa dan louveraz parey nou'n dir, nou ava rode aköz zot pa dan louveraz. Me i sa 900 ki nou pe dir i pa bokou. I pa bokou, so met keksoz an perspektiv letan nou pe dir. E nou, tou le *quarter religiously* nou prezant nou *statistics*.

Reskilling programs i paramount. I pa kapab arete e i pou kontinyen. *This is the alternative* ki nou annan pou URS e nou pe travay vreman close pou fer sir nou agrandi sa.

Nou annan en fason ki nou travay pou nou *manage*

bann *GOPs versus* bann *local job seekers*. Nou annan en Komite. Nou'n kree en Komite ki asize e ki fer desizyon lo *GOP*. So *GOP* pa pas zis kot en dimoun, en lot dimoun, en lot dimoun. I annan en komite ki asize e ki regard kriter.

It's only ler nou realize ki napa dimoun dan sa domenn kot Departman Madanm Dookley i ava koz avek lot Departman poudir nou napa dimoun pou refer avek *skills*, *then only* en *GOP* kapab ganny aprouve.

So finalman nou vwar poudir i annan bann stratezi e nou vwar poudir i annan bann *Policy* an plas ki marse.

Evantyelman URS ti pou ganny *phase out anyway*. Me selman mon krwar sa Gouvernman in *bold* dan son desizyon, in brav, in pran sa desizyon e la nou vwar poudir i pe al dan bon direksyon. Alor nou travay i kontinyen.

Nou pran an kont tou zot bann sizesyon ki zot in met devan e nou pou travay dir. Mon annan en lekip ki *their heart is in it*. *They want to work very hard* pou fer sir ki nou met dimoun dan louveraz.

E mon mesaz pou piblik, pran loportinite. *Come forward*. Si ou vwar i annan *blocks*, si ou vwar i annan baryer, vin devan. Koz ek zot DA, zot MNAs, *anybody else*. *Come forward, therefore we*

will be able to help and support you.

E mon oule remerci mon bann staff ki'n travay bokou, pou zot kapab fer sir ki tou sekter dan lanplwa i vin byen ansanm e nou kapab plas dimoun dan loubraz.

So, mon remerci zot pou tou zot sizesyon ki zot in donne. Nou anbras tou sa bann sizesyon e nou anmenn devan. E koman en tim nou size, nou regarde, nou evalye e si fodre sanz okenn keksoz nou sanze. Mersi Mr Speaker.

(APPLAUSE)

MR SPEAKER

Mersi Minis. Avek repons Minis nou kapab pran vot lo merit zeneral sa *Bill*. Manm ki an faver, lev lanmen silvouple? Mersi okenn Manm ki kont? Mersi.

Vot lo *general merit of The Unemployment Relief Scheme (Repeal) Bill, 2021, 22* Manm in vot pour, 10 kont e 0 abstansyon.

Alor *Bill* in aprouve, lo *Second Reading*. Dan mon versyon, ki mon annan, mon pa'n vwar okenn *amendments Bills Committee*. Sorry nou a pran *Formal Second Reading* premye avan. Madanm Clerk.

MADAM CLERK

Mersi Mr Speaker. *A Bill for an Act to provide for the repeal of The Unemployment Relief Scheme Act, Cap 243*. Mersi Mr Speaker.

MR SPEAKER

Mersi. *Chairman Bills Committee* Onorab Hoareau ki pou adres nou lo la. I annan *amendments* pou propoze?

HON JOHN HOAREAU

(Off-Mic)

MR SPEAKER

Pardon? I annan. Eski ou krwar nou pou kapab fini dan 15minit oubyen...? Ou krwar. Byen. *Sergeant* nou a pas dan Staz Komite silvouple.

Onorab Hoareau ou annan laparol. Wi ou a dir nou.

HON JOHN HOAREAU

Mersi Mr Speaker. Mr Speaker vreman deba in sofe. In en gran, in en gran deba. Me i annan zis 4 pti lamannman, lo *Clause 3* sa *Bill*. I lir koumsa:

-

"On repeal of the Act," nou'n *include*, nou'n *insert* *"the"* nou'n retir, nou'n *delete* *"any"*. Apre i annan en propozisyon, pour ki aköz *moneys*, i kapab ganny ekrir dan de fason *"m..o..n..e..y..s"* oubyen *"m..o..n..i..e..s"*.

So *Bills Committee* pe sizere ki nou servi

“m..o..n..i..e..s”. Si aprezan *panel* i desid *otherwise* zot kapab dir nou.

Apre nou annan, i kontinyen i dir: -

“In the Unemployment Relief Fund” la i annan en comma, *“established under section 6 of the Act”* i annan en comma, *“shall be transferred into, shall be transferred in the Consolidated Fund.”* La i annan en *full stop* after *“that”*. Se tou Mr Speaker. Mersi.

MR SPEAKER

Thank you. Well, sa i zis bann lamannman teknik. Ti laranzman soz. Eski i annan okenn lot pwen Onorab Georges.

HON BERNARD GEORGES

Yes Mr Chair. Mon pa konnen ki *panel*, pe, pe dir me. Mwan mon, mon krwar *the usual term* ki ganny servi toultan dan sa bann soz se. *“Any monies, “n..e..y..s” rather than the monies “n..i..e..s”*. Mon, me *the panel will direct us*.

Mon ti a kontan solman azout dan dezyenm laliny *“shall be transferred into the Consolidated Fund.”* Me *in fact* Onorab Hoareau in, in fer sa, sa fot. In vwar en *“into”* la, akoz *it should be “into”*, mon krwar *rather than “in”*, or *“it should have been transferred to the Consolidated Fund.”* Me

mon krwar *“into” is the better, is the better form*.

Alor mon ava propoze koman en *simple amendment, “transferred into the Consolidated Fund.”*

MR SPEAKER

Ok. So ou propoz gard *monies* mannyer i ete e met *into* la. *Panel?*

HON BERNARD GEORGES

E gard, *“any” unless* ki *panel* i annan en lot lopinyon.

MR SPEAKER

Panel i bann teknik, zot pou kapab dir zot, zot lopinyon lo la. Yes.

ASSISTANT

DRAFTSPERSON FURNEAU

LEGAL

ADAM

Thank you, Mr Chair. Bonn apre midi tou bann, Onorab. Bonn apre midi tou dimoun ki a lekout. Annefe Mr Speaker, nou osi nou ti annan preski menm rezervasyon, ki Onorab *LGB* in met devan.

Akoz si nou pou get sapit 12, nou Konstitisyon Lartik 151 i fer referans ki, avek mo *“moneys” rather than, “m..o..n..e..y..s”* olye ki *“moneys”, “m..o..n..i..e..s”*. So mon krwar *to be consistent* avek Lalwa Siprenm, nou pei. I enportan ki nou reste konsistan avek bann Lalwa ki swiv anba Konstitisyon.

Mon osi nou napa, *panel* osi napa lobzeksyon avek sanzman *the word "in" to the word "into"*. Mersi Mr Speaker.

MR SPEAKER

Sa i kler. *Bills Committee*. Nou ok avek sa. Nou aksepte sa. *Thank you*.

Eski i le, Manm i annan lezot pwen pou leve la? Ok dan sa ka sa bann amannman i zis teknik. Nou pa bezwen pran vot lo la.

Nou a pas, dan Staz Lasanble silvouple. E LGB ou a met Mosyon, pou *Third Reading*.

HON BERNARD GEORGES

Avek plezir, Mr Speaker. Mr Speaker anba *Order 76(1)* mon move ki *the Unemployment Relief Scheme (Repeal) Bill, 2021 as amended*, i ganny lir en Trwazyenm Fwa. Mersi.

MR SPEAKER

Mon a ganny segonnman silvouple? Onorab Henrie.

HON GERVAIS HENRIE

Motion seconded, Mr Speaker. Mersi.

MR SPEAKER

Mersi nou a pran vot lo *Third Reading*. Manm ki an faver, lev lanmen silvouple? Ok byen. Manm ki kont? Mersi.

Lo vot lo *Formal Third Reading of The Unemployment*

Relief Scheme (Repeal) Bill, 2021 as amended. 22 Manm in vot pour, 10 kont e 0 abstansyon.

Donk *Bill* in aprouve par Lasanble. E Madanm Clerk a fer *Formal Third Reading*.

MADAM CLERK

Mersi Mr Speaker. *This Act may be cited as the Unemployment Relief Scheme (Repeal) Act, 2021*. Mersi Mr Speaker.

MR SPEAKER

Mersi. *Bill* in pase par Lasanble. Mon a remersye bann Manm pou zot entervansyon lo deba. E Minis pou son prezantasyon, e pou son repons.

Mersi pou zot partisipasyon avek nou, nou a swet zot bonn apre midi, e bonn kontinyasyon. Nou, e bon leskiz pou letan. Vreman in zis glise e mon'n sey *manage* li o tan ki posib, ki pou fer li vo lapenn pou Lasanble.

Nou a pran *break* la e nou apepre 1 erdtan. Konbyen nou, nou apepre, konbyen alor nou devret retournen 3er en kar. Korek?

Eskiz mwan, eskiz mwan mon a. So i 1er 35, nou omwen 1 erdtan 5minit an retar. Alor, annou retourn 3er en kar, soz. 3er en kar i a donn nou letan pou soz.

E les mon a dir ki nou,
nou a met *ABC* 2er edmi?
Mersi nou a pran *break* la.

(BREAK)

MR SPEAKER

Bonn apre midi ankor tou
dimoun. Nou pe pran
*Seychelles National Institute of
Culture Heritage and the Arts
Bill, 2021*. E avek nou pou Vis-
Prezidan. Madanm raporter,
ou ava apel Vis-Prezidan ek
son delegasyon.

Bon bonn apre midi Vis-
Prezidan Ahmed Afif ki pe vin
prezant partisip avek nou pou
sa *Bill*. E mon dir bonn apre
midi e byenveni Mr Frank Ally
Attorney General, Mr David
Andre *Mayor of Victoria* Ms
Cecile Kalebi *Principal
Secretary* pou *Culture*, e Mr
Victor Pool *Senior*, (no sorry Mr
Pool pa la avek nou). Sa trwa.
Mersi.

Bon nou'n pare pou
komans avek *Bill*. E se Onorab
Sandy Arissol ki pou prezant
Mosyon, pour *Bill*. Onorab
Arissol.

HON SANDY ARISSOL

Mersi Mr Speaker. Bonn apre
midi Mr Speaker. Bonn apre
mid *VP* avek ou delegasyon,
tou dimoun ki a lekout. E
bann dimoun dan lakour, osi
ki pe swiv nou.

Mr Speaker anba *Order
69(2)* mon *move* ki *Bill*

*Seychelles National Institute
for Culture Heritage and the
Arts Bill, 2021* i ganny lir en
Dezyenm Fwa. Mersi Mr
Speaker.

MR SPEAKER

Mersi mon a ganny
segonnman pou sa Mosyon
silvouple? Onorab Henrie.

HON GERVAIS HENRIE

Mosyon i ganny segonde, Mr
Speaker. Mersi.

MR SPEAKER

Mersi Mosyon i ganny
segonde, mon ava envit *VP* pou
prezant *Bill* avek Lasanble.

**THE VICE-PRESIDENT MR
AHMED AFIF**

Mersi bokou Mr Speaker.
Bonn apre midi Mr Speaker,
Leader Biznes Gouvernman,
Leader Lopozisyon, tou Manm
Lasanble, pep Seselwa
bonzour.

Kiltir sa eleman
primordyal ki defini, e ini en
pep. Preambil nou Konstitisyon
i dir ki nou pep Seselwa, nou
okouran e fyer ki koman
desandans diferan ras, nou'n
apran viv ansanm koman en
sel Nasyon, avek lagras
Bondye e nou kapab servi
koman legzanp en sosyete
miltirasyal armonye.

Kiltir Kreol i annan en
plas enportan dan lavi
Seselwa, pou gard sa linite

antre nou. Avek tou nou diversite, nou lorizin, krwayans, ledikasyon e lezot diferans.

Nou Konstitisyon i osi rapel nou ki, nou en pei inik e ki nou devret gard antet nou frazilite. Ki nou devret sofgard nou souvrennte, ede prezerv nou lanvironnman sen, pou ozordi e pour lefitir.

Sa mesaz i rezonnen dan nou Lim Nasyonal. “Prezerv labote nou pei, larises nou losean, en leritaz byen presye, pou boner nou zanfán. Reste touzour dan linite”.

Kiltir Kreol, Seselwa i inik. En pti pei avek mwens ki 100mil zabitan, en gout dan losean lo sa plannet, avek plis ki 7milyar zabitan. Sak sa pep zot prop kiltir, ki pe kontinyelman egzers en gran lenfliyans lo nou.

Nou bezwen konsyan nou frazilite vizavi bann presyon eksteryer, e fer li alor nou devwar koman Seselwa. Nou tou ansanm pou prezerv nou lidantite kiltirel, ki fer nou fyer koman pep Kreol, ki viv ansanm, koman en pep. E non pa, akote kanmarad, sakenn dan son kominote.

Moman in arive pou ranforsi nou lenstitisyon kiltirel. Mr Speaker ozordi mon pe prezant avek Lasanble Nasyonal, en Prozedlwa ki pou anmenn, ki annan pou bi kree

en Lenstiti Nasyonal pour Kiltir Leritaz, ek Lar.

Sa nouvo striktir i donn lavi, Lartik 39(1) nou Konstitisyon, kot Leta i rekonnet drwa tou dimoun, pou pran par dan lavi kiltirel. E pour profese, promouvwar, zwir e protez bann valer e koutim kiltirel pep Seselwa. Dapre restriksyon ki Lalwa i kapab prevwar e ki nesese dan en sosyete demokratik.

Sa nouvo striktir i mark en lot letap dan nou bann zefor pour asire, ki kiltir i ganny zere dan en fason diferan. Kot sitwayen Seselwa i pran responsabilite pou son kiltir, e form en lenstitisyon endepandan pou gid li, dan son devlopman.

Sa lenstiti i annan pou bi asir stabilite e kontinyite e permanans dan gouvènanans Sekter Kiltir Leritaz ek Lar. E pou met lanfaz lo prezervasyon, promosyon ek devlopman kiltirel, kreativite ek inovasyon.

Parey son moto i dir, son bi prensipal se pou fer li nou devwar pou vin gardyen, nou leritaz. Sa striktir pou kree en lanvironnman ki pou met an valer partisipasyon e kontribisyon tou Seselwa. Tou artis, tou lasosyasyon, artis. E pa pou diminyen plas personnan dan nou sosyete.

Mr Speaker Lenstiti Kiltir Leritaz ek Lar, i ranplas

Minister e Departman Kiltir. Sa Prozedlwa pe propoz bann pwen swivan: -

Lenstiti e Kiltir Leritaz ek Lar i antite Leta endepandan. I parey tou bann lenstitisyon endepandan, i tonm anba Sef D'Eta.

Sa lenstiti pou ganny zere par en Sekreter Zeneral ki pou reprezant Sekter Kiltirel lo pli o nivo dan Gouvernman. E pou ganny apwente par Prezidan Larepiblik, lo propozisyon ki i pou resevwar ek bann reprezantan bann seksyon dan domenn kiltirel.

En Konsey Konsiltatif ki responsab pou konsey, lo tou size ki afekte Sekter Kiltirel pou ganny met an plas. Sa lenstiti pou ranforsi, e devlop Polisi, pou asir kontinyite, prezervasyon, konservasyon promosyon ek nou lidantite Kreol Seselwa. E devlopman soutenab kiltirel, leritaz, lar lo nivo Nasyonal e enternasyonal.

Mr Speaker sa bann sanzman swivan pou neser av ek serten striktir egzistan. Fondasyon Leritaz Sesel pou ganny apele Konsey Nasyonal pou Zesyon Leritaz. Sa nouvo Konsey, pou responsab pou prezervasyon, proteksyon, devlopman leritaz kiltirel, enkli zesyon moniman.

Seksyon Leritaz Nasyonal, propozisyon, pou deklarasyon bann Moniman

Nasyonal, pou aprezan transfer anba sa nouvo Konsey Nasyonal pou Zesyon Leritaz.

Konsey Nasyonal pou Lar, pou agrandi son manda pou kouver lartizana. I pou ganny apele Konsey Nasyonal pou Lar e Lartizana. Son manda, priyoriter se pou kree bann lanvironnman favorab, pou devlopman lar ek lartizana. E diversifikasyon dan lar, dan son totalite.

Konservatwar lanmizik, ladans ek teat, pou tonm dan sa nouvo Konsey. Lazans pou Lendistri Kreatif e Levennman Nasyonal *CINEA*, pou ganny transformen, pou vin *Creative Seychelles*. Son manda se pou devlop, Lendistri Kreatif Kiltirel, av ek bi pou ankouraz partisipasyon endividyel. E kontribye dan devlopman personnel e ekonomik.

Lendistri Kreatif Kiltirel dan lemonn, i en lendistri ki anmenn bokou reveni, e bokou pei pe met lanfaz lo devlopman sa lendistri. Bann levennman kiltirel e Nasyonal pou ganny zere par en seksyon pou tel levennman.

Lenstiti Kreol, non sa antite i ganny revwar. E pou aprezan ganny apele Lakademi Kreol Sesel. Enn son fonksyon mazer se pou kontinyelman, travay pou devlop, promouvwar e sofgard

nou lalang Kreol ki osi en lalang Nasyonal.

En eleman enportan, nou lidantite Seselwa, koman en pep Kreol. Lakademi Kreol Sesel pou kontinyen avek son bann servis, pou tou dimoun ki anvi aprofondir zot konesans lengwistik, e kiltirel Seselwa.

Sa bann seksyon swivan ki ti anba Departman Kiltir, pou tonm anba Lenstiti Kiltir, Leritaz ek Lar. Sa i Mize Nasyonal, Libreri Nasyonal, e Arsiv Nasyonal ki pou kontinyen deservi zot manda pou prezerv, konserv e promouvwar nou leritaz tanzib, e entanzib. Avek bi pou asir ledikasyon kiltirel nou pep.

Dan sa nouvo striktir konesans profesyonnel, konpetans ek leksperyans pou ganny valorize. Pou ki lenstiti i devret, i delivre o, lo son manda, bokou lanfaz pou ganny mete lo devlopman resours imen kalifye, pou travay dan domenn kiltirel.

Mon profit sa lokazyon, pou remersye senserman, tou bann dimoun ki'n fer zot bann kontribisyon pou fer avanse, sa bann diferan Lazans Kiltirel dan lepase.

An konklizyon Mr Speaker, konsiltasyon in ganny fer avek bann seksyon, dan Departman Kiltir, bann lasosyasyon artis, bann akter

kiltirel, e endividi, ki zer bann diferan domenn kiltirel. Lo sa lide, pou kreasyon en tel lenstiti. Pou ankadre kiltir leritaz ek lar, e sa lide in ganny byen resevwar.

Prezervasyon, transmisyon ek promosyon nou kiltir, i responsabilite tou Seselwa, atraver bann diferan lar e osi dan fason viv, e fason fer sak Seselwa.

Lenstiti Kiltir, i prezant en loportinite pou dinamiz nou Sekter Kiltirel e kree lanvironnman pou artis kree zot prop loportinite, pou fer avanse zot lar, ki zenn artis i dekouver e partisip dan devlopman kiltirel. E ki tou Seselwa, i pran son kiltir dan son lanmen.

Mon profit sa lokazyon pou envit tou Seselwa, pou ganny enspire par nou lantouraz e nou kiltir. Pou re-konekte avek e valoriz nou kiltir, devlop bann proze inovatif, soutenab e profitab. E rekolte bann benefis en lekonomi kiltirel.

Apre tou, parey en gran defander kiltir, *Marcus Garvey* ti dir “en pep ki pa konn son pase, son lorizin ek son kiltir, i parey en pye dibwa, san rasin”.

Ler nou defann nou kiltir Seselwa, i pa vedir ki nou pou reste anfermen lo nou menm. Akoz kiltir, i evolve avek letan. Pe enport nou lorizin, nou

krwayans ek nou konviksyon, nou kiltir, in ini nou Nasyon. E nou premye misyon se pou kontinyen, pou ini Sesel.

Nou sel patri, atraver sa kiltir Kreol Seselwa ki nou tou nou partaze, ki nou kontinyen reste fyer pou form parti sa sosyete Kreol Seselwa. I devwar sakenn de nou, pou nou vin gardyen nou leritaz. Si pa nou, lekel?

Mon a fini avek en refleksyon for, sorti kot en lot gran defanser kiltir. Pa lot ki *Mahatma Gandhi* li menm. An Angle i ti dir *"I want the culture of all lands, to be blown about my house as freely as possible, but I refused to be blow of my feet by any,"*

An Kreol "mon oule ki tou bann kiltir lemonn antye, i vivote libreman dan mon lakaz, me mwan mon refize les okenn de zot savir mwan".

Mon pe demann Lasanble Nasyonal alor, pou donn zot sipor, sa Prozedlwa. Mersi Mr Speaker.

MR SPEAKER

Mersi Vis-Prezidan pou ou prezantasyon. Nou a pran deba, lo *Bill*. Manm ki ti a kontan entervenir.

Zis tenir lanmen, en pti kou silvouple. Aglae ok. Byen mon annan Onorab Pillay, e Onorab Lemiel ou ti'n lev lanmen ou? Wi. Onorab Pillay,

Lemiel, Aglae, Gabriel, Cosgrow lo sa kote.

E kote isi, mon annan Onorab Georges, Arissol, Henrie, Samynadin, Andre, Letourdie, Onorab Woodcock in lev lanmen, prezan.

Byen, tre byen nou a komanse. Onorab Labrosse. Ok, mon a komans avek enn bann Manm ki'n lev lanmen premye se Onorab Samynadin.

HON KELLY SAMYNADIN

Mersi Mr Speaker. Bonn apre midi Minis, Mer Lavil ek zot delegasyon. Ensi ki mon bann koleg Onorab.

Mr Speaker le 27 Out 1770, en bato apele *Telemaque*, avek 22 solda *Francais*, zot bann lesklav, ensi ki 7 Endyen, ti tranp son lank lo zil Sainte Anne avek bi pou kree en letablisman.

Se a sa moman ki Sesel, koman en Nasyon ti ganny batir. Efektivman, nou kiltir i ganny kategorize par diversite nou pep, ki etabli zot depi 1770. E sa byensir atraver son bann lenfliyans ouswa vizyon Afriken, Azyatik, Eropeen.

Mr Speaker, nou Gouvernman i konsyan ki kiltir i en zouti enportan pou byennet nou bann endividi, devlopman kominoter, osi byen ki dan promosyon linite Nasyonal.

E sa i osi dan en fason, pou garanti nou komitman, anver siport lavi kiltir nou Nasyon e osi asire ki nou pep i angaze dan bann aktivite, kiltirel.

Mr Speaker sa *Bill* ki devan nou pe fer provizyon pou ranplas Departman Kiltir, e tou son Lalwa anba seksyon 69, pou ganny kennsel, e reprodwi par en lenstiti an term zot bann lobze e fonksyon. Koman en lenstitisyon konstititif.

Prezidan pou answit apwent en Sekreter Zeneral, ki son *post*, pou ekivalan en Sekreter D'Eta, e li son rol se pou siperviz e kontrol ladministrasyon sa lenstiti.

Mr Speaker, kreasyon en Lenstitisyon pou Kiltir, Lar e Leritaz i en nesesite. E in vin a en bon moman. Avek sa tranzisyon Gouvernman, sa nouvo lenstitisyon, pou ede asir enplimantasyon bann Polisi e program, pou asiste nou bann artis, mizisyen ek artizan, pou ganny zot lavi atraver vokasyon ki zot in swazir e sa i dapre nou manifesto pou eleksyon 2020.

Wi, nou Gouvernman pe travay. E i pe travay dapre sa ki i ti'n promet. Non pa kabri dan sak, parey i annan pe sey fer nou krwar.

Sa lenstitisyon pou byensir annan menm manda e fonksyon Departman Kiltir,

me byensir avek serten sanzman neseser. E i pou ede pou donn plis valer nou kiltir, e leritaz.

I pou osi en platform kot bann diferan *stakeholders*, ki angaz zot dan sa bann domenn, pou kapab servi pou promouvwar zot bann prodwi, lo en pli o nivo. I pou osi ganny mandate, pou konsey Gouvernman lo bann Polisi e asir prezervasyon lidantite kiltir, lar ek leritaz Seselwa.

Enn bann leokri ki annan deor se an ka, se an sa ki konsern promosyon ek lavant bann prodwi artizana, ensi ki proteksyon kont konpetisyon lo lavant, bann prodwi artizan enporte.

Nou osi annan serten nou bann mizisyen, ki an se moman pe rankontre difikilte avek sityasyon *COVID*, ki nou ladan, pou garanti en loportinite divertisman, dan bann letablisman touristik, oubyen dan bann *outlets* apropiye.

Mon swete ki sa nouvo lenstitisyon, i ava enn ki parmi son bann manda pou travay dan sa bann direksyon ki mon'n mansyonnen. E ki tou parti prenan i ava satisfé.

Nou kiltir parey pou nenport ki pei i en mwayen, pou anmenn nou pep ansanm dan diferan fason. E parey Mer Lavil Mr David Andre ti dir dan

en konferans lapres, le 11 Fevriye 2021.

“Kiltir i biznes tou dimoun, e biznes tou Minister. En Minister Kiltir pa kapab lo li menm atenn son bann lobzektif kot i konsern sofgard nou kiltir e leritaz”. Lafen sitasyon.

Nou tou nou bezwen fer nou bout koman en Nasyon, pou ede prezerv, konserv, restor, promot e devlop nou patrimwann dan bann fason soutenab.

Mr Speaker mon pou termin avek en sitasyon ekriven *Francais Milan Kundera, “La culture c’est la mémoire du peuple, la conscience collective de la continuité historique, le mode de panser e de vivre”*.

Mr Speaker mon pe konfirm mon sipor anver sa *Bill*. Akoz mon konvenki ki sa lenstitisyon pou enn ki pou ede, e garanti ki kiltir e leritaz Seselwa i ganny prezerve pou plizyer zenerasyon avenir. Mersi Mr Speaker.

MR SPEAKER

Mersi Onorab. Nou a apel Onorab Lemiel.

HON SYLVANNE LEMIEL

Mersi Mr Speaker. Bonn apre midi Vis-Prezidan avek ou delegasyon.

Mr Speaker, ozordi apre midi nou pe delibere lo en

nouvo *Bill*, ki’n ganny depoze devan nou Lasanble pou aprouve. Ki en Lenstiti Nasyonal pou Kiltir Leritaz e Lar i ganny met an plas.

Dan lepase, mon kapab dir i annan Departman pou Kiltir. E in annan bann Minis, diferan Minis, ki’n ansarz kiltir, nou kapab dir i annan Minis ki’n vreman fer kiltir *shine*, nou kapab dir.

Petet in annan, ki’n annan son pli ba lo kote kiltirel, pou anmenn li a *la fleur*, ki parey dimoun ti anvi. Me selman in toultan tonm, anba en Minister.

Mr Speaker, dan diferan sosyolog, i defini kiltir dan diferan fason. Mwan mon pe get kiltir li menm kot, i en sistenm valer e krwayans, ki en sosyete i prodwir e ansenny, e ansennyen. I konpri bann diferan eleman parey langaz, lar, tradisyon, e rityel, striktir politik e ekonomik osi mon pou plas li ladan, lenstitisyon, e osi listwar.

Kiltir i anmenn dimoun ansanm e la parey nou pe gete, nou dan sa lasezon Kreol, ki pe refleri. E i en letan ler ou pe gete isi Sesel, kot i anmenn dimoun ansanm. E i osi en zouti tre pwisan, kiltir pou devlopman. E i anmenn linite osi mon vwar, parmi en pep. Sirtou ler nou rasanble,

ansanm pou nou selebre nou Kreolite dan tou son splander.

Ler mon'n fer sondaz, lo sa nouvo Lalwa ki pe vini Mr Speaker, in annan divers lopinyon. Par egzanp mon'n koz avek serten artis, i annan serten artis ki'n ganny sans vwar sa *Bill*.

E zot lopinyon i se ki, i byen i annan en lenstiti, i demande en lenstiti. Parkont i annan lezot akter, ki dan domenn kiltir, ki letan mon'n annan serten enteraksyon zot, mon'n koz ek zot, zot in annan serten konsern.

Serten petet, klarifikasyon, bokou klarifikasyon, bokou kestyon petet zot annan. In napa kantite negativite, me sa krentif, sa konsern i la.

E petet sa bann klarifikasyon li menm, i pou, mon pou bezwen met serten devan ozordi ki petet la, letan nou pou pe koz lo sa *Bill* i a ganny klarifye. Akoz sa bann dimoun zot pe ekoute.

So i annan ki dir ou ki, sa bann dimoun ki mon'n koz avek i dir ki, parey mon'n dir dan lepase kiltir in toultan tonm avek en Minister. E zot sa bann group dimoun, zot in santi ki kiltir in toultan dernyen.

Par egzanp, i annan en legzanp ki mon ti gannyen *Ministry of* - fer krwar ti *Ministry of Local Government*,

Culture and Sport or Ministry of tel, tel, tel selman i fini ek *Culture*.

Konmsi i dir toultan *Culture* i dernyen li. E, e se sa ki zot sa bann group dimoun zot in santi ki, petet kiltir in toultan, dan serten Minister in toultan pa tro ganny latansyon.

E dapre zot, letan sa lenstiti petet pou vin an mars pour zot, zot pe mazine ki petet i pou, i pou relev en pti pe kiltir, ki zot, zot santi aktyelman i ti pe perdi en pti pe.

E sirtou tou dernyerman la, pa ti ankor konnen ki mannyer keksoz pou marse, ki mannyer keksoz pou ete. E ti annan en gran group dimoun ki ti pe annan serten lenkyetid.

E i annan osi, ki'n fer resorti ki i neser ki kiltir i ganny sa latansyon spesyal. Akoz si non, zot santi ki mon osi mon santi, ki kiltir definitivman i devret ganny en, en latansyon spesyal. Akoz si non, nou pou perdi tou.

So i enportan, ki ler nou vin avek sa nouvo lenstiti, nou fer sir ki nou pe anglob, tou sa sekter ki tonm anba, ki nou dir kiltir. *Ok?*

Ler mon ekout Vis-Prezidan - mon pou vin, spesifikman lo sa bout Lenstiti Kreol, akoz mwan mon atas en gran lenportans avek nou

langaz, Kreol ki mon santi i devret kontinyen ganny promouvwar dan Sesel. I enportan sa.

E mon ti a kontan ganny en pti pe plis leklersisman, kot i konseren. Vis-Prezidan ou'n dir nou Lenstiti Kreol, prezan pou sanz son non li. I pou vin en Lakademi Kreol, Sesel.

Mwan dan mon pwennvi pou mwan, souvan ler nou tann nonm lakademi, i annan pou fer avek, formasyon. Ler mon tann nonm en lakademi, *ok?*

So, mon kekyon i, letan mon pe entervenir lo sa *Bill*, la, petet mon pe mazine, eski Lenstiti Kreol, pe al ganny en fonksyon petet, ansenny lalang Kreol? Eski i pou annan en *license*? Eski petet Lenstiti Kreol, si i pou koumsa, en lakademi, si i pe al donn serten lansennyman, i pe al ansennyen.

Eski i pa pou pe al antre an konfli petet, avek lenstitisyon ki ansenny Kreol? Par egzanp nou pe koz Minister Ledikasyon, *SITE*. Eski i pou soumet program letid, avek *SQA*? Sa i bann kekyon ki petet, ki demann klarifikasyon, akòz bokou dimoun petet ki dan sa sekter ki annan langaz Kreol aker, e ki annan Lenstiti Kreol aker.

Konmsi sa bann kekyon i ankor pe, pe vire otour zot, pou zot kapab ganny serten

klarifikasyon. Eski i pou kapab donn sertifika, si vre son, si an ka son manda, li menm pe al sanze.

Eski son manda i reste parey? Eski i kontinyen avek en, Sef Egzekitiv, i ganny en Direkter Zeneral. Ki mannyer son fonksyonman, li menm pou ete?

E Mr Speaker, letan ou get bann santer, artis zot menm ki performen. Bann ki annan latasman sirtou avek *NAC*, *CINEA*, sa bann group dimoun zot menm, zot annan en lot pwennvi zot.

Zot, zot pwennvi i dir ou ki sa, sa *Bill* li menm ki pe vini, i en *Bill* ki pou zot artis performan, artis performen li menm i vwar li ladan. Zot, zot dir ou zot vwar zot ladan.

Me parkont parey mon'n dir, i annan sa group ki ankor, dan dout, ki ankor pe mazine ki mannyer ki sa lenstitisyon ki pou ganny met an plas. Ki mannyer i pou vremen, pe fonksyonnen ki pou anglob zot tou?

So i fer ki Mr Speaker, mwan mon ti a kontan ozordi apre midi, Vis-Prezidan i donn nou en pti pe plis klarifikasyon detaye. Lo kote plizoumwèn - mon konnen i pou annan zot bann Polisi, zot bann keksoz ki zot pe vin avek, sa i apard sa *Bill*.

Me selman petet ozordi, leksplikasyon, ki ou'n vin

donnen la i en pe an gro. I demann en pti plis detayman, sirtou kot i konsern sa bann diferan Departman e diferan seksyon ki ou'n nonmen ki antre dan sa Lalwa.

Akoz la tou lezot Lalwa, NAC, Lenstiti Kreol tousala in fini ganny *repeal*. In fini ale sa. I pou ganny ranplase, par sa enn Lalwa, ki la.

So i demann ki nou ganny en pti pe plis lenformasyon ki nou rasir, reasir bann dimoun ki pou pe travay anba sa lenstitisyon. E ki mannyer, ki keksoz pou bezwen *run smoothly*.

Eski i pe kontiny parey? Ki lasirans ki petet nou pe donn sa bann dimoun poudir keksoz pou pe kontinyen, nou pa pe perdi nanryen dan nou kiltir. Keksoz pou pe kontinyen.

Akoz i annan vreman bokou, bokou dout la ater, ki nou pe mazine poudir tou keksoz pe vin kase, tou keksoz pe vin sanze. Nou pou bezwen enn pti pe plis, klarite ki petet a met lespri Seselwa ki annan kiltir aker, i a met zot lespri, anpe. So, mon pou fini la, Mr Speaker. Mon ava zis esper VP avek son larepons ki i pou pe donn nou. Mersi.

MR SPEAKER

Mersi Onorab. Mon a kontinyen demann bann Manm pou tay zot

lentervansyon pou, 10minit. Onorab Lemiel *right on the spot, thank you*.

Nou a pas lo Onorab Woodcock.

HON WAVEL WOODCOCK

Mersi Mr Speaker. Ozordi *Bill* ki devan nou pe etabli, en *Seychelles National Institute for Culture Heritage and the Arts*.

En lenstitisyon, parey in ganny dir, ki pou ankadre tou, tou bann, tou bann eleman lar, kiltir, ki pou ankadre kiltir, lar. Ki pou ankadre, parey mon'n dir tou form lar ki nou annan dan nou pei. Swa lar vizyel, mizisyen, bann artis, bann pent, bann poet, tou, tou laspe lar dan nou pei.

E enn bann rezon prensipal, bi prensipal aköz ki sa lenstitisyon pe ganny kree, rezondet, se aköz i annan en nesesite pour nou, met plis lanfaz, lo prezervasyon e promosyon nou kiltir.

In osi ganny fer resorti, VP in fer resorti ki, i annan en lenportans ozordi. Annefe nou Komite Medya Lazenés avek Kiltir ti ganny loportinite, pou zwenn avek *Mayor*, pou nou diskrit lo sa konseps. Lo sa lenstitisyon.

E en keksoz ki tou lede *Mayor* in fer resorti, ki nou osi dan sa *Bill*, ki VP in fer sorti, ozordi, se ki lenportans pou

nou tir politik dan kiltir. Dan sa bann lenstitisyon.

Annefe, anba sa lenstitisyon pou annan bann lezot antite anba la. Pou annan bann lezot seksyon, ouswa *Council* ki pou ganny etabli anba la. I bann antite, bann lazans, bann *Council*, bann seksyon ki deza egziste ozordi pe al ganny *repeal*.

E pou annan bann nouvo, ankadreman anba sa lenstitisyon, ki pou tous tou keksoz leritaz, lar, parey mon'n dir e lezot ankor. Mwan mon a dakor poudir i annan en lenportans, pou nou tir politik kot lar ek nou kiltir i konsernen.

Akoz annefe, sa in en gro problem dan lepase. Annefe menm nou Komite Medya, lo nou vizit ki nou'n fer Praslin, ler nou zwenn avek bann artis. E osi, bann Manm, mwan menm ler mon'n angaz avek plizyer lasosyasyon parey *SeyMas*, parey *PARFE*, lo Praslin. Ki travay direkteman avek tou form lar. Nou'n vwar zot in fer resorti en pe zot bann fristrasyon, e mekontantman.

Akoz dan lepase, dan bokou sa bann antite ki'n deza, ki ankor egziste ziska prezan, ziska ler zot pou ganny *repeal*, apre ki nou'n vot pou etabli sa lenstitisyon, ki mwan mon san poursan an faver.

I annan bokou defayans dan plizyer sa bann antite dan

lepase. Nou pou pran en legzanp *National Art Council* avek *CINEA*, zis pou nonm de. *CINEA*, nou'n vwar bann defayans kot i konsern bann lenfrastriktir ki'n ganny fer.

Parey sa Stad Lanmizik ki la, ki ti pou kout serten milyon. Finalman *in end up* kout 4 fwa, 5 fwa plis ki sa kou ki ti merit ganny depanse.

Nou'n vwar bann defayans, e mon kapab dir menm lenterferans politik, ouswa bann pratik kot serten dimoun, serten artis in ganny favorize.

Parey ler bann levennman in ganny fer, nou'n vwar i annan bann *Grants* ki'n ganny donnen dan lepase. I annan bann sonm, ki ganny donnen pou finans bann lasosyasyon. Si mon pa troupe anba *NAC* ti 500mil, koman lasosyasyon ti sipoze ganny sakenn, ti kapab ganny asiste avek en R50mil. E i annan bann lezot *Grant* ki'n ganny donnen anba plizyer sa bann antite.

Parey *NAC*, *case in point*, kot i annan bann konplent kot i annan serten lasosyasyon ki benefisye. I annan en bann ki pa benefisye. Ler bann levennman Nasyonal i ganny fer, parey Festival Kreol, ouswa bann, nou Lafet Nasyonal, ou vwar poudir i annan en gro kopo larzan i

ganny donnen avek en dimoun.

Li i bezwen, li i al organiz, bann mizisyen sa bann aktivite e sa bann mizisyen, sa bann diferan benn zot ganny *peanuts*. E en boug li i ganny en gro kopo larzan, e *at the end of the day*, ou demann kote larzan i ale.

E mon ganny konplent par lasosyasyon *PARFE* Praslin ki, i eksplike ki mannyer keksoz i deroule ler zot in fer bann gran, gro, gro levennman lo Praslin. Kot en dimoun Mahé i ganny kontra i ganny larzan. Apre i vin Praslin, i donn *peanuts* i donn en boug en pti zafer, ki pa ase pou li pey tou son bann mizisyen. Konmsi in annan bokou labi.

E ler ou'n gete bokou fwa ki ou'n vwar? Ou'n vwar bann menm dimoun dan lepase ki'n benefisyè! Ou'n vwar ki'n mank en lankadreman an plizyer group, plizyer kours nou bann artis, zot in ganny neglize.

Ler ou pe get parey lo Praslin, La Digue ou napa en *conservatoire*. Ou kapab dir sa en mini *conservatoire* pou devlope, pou *train*, pou ekip, pou larelev en nouvo zenerasyon. Nou'n vwar bann artis kot in konplent lo Praslin akòz zot napa landrwa pou zot *display* zot bann lar, zot bann

crafts, zot bann keksoz ki zot fer.

Nou'n vwar sa La Digue, Linyon, konplent ki nou'n ganny gannye dan nou vizit ki nou'n fer sa *weekend*. Bann artis i dir "mon napa en landrwa, pou mwan *display* mon bann prodwir *ok*? Mon napa loportinite."

Lo Praslin osi nou'n vwar. E zisteman la, nou pe pouse ansanm avek *Mayor* e osi avek Minister pou Enterprenarya, pou nou annan en landrwa lo Praslin ki kapab ankadre bann artis. Napa *kiosk*, napa galeri lo zil. Galeri kot bann artis i kapab vini *display* zot bann keksoz.

Konmsi in mank lenvestisman, konmsi in mank sa lenportans. Onorab Lemiel, in fer byen sorti poudir kiltir ti'n ganny met dan en kwen li. Kiltir in ganny atase ek plizyer Minister. In ganny anvoy isi, voltiz isi, anvoy laba.

Me selman in napa en lankadreman spesyal, pou li kot nou pe konsantre lo kiltir. Nou pe get artis avek en lize, pa get artis koman bann artis. Me annou get artis koman bann travayer, koman bann dimoun ki annan abilite, ki annan bann talan. Donn zot sa lenportans, ki zot merite.

Menm dan nivo ledikasyon, i enportan ki bann dan lekol bann zanfan i ganny angaze pou aprann bann

lenstriman tradisyannel. En konparezon mon kapab servi sa legzanp, i annan en lekol, ki fer sa tre byen Praslin Segonder.

Kot *PARFE*, bann artis parey mon mazin Bertin, parey *Sir Regis* pe ede, tou, sak *level* ki monte, segonder i kapab manrmay dan S5 i ale, nouvo manrmay i monte, i toultan annan enn de sa bann artis ki pe ede, pou *train* ekip bann manrmay pou aprann zwe lenstriman.

E nou kapab anmenn sa o nivo lekol, pou nou devlop, nou kiltir, pou nou devlop nou lar, pou nou devlop nou lanmizik tradisyannel, nou lanmizik Kreol, sega, moutya, kanmtole e lezot ankor.

Mr Speaker, politik in ganny zwe dan kiltir dan lepase. E nou bezwen tir politik, nou bezwen tir lapliferans, nou pa kapab toultan vwar menm dimoun ki pe tou kontra pou fer bann aktivite.

Nou pa krwar toultan menm artis ki mont lo *stage*. I annan bann artis ki'n ganny met akote, ki'n ganny neglize, ki ozordi i parey zot in ganny zet akote, konmsi en pake lenz sal.

Nou bezwen ankadre tou nou artis. Nou bezwen donn nou artis Sesel sa lenportans. E sa lenstitisyon mon santi i enn ki pou fer sa. E atraver

letablisman sa bann diferan, diferan antite anba sa lenstitisyon, mon santi ki i pou donn en nouvo souf bann artis, en nouvo souf tou bann form lar ki nou annan dan pei.

E mwan mon pa vwar okenn, *issue* okenn rezervasyon pou mwan siport sa lenstitisyon, aköz mon santi i annan plizyer defayans. Ki ozordi atraver sa lenstitisyon ki pou ganny etabli. I annan, pou annan sa *oversight*, pli ker, pli direk lo tou sa bann antite ki pou tonm anba sa lenstitisyon.

Ki ozordi malerezman, in mank en pe sa. Nou'n vwar bann labi dan lepase, kot i annan bann *Grants* ki ganny donnen pou ed bann mizisyen aste lanmizik.

Me selman lanmizik pe ganny aste zis en landrwa. Enn ler resi i vini, selman lenstriman pa'n vreman ganny aste. Nou'n vwar bann ka kot zis en bann asiste, en bann pa ganny asiste.

Konmsi nou bezwen, nou bezwen fer sir ki ozordi, menm nou pe koz larzan, Bidze, larzan ki ganny aprouve, par nou Lasanble Nasyonal, nou bezwen gete.

E la nou pou kapab, vwar kote sa bann larzan i ale. Nou kapab swiv kote sa bann larzan i ale, ki pou fer sir poudir, vreman bann dimoun ki bezwen ganny ankadre, sa

bann dimoun ki pe ganny sa bann servis, sa bann lasistans ki zot merite. Pour ki nou kapab ed nou kiltir, evolye, devlope, nou lar evolye, devlope.

E mwan mon santi poudir sa lenstitisyon ki ozordi, i devan nou i enn ki pou benefis tou bann artis ki nou annan dan nou pei Sesel. Avek sa de mo, mon dir ou mersi Mr Speaker.

MR SPEAKER

Mersi Onorab. Onorab Labrosse.

HON RICHARD LABROSSE

Mersi Mr Speaker. Bonn apre midi Vis-Prezidan ek ou delegasyon. Bonn apre midi tou mon bann koleg, tou dimoun ki a lekout. Espesyalman zabitan Plaisance.

Mr Speaker avan mon komanse, mon ti a kontan swet bonnfet Kreol tou Seselwa. Ozordi in vin en bon moman sa *Bill* ki devan nou, ki pe demann Lasanble pou etabli en Lenstitisyon Nasyonal pou Kiltir Leritaz ek bann diferan form lar.

Si mon pe konpran byen sa *Bill*, Mr Speaker. Se bann fonksyon administratif e osi bann Lalwa ki annan pou fer avek kiltir ek leritaz ki pou tonm anba en sel twa.

Kiltir in touzour ganny dekrir koman en fason lidantite en pep. Kiltir i osi donn nou lenportans sosyal, ek sa lenportans sosyal i met bann benefis ekonomik.

Dan konteks Sesel, nou devlopman kiltirel in avanse dan diferan fason. Bann artis ki nou'n konnen in, in evolye dan, zot in servi bann loportinite ki'n devan zot.

I annan menm bann ki'n al en pti pe pli lwen. E la menm devan nou, nou annan enn nou koleg dan Lasanble Nasyonal, ki menm deza ganny al pli lwen pou ganny en meday lor dan Zwe Lafrankofoni.

La osi ler nou pe koz lo kreasyon kiltir, nou pa kapab obliy bann osi Mr Speaker, ler nou pe fer en nouvo keksoz, mon konnen ki Departman Kiltir osi, pou ganny aboli, pou vin anba sa sel twa.

Nou osi mazin bann dimoun osi ki'n travay dir dan lepase osi ki'n ede pou etabli, ki pou fer sir ki pou bann fason kiltirel i ganny protez. E nou osi konnen dan lepase bann distrik osi, ti vremen aktiv dan bann aktivite kiltirel.

E sa nou'n vwar bann letan ki'n pase, la ou a krwar sa in, in ganny ranplase ouswa, zot pa pe ganny lankourazman.

E la mon ti a kapab profite osi pou dir la ek bann

dimoun ki pou'n pran sa nouvo responsabilite byento, pou kekfwa annou vin en pti pe pli, pros avek bann distrik osi. Vwar ansanm ki mannyer, nou kapab fer bann lesanz e osi kapab ganny bann nouvo fason fer.

Mr Speaker osi, mon ti a kontan met en pti pe lanfaz osi - mon konnen ki annan bann dimoun osi ki'n fer bann gran, bann gran *study* parey bann kour ki'n al liniversite dan bann domenn kiltirel.

Me selman ki mon'n santi mon'n koz ek enn de, zot pa'n vreman santi zot pe ganny lankourazman pou zot kontinyen dan sa domenn. I annan menm ki'n deza fini, abandonn sa ki zot al *study* pou al dan en lot domenn.

E la nou konnen byensir, ler *taxpayers money* in kontribye, pou en dimoun al etidye deor. I pe ekspekte li *return back* pou vin, akonpli sa ki'n *study*.

Me la ankor enn fwa mwan mon, mon lans - mon anvoy sa lager ankor lo sa bann dimoun ki pou vini. Ler nou pe marye tou bann zafer kiltirel ansanm, annou pa bliy osi bann dimoun deor ki pou kapab koste, pou kontribye.

La mon pe koz ankor enn fwa pou bann zenn. Ki parfwa nou ganny dir, nou pa pe, nou pe kontribye ase dan nou bann aktivite kiltirel.

Mon'n vwar osi dan *Bill*, zot pe koz osi lo sa *Advisory Board*, ki son rol se pou *advise* Sekreter Zeneral lo bann Polisi ek bann lenportans ki sa konsey li menm i pou annan.

E la ankor osi, mon pou met en pe ankor lanfaz. Mon pa vreman konnen ki mannyer sa, sa *Advisory Board* li menm pou vini, mon zis ganny en konpran ki i Sekreter Zeneral pou ganny apwente par Prezidan.

E la ler nou pe rod bann, annou konmsi annou fer sir ki nou ganny bann dimoun kalib ki pou pran sa bann pozisyon konmsi. Akoz dan lepase ki nou'n vwar? I annan bann dimoun kekfwa ki zot pa'n vreman annan lentere dan bann, dan bann pozisyon ki zot in ganny mete. E sa li menm li in met serten retar.

So la, mon krwar la mon dan sa domenn parey mon krwar nou bezwen les, enn pti pe plis sa avek bann dimoun dan la domenn kiltir. E mon krwar mon'n tann Vis-Prezidan, taler dir osi zot pou al, zot pou desann en pe lo sa laliny.

E Mr Speaker, pou konklir mon ti a kontan osi, an bref ler Vis-Prezidan osi, taler mon'n tann resorti par lezot Onorab lo sa *Creole Academy*, ki'n vreman, in tous mwan en pti pe dan sa *Bill*, parmi tou lezot.

Rezon ki'n tous mwan parmi sa *Bill*, mwan ler ou pe dir *Creole Academy*, mon pe mazine kekfw, lo en laliny. Mon pa konnen si dan le fitir Gouvernman i kapab konsider lo la, kekfw ler nou pe koz *Creole Academy*.

Annou donn li son vre lenportans la ki nou, *why not* annou atas li avek Liniversite Sesel. Mon krwar pou mwan la i ti ava - sa en sizesyon en. Konmsi ti ava atas li pli byen laba, kot la kekfw nou ti ava ganny en pti pe plis devlopman, kot vre Kreol, lalang Kreol li menm dan son totalite, ti ava ganny son plas li osi dan sa liniversite.

E Mr Speaker pou konklir, mon kapab dir mon pou donn mon *full* sipor, sa *Bill* pou kontinyen avek program, pou kontinyen protez nou bann leritaz e osi, pou siport bann artis Seselwa. Mersi.

MR SPEAKER

Mersi. Mersi Onorab. Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker, bonn apre midi Vis-Prezidan, AG, Mer Lavil, avek *PS* Kalebi.

Mr Speaker, mon lentervansyon pou kourt apre midi. E parkont mon *still* anvi tous lo detrwa, pti, detrwa pti

size petet ki mon krwar i enportan ki bann dimoun deor la. Nou dan Lasanble, nou, nou tenir kont.

E bann dimoun deor osi ki pe ekoute, sirtou bann dimoun ki dan sa domenn kiltirel, lar e tou bann keksoz ki anglob dan sa domenn, i enportan ki zot tande.

Mr Speaker, apre 43an ki Sesel in valoriz nou kiltir, par donn li en lenportans pli o nivo, dan tou lenstans. Anba en Minister ou en Departman, kot bann Polisi i ganny devlope. Bann Polisi i ganny fer, pou devlopman kiltir, kiltir Kreol e kiltir Seselwa.

Ozordi nou war en sanzman, dan fason fer. Nou ekspekte en sanzman dan fason fer, aköz zot in dir nou poudir zot vin fer sanzman, zot ki la, zot ki *run border*. E dapre zot, Seselwa in donn zot sa mazorite lannen pase, pou fer sa bann sanzman.

Wi, wi in donn zot sa mazorite. Dan sa semenn Mr Speaker ki nou'n antre ladan, kot nou selebre, nou Kreolite ozordi. Nou ganny prezante ek en striktir ki fer mwan en pti pe enkyet.

Nou depar *from* en striktir kot i annan Minister, departman ek bann lazans. Dabor se en striktir, e kwa ki fer li drol se ki, nou konnen poudir ler nou ti antre dan Program *IMF*, *IMF* ki ti - pa

egzize, me ti *advice* nou pou nou annan en striktir, kot nou tir politik.

Or nou tir pouvwat, parey mon'n toutan dir dan lanmen, Minister, fer bann Lazans, kree bann Lazans keksoz i pli efektiv, keksoz i bouze, e nou vwar less lenterferans.

Me ozordi nou vwar en pti pe diferan. Kot tou keksoz i ganny anmenn ansanm, anba en *super* lenstiti. Enn bann rezon, dan Lalwa ki'n ganny etabli akou nou pe fer sa, se pou retir politik dan tou domenn kiltir e kiltirel.

Mon demann mon lekor, selman Prezidan, Prezidan en politisyen, nou'n vwar nou tou nou konnen Prezidan ki son kapasite politik, ki mannyer i fer politik. Prezidan ki pou a latet.

Akou Konstitisyon i dir ler, okenn portfolyo pa ganny donnen avek okenn Minis, se Prezidan ki pran sa responsabilite.

So tou keksoz i ganny met anba en sel dimoun. Prezan dan sa lenstiti mannyer in ganny kree, pou annan en Sekreter Zeneral, ki si mon pa tronpe i pou ekivalan a en Sekreter D'Eta. Sekreter Zeneral.

Kestyon deor Mr Speaker. Detrwa kestyon. Ki arive ek tou sa bann Lazans, *ok?* Nou konnen poudir Act i

dir poudir zot pou fonksyon, pou tonm anba sa lenstiti.

Me ki arive ek tou sa bann Lazans, tou sa bann *Boards*, ki ti pe zer sa bann Lazans. Tou sa bann fonksyon ki zot ti pe fer. E ki mannyer nou vwar lefikasite, ki mannyer zot pe ekspekte vwar lefikasite, ler tousala in ganny met ansanm. Met anba en sel twa, anba zis en sel, direksyon.

Petet i annan pou dezagree ek mwan. Me mwan mon get li koumsa mwan. Pou bann dimoun ki'n swiv en pti pe *management*, *it goes against* tou bann, pti pe bann prensip *best practice management*, kot i dir ou *leaner is better* dan sans lefikasite.

I annan dimoun ki krwar, pli, i pli bon i pli sa, keksoz i pli marse. E bann, bon prensip *management* i dir ou *leaner is better*, pli efektiv. Fer keksoz mars pli vit. Me sa nou pou reste pou vwar akou, *Bill* i la, avek sa mazorite ki zot annan. *Unless* en keksoz mirakilez i arive. *Bill* pou pase.

So nou ava gete, avek letan ki mannyer sa pou deroule. I annan en lot konsern deor Mr Speaker, se bann *staff*, bann *staff*. I annan diferan nivo *staff* dan sa, bann diferan lazans partou. I annan bann ki ti nivo *CEO*, menm

dan Departman nou annan PS.

I annan bann diferan lezot nivo. Ki pou arive avek sa bann *staff* ler sa bann lorganizasyon nepli egziste parey zot egziste?

Eski petet ler zot fer larepons, zot kapab dir nou, zot anvizaze gard tou *staff*? Zot anvizaze *streamline* en pe sa bann zafer, pour petet fer li pli efektiv?

So bann *staff* deor, i bezwen konnen akòz i annan ki pe eksprim serten lenkyetid. *Uncertainty* deor, dout parey Onorab Lemiel in dir, i annan. I annan osi ki dir ou petet zot krwar i pou pli bon, mon pa pou zis negativ mon pou dir i annan dimoun petet ki krwar i pou pli bon.

Me i annan sa dout deor, lo ki pou arive avek mon lanplwa ozordi. Letan ki nou pe vwar sa bann kalite sanzman. So i enportan ki sa i ganny adrese. E si zot pa'n konsilte avek bann *staff*, i enportan ki i annan serten nivo konsiltasyon avek bann *staff*, pou kapab met zot lespri anpe, zot a konnen ki manner zot bouz de lavan.

I osi annan en lot konsern, Mr Speaker. Bann diferan akter, dan domenn kiltir, zot osi zot dan dout. Pa tou, nou bezwen admet pa tou. Zot dan dout ki manner

keksoz pou bouze, *from now on*. Pa tou.

Me i annan ki pe dir, eski sa nouvo formil ozordi la ki manner pe ganny anmennen. Eski i *the right* formil? Eski i pou marse? Eski nou pa pou vwar, pouvwar konsantre tou dan lanmen en serten group. E ler zot ganny *absolute* pouvwar, keksoz pa mars parey pe anvizaze?

E keksoz pa pou bouz, parey nou ti a anvi i bouze, ki ler sa bann pti lazans ti endepandan or sa bann lenstiti, ti endepandan. Pa endepandan ki manner, me selman zot ti fonksyonnen en pti pe, *at arm's length* avek Minister, kot keksoz ti kapab. Ti annan en *Board*, keksoz ti kapab ganny - desizyon ti kapab ganny pran lo nivo *Board*, tout an swivan Polisi.

So now you have one super entity. E tou keksoz i ganny pran santral. So zot en pe konsernen e mon krwar i enportan ki nou osi, met zot *at ease* lo sa kote.

Mr Speaker, parey mon'n dir, sa konsern groser lazans la - sa *super* lenstiti la, i enn ki nou bezwen veye, nou bezwen gete, nou bezwen kontinyelman analize, e get son performans.

Akòz, i pou nouvo, i pou nesaser ki, petet nou *as much as possible*, pa *deviate* en pti pe *from* lafason fer. Pou kapab

donn bann diferan akter, dan sa sekter konfidans ki, keksoz ki pe anmennen, pe anmenn pou le meyer.

Mwan Mr Speaker parey mon'n dir - ler mon get tousala, mwan personnelman, mon pa *convince* ki sa i le meyer striktir pou devlopman kiltir Sesel. Mon pa *convince*.

Mon krwar ki tou i antre ansanm, i tro gro, pouvwar i konsantre anler e mon krwar i pou *disastrous* pou Sekter Kiltir. Me letan, *time will tell*. Nou a gete, sanzman arive. Zot pe anmenn zot sanzman. E mon ekspekte, *sorry* mon espere, ki i pa lakiltir Sesel, Seselwa ki soufer. Avek sa, Mr Speaker mon pou aret la.

Me solman mon pou, parey mon'n dir, mon rezervasyon mon annan dout lo sa striktir ki'n ganny met an plas ozordi. Mersi.

MR SPEAKER

Mersi Onorab. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Pou dir zot laverite. Lendi letan mon'n vin kot Lasanble, nou *Caucus* ti pe zwenn bomaten, ziska Lendi apre midi mon ti reste konvenki mon ti pe al *abstain*, lo sa Prozedlwa. Pour rezon ki mon ava retourn lo la apre. Me apre nou'n, diskite. E mon pa konnen si i mon responsabilite

pou dir, me selman, ler mon'n koz ek *LGB*, e dan *Bills Committee meeting*. Nou'n koz avek *Attorney General* e osi *Monsieur Le Maire* ti la.

E zot in, dir avek nou ki. Sa Prozedlwa *in the next twelve, twenty-four months*, sa ladministrasyon pou pe get sa Prozedlwa, pre. Parski kiltir, i pa en keksoz statik. Mon pou servi kiltir la, zis pou en *blanket coverage*, dan deskripsyon leritaz, lar e tousala. E i pou bezwen reganny regarde ki mannyer, *how effective this structure is*. E si i bezwen aziste, i pou aziste.

E alor lo sa lasirans, ki pa'n ofisyel. Mwan mon'n *privy* dan konversasyon. Mon pou donn siport, aköz *we need something to start with*.

Nou bezwen en kek par pou komanse. Me ou konnen, si sa, sa lensititye bann dimoun ki ganny konfyte responsabilite a en moman. Par egzanp letan Bidze i vini, zot pou'n re al travay lo zot stratezi, (mannyer i apele sa dan Bidze)? *Strategic Priorities*, e zot vini zot dir avek nou, nou le fer kiltir, ouswa kiltir leritaz, lar annou apel li Lendistri Kreativ, vin katriyenm pilye nou lekonomi, mon vin enn zot gran zanmi.

Zis parey defen Dr Steve Fanny, en fwa ti dir lo televizyon e mon ti *admire*,

admir li en kantite pou sa, i ti dir ki dan son kapasite koman *CEO Seychelles Financial Services, (FSA)* i ti anvi sa lendistri vin nimerò enn, dan Sesel.

Se sa kalite lanbisyon mon oule, bann dimoun ki ganny konfyè sa responsabilite, i vin avek. Akòz sa i pou bon pou nou? Koman en pti pei, nou bezwen komans mazin diversifikasyon nou lekonomi, nou bezwen komans mazin plis ki mannyer nou pou atir plis viziter vin se nou, nou anvi, nou anvi ki mannyer nou, dimoun i koz nou dan bon fason.

Poudir nou en *vibrant cultural scene*. Ou vin dan lavil i annan kafe, i annan bann artis partou dan bann kwen, dan bann kominote, zot kapab eksperyans kisisa Sesel. Non pa zis reste dan en lotel *five star*, repoze, *tan*.

Non konmsi, pou nou bann ki'n ganny sans vwayaze, zot pou konnen ki mon pe dir. Ou al dan bann gran kapital, kot i annan galeri, i annan kafe, i annan bann performans, bann teat, sa ki nou apel pyes teat.

Konmsi pou mwan, koman en dimoun ki, *the new Seychelles*, sa sanzman. Apre Oktob 2020 *this is what* mon anvi, nou dimoun konmsi i eksite pou vwar, en

renouvelman, en renesans kiltirel!

E si letan zot vini pou Bidze, zot ale la avek striktir ki, nou ava aprouve. E zot vin avek sa, mon pou enn zot bon zanmi e mon pou ankouraz, ankò otan dimoun, pou vin dan mon pei.

Depi sa, de zour la i annan en bann sanson ki pe zwe dan mon latet. I annan sanson *Scale*, ki sante "vini, vini, vini, vin dans ek nou", dan - Prezan i mansyonn tou sa bann landrwa ki alors en zour ti annan bal. Nou pep konmsi ti viv dan en *joie de vivre* ki ti ganny siporte par tou sa bann keksoz ki ti annan.

Letan Sony Morgan i sante, "les lanmizik roul dan lavil, zwe kanmtole ki ou zwe partou dan kwen semen, les triyang rezonnen byen for" *this is what* mon anvi, mon reve, Sesel i ete.

Mon reve ki bann touris i vini, bann sit, bann *trails*, zot kapab, *cultural tourism*, i ganny siporte par sa lenstiti ki pe ganny kree.

Nou anmenn zot marse dan montanny, zot aret en landrwa, manz en manze Kreol, vin dan nou distrik, aprann ki mannyer i kwi ladob. Al dan *studio* avek Tony koman en mizisyen, i montre zot ki mannyer pou kapab zwe en sega. Sa kalite keksoz.

E ki pou anmenn en, en keksoz an plis dan lekonomi. Parske ler nou pe get bann pei, par egzanp *Maurice* la obor nou. I dir nou ki zot lendistri, kreatif i apepre R14bilyon Morisyen ouswa 3.5poursan son *GDP*.

Nou de pouvwar kolonyal avan Langleter £10.47bilyon, *La France* €91.4bilyon. E sa lar vizyel, lanmizik, bann keksoz koumsa. Dernyen gran spektak ki mon ti ale Mr Speaker, sete *Alpha Blondy* dan Stad Lanmizik.

E mon'n zwenn en bann etranze, ki mon'n koz avek, ki'n vin Sesel lo vakans spesifikman, pou regard *Alpha Blondy* isi Sesel.

E si nou get pre avek nou, o bor nou *Dubai*, i enn sa pei osi ki'n diversifye son lekonomi. In anmenn sa ki mon pe koz lo la pou promouvwar *creative industry*. Akoz dimoun i sorti partou dan lemonn i vin *Dubai*, pou vin regard bann gran spektak, pou vin regard bann - la anfet pe deroul sa levennman la, *EXPO*. Leta, Leta *Dubai* i sponsor bann *film*. Anmenn bann gran akter, vin fer *film* se zot.

Ou vwar savedir, mwan pou mwan sa ki mon anvi vwar a lavenir, se ki Gouvernman li i konsantre *in the politics of culture*. Konmsi i donn bann Polisi, i diriz Polisi. I met sipor

finansyel, parey nou manifesto i dir - pa krwar nou napa en plan en!

I ekrir ladan la, "*culture enriching life and strengthening national unity*." Sa ki pe rod plan, lir sa dokiman enn ler. Prezan Leta i donn tou sa bann sipor, sa bann pontir. Annou apel li pontir pou asire ki sa lendistri, kreatif i solid.

Me sa ki pli enportan, se ki sekter prive, i bezwen pran son rol. Ou vwar, Lendistri Kreatif, *this is where* nou kapab batir, fer kree, larises e ki mannyer nou pou fer sa? Nou bezwen sanz fason keksoz, ki nou ti pe fer. Mannyer nou ti pe fer.

Vin pli kreatif, asire ki i en lanvironnman konpetitiv, reevalye bann keksoz ki nou ti pe fer. Kwa ki nou kapab fer diferan. Re-avant nou lekor, mazin o *de la* nou lafrontyer. Diversifikasyon.

Mon ti pe deza koz ek Patrick Victor en fwa. Mon dir, mon dir li "Ton Pat ekout byen mannyer nou lanmizik, i pre avek lanmizik Endyen" mazin, dan en sega Jean Marc Volcy, ou met en sitar ladan.

Akoz? Ou pe mazin, ou kapab al *market* sa lanmizik dan Lenn. Laba en gran marse, *so this is the sort of thing*, ki mon pe ekspekte, sekter prive, i *take over* e pa ekspekte ki Gouvernman

atraver sa lenstiti ki pou fer tou keksoz.

E legzanp ki mon ti pe donnen sa semenn, se ki ozordi pilye nimerò enn ekonomik Sesel se Minister, se tourizm. Me Gouvernman pa dan biznes lotel li. Solman sa lendistri pe *flourish*. Lapes i dezyenm, Gouvernman napa bato, *yet* lapes e *Blue Economy* pe *flourish*. *Financial sector* i parey.

So si *creative industry*, bann dimoun dezormen, zot pran li a *coeur* e zot dir avek sa lenstiti ki pe kree la, sey regard striktir sa de Minister, *Tourism and Fisheries* ki mannyer i pe marse, kot Gouvernman i vin sa fasiliter.

E i asire, ki bann *Policies* ki met an plas, nou sirmont tou sa bann defi ki dan lepase in met nou en kantite retar.

E nou, osi asire poudir son devlopman, *from this day forward* i enklisiv. Nou pa kit personn swa akote, swa par deryer. I annan en vizyon kler, kot tou dimoun i konpran e siport kote nou pe ale. Nou annan menm dezir, pou anmenn nou Lendistri Kreativ, pli devan, ki i ava termin par, par, i ava triyonfe.

E par travay ansanm pour ki, nou Lendistri Kreativ, vremen Mr Speaker i ava vin sa enn ki nou tou nou ava fyer. E la mon ava, mon ava dir ki,

sa lenstiti pou bezwen vremen travay an kolaborasyon avek Minister Tourizm, akòz li i pe koz lo *cultural tourism*.

Minister Zafer Etranzer, ki mannyer nou kapab *tap into* bann kolaborasyon avek bann lezot pei, bann lesanz kiltirel, kot nou kapab aprann avek zot, anrisir sa ki pou nou.

Minister Devlopman Kominoter ki mannyer nou kominote i kapab vin o sant lavi, lendistri kreativ. E mon ava termin lo sa bann propozisyon swivan Mr Speaker;-

Bann dimoun ki pou ganny konfyè bann responsabilite, nou pe ekspekte en depar sanzman nouvo, inovasyon kreativ. Nou pa pou kapab *complacent* e fer keksoz, parey nou ti pe fer avan. *Business as usual*. Nou pa pou kapab aksepte sa.

Akòz ler mon get li, lenstiti mannyer nou pe ganny striktire, parey Onorab Cosgrow in dir, i kapab ganny vwar koman en pe lour, en pe *heavy*. *A heavy structure*.

Be si ou napa bann dimoun ki vit pe mazine, pe kalkile, pe fer en keksoz marse, ou riske ganny, kale deryer. E mwan personnelman, mon siport propozisyon ki Onorab Manm Elekte distrik Plaisance Richard in fer. Labrosse, ki mon'n dir mwan Richard. Wi,

Richard Labrosse, menm dimoun.

MR SPEAKER

Ale Onorab, 12minit. *Wrap-up*.

HON GERVAIS HENRIE

Mr Speaker se ki lakademi Kreol, mon krwar i ti pou byen bouz avek lenstiti, avek *UNISEY*. I ti pou byen ki i bouz avek *UNISEY*. E an menm tan, kekfw *panel* i kapab reflesir lo, litilizasyon sa mo 'lakademi *versus* lenstiti.' Ki vreman enn ek lot (pou Kreol sa), i reprezante. Son definisyon vreman i pe ankadre, sa ki lentansyon pou tir li koman lenstiti e fer li vin lakademi. Eski vreman sa ki zot ti pe mazin lo la? Mon ti ava aret la, pou lemoman Mr Speaker. Mersi.

MR SPEAKER

Mersi Onorab. Onorab Andre.

HON CLIFFORD ANDRE

Mersi Mr Speaker. Mr Speaker parey, Onorab in in komanse, mon osi mon ti annan serten rezervasyon. E mon ankor annan serten rezervasyon.

An referans avek, avek sa *Bill*. En kekyon ki mon pou demann Vis-Prezidan, ki mon ti poze dan miting *Bills Committee*, se dir mwan ki diferans pou annan?

Akoz, ki lefikasite pou pran an konsiderasyon bann

keksoz ki Onorab Woodcock in dir dan son lentervansyon. I pou pli bon, ki i ti pou ete ki si it i ankor anba en Minister?

Mon pa ankor konpran, sa eleman, kot nou dir nou pe tir politik dan kiltir. Mon pa ankor konpran. Mon'n sey anmenn mon lekor pou analize, pou sey vwar kote. Mon pa ankor ganny sa repons, kekfw *VP* dan ou repons, ou kapab eklersi mwan lo sa size.

Akoz mon dir sa se ki, si nou pe dir de-politiz kiltir. Eski sa i vedir ki nou pou anpes en santer letan ariv kanpanny politik, al sante dan en parti politik? Mon krwar pa.

Rezon aköz mon met li koumsa, se ki ou konnen nou dir militer i pa devret aktivman demontre son afilyasyon politik. Ler i al vote, i vot sa ki li anvi aköz sa i son swa konstitisyonnel. Me selman letan i pe travay, i travay moman en solda, i pa travay koman ni en solda 'x', oubyen en solda 'y' parti politik.

So mon ankor pe sey konpran sa laspe aköz nou dir ki nou le de-politiz, oubyen de-politiz kiltir. E ki si i pa anba en Minister i vedir i pa politik.

Onorab Cosgrow in fer sorti en pwen, ki mwan mon tant pou tonm dakor avek. Me en keksoz ki mon oule dir avan i al lo sa pwen ki'n dir, se, letan nou an mazorite, i pa

vedir ki nou napa demokrasi dan nou mazorite.

Mon le, mon le fer sa kler, i vedir ki - si mwan mon annan en pwen, ki mon santi for avek, ki *depart from* sa ki kekfwa, detrwa mon bann koleg i annan, napa nanryen dan nou mazorite ki anpes nou, eksprim sa pwen. E poudir aköz, nou krwar ki sa pwen i valab, menm si i en sel dimoun.

Nou ti vwar dernyen fwa letan, nou ti pe asiz lo kote Lopozişyon, menm si nou ti annan plis ki *US*. Me selman Manm ki ti santi for lo en Lalwa i ti eksprim son pwen, e i ti vot *according* son konsyans.

An dizan sa Mr Speaker, pou al lo pwen ki Onorab Cosgrow in fer sorti, se ki letan nou pe dir de-politize, li selman i pou tonm anba parasol Prezidan.

E nou, nou pa kapab kasyet nou lekor poudir en dimoun ler i vin Prezidan, i en politisyen. Sesel nou pa ankor ganny en dimoun ki li in met son kandida endependan, ki'n arive ganny elekte koman en Prezidan.

Alors, nou, nou bezwen tonm dakor ki poudir, *no matter what we say or what we do*, eleman en Polisi politik, pou bezwen antre.

Mon dezyenm pwen, an referans avek sa laspe ki nou

pe sey gete, letan mon gete dan seksyon 6, sa *Act*, sa *Bill* ki devan nou. Nou pe koz lo, *sorry* seksyon 5. I annan en *Advisory Council the National Institute*.

E ladan ki mannyer in ganny formile, se ki pou annan en *Advisory Council*, i annan en Sekreter Zeneral, avek lezot manm ki pa mwens ki 8, me pa plis ki 10 ki pou ganny nominen.

E lafason ki zot pou ganny nominen, Sekreter Zeneral avek son manm i pou ganny apwente par Prezidan. *Ok*, i annan en serten, en serten lamannman ki pe ganny propoze ki, ler nou annan lamannman, nou ava fer.

Parmi bann dimoun, bann *eminence*. "*A person of eminence and integrity having qualification or experience in the development, preservation or promotion of culture, heritage and the arts of Seychelles*".

Mon konsern la se letan nou pe get *Board SBC*, *Board SBC* Mr Speaker, dan Lalwa *SBC* i dir nou ki, "*The Board shall consist of a Chairperson, Vice-Chairperson and seven other members*". Sa ti an 2017, letan nou ti amande.

"*Others members, all of whom shall be appointed by the President, in the following manner. Chairperson, Vice-*

Chairperson and one member shall be appointed by the President selected from a panel of three candidates for each category, proposed by the Constitutional Appointment Authority in accordance, with the conditions set out below". E i donn ou bann kondisyon.

Mon koncern la, se akòz sa *Advisory Council*, pa pe ganny apwente. Napa problem i ganny apwente par Prezidan, Prezidan i *Sef D'Etat* i normal.

Me selman akòz nou pa donn loportinite, okenn artis, okenn dimoun, ki annan leminans dan sa bann domenn ki ganny mansyonnen. ki zot osi, zot osi zot ava ganny en swa, en loportinite plito pou zot fer en laplikasyon.

E CAA, *well* si nou dir CAA. Mwan mon prefere ki CAA, i ava propoz trwa dimoun avek Prezidan. Swa Prezidan, i Prezidan i ava apwent sa dimoun, akòz i bezwen fer sa.

Me selman letan nou pe koz, mon lopinyon letan nou pe koz, pou nou tir politik. Si nou pe dir sa i lakle. Annou, get partou dan sa Lalwa.

Mon pe dir koumsa akòz, mon oule ki nou, ki nou vwar li dan sa lespri.

Ki manner, akòz se sa ki nou, nou ti *advocate*. Letan, mon pa oule mon bann koleg ki vin dir sa. Mon prefer mwan

ki dir sa. Letan nou ti pe asiz dan sa kote latab, koman bann dimoun dan Lopozisyon, nou ti dir, ki poudir, Prezidan oubyen Minis si i fer lapwentman, i vin politik.

Ozordi mon pou demann VP, pou eksplik nou, akòz ki safwasi, oubyen la. Ek sa nou pe dir en lenstiti ki pou pran apepre 5 antite ki *deal* ek kiltir. Ki parey Onorab Henrie i dir mon'n dir kiltir, menm si lar e lezot form ki ganny mansyonnen.

So akòz nou pa, nou pa fer li koumsa? Ki i ava donn sa lendepandans, lendepandans an term lapwentman menm si Prezidan ki pou annan son *final say*.

Me selman i ava permet. Mwan si mon santi mon anvi al, vin Sekreter Zeneral, mon kapab *apply*. Mon santi mon annan leminans, dan kiltir, dan sa domenn.

Alors mon fer mon aplikasyon. E mon fer mon *interview*, i ganny selekte, parey Zidisyer. Zidisyer *still* Sef *D'Etat* ki responsab, pou tou lebra Gouvernman.

Me selman pou en Ziz ganny apwente, i bezwen fer son laplikasyon, *pass through the process*, e i ganny apwente. *Swear in*.

So annou reget en pti pe, lafason ki serten sa bann keksoz i ganny fer pour ki nou

ava kapab osi anmenn bann, bann eleman ki enportan.

E lot pwen, ki nou'n tous lo la, se ki letan nou gete, Minister, L'Egzekitiv i fer bann Polisi. E la, letan nou gete anba, anba seksyon 4. *National Institute* li i pou *formulate* bann *Policies*.

En kestyon ki mon'n demande ki mon pa ankor satisfè avek larepons, se ki eski L'Egzekitiv ki *formulate Policies*? Manner mwan mon gete se koumsa devret marse, e i anvoy kot sa bann lenstitisyon.

Annou get *SFA*, se Minister Lapes ki *formulate Policies* Lapes, Polisi Lapes. E *SFA* li, i aplik sa bann Polisi Lapes. Definitivman letan i pe aplik sa bann Polisi, li annan serten lareg, ki i bezwen met an plas.

Gouvernman i dir, nou bezwen annan *VMS* lo tou bato. Gouvernman pa pou al dir ki manner, ou pou met *VMS* oubyen ki manner ou pou fer laplikasyon pou ou ganny *VMS*. Li in dir ki *VMS*, i bezwen ganny mete lo tou bato.

SFA li, prezan i al sa bann, sa bann *nitty-gritty*, sa bann detay pour li kapab fer sir ki *VMS* i ganny mete lo en bato. E ki manner i ganny *operate*.

MR SPEAKER

Ou pe al lo 12minit Onorab.

HON CLIFFORD ANDRE

Se sa ki mon pe dir. Wi Mr Speaker, mon ti krwar aköz detrwa semenn, ki mon pa'n la, Mon a ganny en pti pe plis letan. Selman pa fer nanryen.

Mon ti a kontan *VP* i tous sa bann pwen, e nou gete ki manner. *At least* mon kapab donn mwan sipor, si pa *abstain* parey Onorab Henrie ti pe fer sorti.

Me selman mon krwar, konsep pa mal. Me selman i annan serten keksoz ki nou bezwen, nou bezwen eklersi lo la. Avek sa de mo Mr Speaker, mon a remersye ou.

MR SPEAKER

Mersi Onorab. Mon krwar nou a pran en poz la. E nou a rebran travay 5er 05. Byen. Mersi.

(BREAK)

MR SPEAKER

Bon pou kontinyen mon ava apel Onorab Gabriel. En moman silvouple. *LGB* wi.

HON BERNARD GEORGES

Mersi Mr Speaker. Avan ki Onorab Gabriel i pran laparol Mr Speaker, avek en lizye lo letan, sa ki nou'n propoze *Attorney Zeneral* avek *Bills Committee* e mwan menm, e probableman si lo kote

Lopozisyon i anvi anvoy en Manm, se nou ava, ou ava eskiz nou pou 10,15 minit.

Nou ava regarde, ki kantite sa bann *minor amendments*, virgil eksetera ki *panel* i pare pou aksepte.

Dan en fason ki ler nou re-antré i ava zis bann, bann amannman en pe pli mazer ki, nou ava pas dan Staz Komite.

MR SPEAKER

Byen mon krwar sa, i ti en propozisyon ki ou ti fer dan ABC. Ki nou pa ti konklir lo la, me ti propoze. Ou dakor avek sa Onorab Pillay?

HON SEBASTIEN PILLAY

An prensip, si *Bills Committee* ki pe, ki pe zwenn. Onorab Gabriel ki nou Manm, enn nou lot Manm pe al koze. E nou annan Onorab Gill ki enn nou lot Manm lo *Bills Committee* ki li i pa pe entervenir.

So Onorab Gill, i ava *attend* sa miting lo nou *behalf*. Mersi.

MR SPEAKER

Tre byen. Alor sa ki nou a fer. Nou a pran deba, ki reste. Apre nou a pran en *technical break* 15minit, 20minit e nou a rezwenn.

HON BERNARD GEORGES

Nou ava retournen Mr Speaker aköz mwan osi mon ti a

kontan dir de mo lo sa lo sa *Bill*.

Me antretan, *by the time* ki lezot i a fini, mwan mazineen nou a fini sa letan.

MR SPEAKER

Byen. So zot le al fer sa legzersis la konmela la, pandan ki nou pe kontinyen avek deba? Tre byen. Manm *Bills Committee*.

(MEMBERS OF BILLS COMMITTEE WERE EXCUSED FROM THE HOUSE)

MR SPEAKER

Bon nou a kontinyen avek Onorab Gabriel. Wi.

HON CONRAD GABRIEL

Yes, mersi Mr Speaker. Bonn apre midi VP ek ou delegasyon. Bonn apre midi tou dimoun a lekout.

Premyerman sa *Bill* ki'n anmennen pou demann nou set, nou pe demann serten kestyon pertinan dabor. Premyerman kwa ki egzaktaman nouvo Polisi Gouvernman LDS, lo kiltir leritaz e lar?

Dezyenmman eski, kiltir in pran en plas prominan dan devlopman nou pei ozordi?

Trwazyenmman, eski nou bann dimoun dan kiltir, dan lar konpri nou bann artis, pent, mizisyen e lezot akter, in

ganny konsilte lo sa proze Lalwa?

Mr Speaker, sa bann kestyon i enportan zot ganny reponn, pour ki nou pep i konpran tre kler kote Gouvernman i oule ale avek sa Lalwa.

Mon senserman krwar ki en pep pa egziste san son kiltir. En pep pa kapab viv san valoriz, son kiltir. Akoz en pep san en kiltir, i en pep san en nanm. E byensir san son *soul*, Mr Speaker.

Sa ki fer nou sa ki nou ete koman en pep, i sakre pou nou lo sa kote latab. Nouvo Polisi ki pou diriz nou kiltir, i bezwen enn ki promouvwar nou lidantite koman en pep. Ladministrasyon aktyel, i paret pe fer sa ki Konstitisyon i dir.

Se annan en dimoun responsab, bann diferan portfolyo ministeryel e pou koriz en *lapses* dan zot planifikasyon, nou vwar en lenstitisyon ganny kree.

Me problemm avek sa, se nou kapab ganny detay lo ki mannyer sa lenstiti pou ganny *funded*? Nou pa'n vot lo en Bidze pou li.

Sa ki osi enteresan, se ki Prezidan Larepublik ti koz lo aboli sa pozisyon Sekreter *D'Etat*. Selman sa Lalwa i koz lo pozisyon ekivalan avek en Sekreter *D'Etat*. Ou aboli, me

selman ou kree en lot pozisyon parey.

Sa ki osi enteresan, se konpozisyon sa Lalwa ki *loaded*. Mon repete *loaded*, akoz *repeal* ki pe ganny fer partou. E sa ki nou le konnen par egzanz, eski *Ombudsman* in ganny enformen lo sa bann *repeal*? Lenpak lo lanplwa, dimoun. E ki mannyer L'Egzekitif pe efas sa bann Lalwa.

I devret en konsern pou *Ombudsman*. Me nou pa tann, li preski ditou. I annan en manda anba Konstitisyon. Eski i pe *fulfill* son manda?

Dan ladministrasyon avan *Ombudsman* ti aktiv. Ti donn son lopinyon, lo tou size. Me ozordi konmsi i en pe trankil. Mon pa vremen vwar mannyer, ki pe ganny propoze la, sa Lalwa ki mannyer pou amelyor keksoz si pe ganny fer pou satisfes serten endividi.

Larealite ozordi se, Prezidan ki Minis pou Kiltir. Se sa ki Konstitisyon i dir. Kwa ki anpes li, kontinyen zwa sa rol olye larg sa responsabilite sitan enportan. Mon konsernen ki lapros ki pe ganny pran, malgre, malgre tou sa ki pe ganny dir pou afekte fondasyon ki nou'n kree pou kontinyen protez e avans nou kiltir dan tou son laform.

Ler mon fer referans avek konsiltasyon, mon largiman i eski zis, serten group ki'n

ganny konsilte? Prenon kont ki sa Lalwa pou anmenn en transformasyon mazer dan ladministrasyon kiltir. Lavites ki sa Lalwa pe vin devan Lasanble, ni konsiltasyon, ek nou *constituents* nou pa kapab fer.

Pou en parti ki'n pres latransparans, sa lapros ki zot pe pran tou resaman, tel koman sanz Lalwa *Declaration of Assets* e eksetera, Pa transparan ditou.

Alors mon enplor sa Gouvernman vin fran, aret sey kasyet deryer bann teori legal, pou zistifye en lapros *non-committal* anver nou kiltir.

Nou Seselwa, nou egzize ki nou fer tou ki Sesel pa vin parey serten pei kot zot tradisyon, e kiltir i swiv en lerozyon. Zot in perdi zot idantite. Mwan mon pou debout for pou mwan lidantite Kreol. Parey nou *Chairman Bill Committee* Mr Andre, in met serten pwen enportan lo latab.

Mon pou esper, VP pou *sum-up*, pou mwan kapab relman fer en bon desizyon, lo sa *Bill*. Mersi.

MR SPEAKER

Mersi Onorab. Onorab Letourdie.

HON JANY LETOURDIE

Mersi Mr Speaker. Bonn apre midi tou dimoun. Mr Speaker, i en plezir pou mwan pran

laparol pou adres lo merit sa *Bill* ozordi. Mr Speaker sa sanzman dan ladministrasyon Gouvernman, i enn ki pe ganny antisipe pou annan en nouvo souf an sa ki konsern, kiltir Kreol Seselwa pou mwan.

Sa sanzman, pe ganny vwar koman meyer lapros pou promouvwar kiltir, leritaz e lar. San okenn latasman, desizyon e okenn oriyantasyon politik.

Lalwa alors, i pe fer provizyon ki sa lenstiti Nasyonal i ava ranplas sa enn ki egziste la konmela. E tou lezot Lalwa ki diriz bann lezot divizyon ki tonm anba sa Departman aktyel, i a ganny *repeal*, me pou ganny reprodwir an term zot bann fonksyon e lobzektif.

Mr Speaker, dezormen sa bann divizyon i a fonksyonnn koman *constituent* anba *Act* Lenstitisyon Nasyonal pour Kiltir, Leritaz e Lar.

Mr Speaker, i enportan poudir ki tou sa bann *constituent institution*, ki pe aprezan tonm anba administrasyon sipervizyon e kontrol sa Lenstiti Nasyonal, zot tou zot ti deza egziste. E zot tou zot pou ankor la.

An tou i annan 7 ki VP in nonmen e mon pa pou al lo la. Tou bann *staff* ki deza, pe ganny anploye pe reste, e napa

personn ki pe perdi lanplwa, par ganny fer *redundant*.

Alors nou'n konpran ki en Sekreter Zeneral, li i pou annan sarz pou li siperviz e pran kontrol lo sa lenstiti. E li i a ganny apwente par Prezidan. Sa i a fer ki, pou napa en Minis Kiltir parey nou'n konpran. Me i a tonm direktaman anba Prezidan. Si mon pe ganny li byen mwan osi.

Letan i ava annan bann zafer relye avek kiltir, leritaz e lar konsernan Lasanble Nasyonal, Prezidan i ava nonm en Minis, parey dan sa ka in fer la, pou vin devan Lasanble.

Mr Speaker i pou annan en *Advisory Council*, e li sa *Advisory Council*, li i a konsey Sekreter Zeneral lo bann zafer an relasyon ek Polisi e lezot konsern ki annan lenportans Nasyonal pou pei.

Mr Speaker *à mon avis*, sa bann endividi ki ava lo *Advisory* tout o kontrèr avek, pa kontrèr me mon difere ek sa ki Onorab Andre ti dir. Sa bann dimoun ki ava, mon panse ki devret lo *Advisory Council*, petet zot ava, sanmenm sa bann menm endividi ki a latet zot bann diferan *constituent*, la konmela.

Akoz se zot mon mazinèn ki konn zot *stuff en* pe pli byen parey nou dir. Me selman annou pa bliye, mon

krwar, mon'n vwar en landrwa kot i pou annan, Sekreter Zeneral i pou kapab, i pou annan sa posibilite pou li, kree bann lezot Komite *as and when* i nesese ki bann artis, lezot artis bann dimoun byen plase, i kapab osi partisip lo la.

Enn parmi bann rol sa Lenstiti Nasyonal Mr Speaker, pou mwan ki konsider enportan, pli enportan se pou konsey Gouvernman lo Polisi Kiltir, Leritaz e Lar dan Sesel.

E osi, pou asir prezervasyon, lidantite kiltirel nou leritaz e tou bann form lar ki egziste isi. Mr Speaker, nou konsyan ki annan bokou lenfliyans e nouvo tandans ki'n antre Sesel.

Alors i normal pou mwan, pou nou fleksib. Me avek sa i osi annan sa kote, kote nou tir laliny, e ki zistans nou arive avek nou fleksibilite. Nou tolere Mr Speaker, me pou fer sir ki, nou pa noye e larm kiltir Kreol Seselwa, pa disparet e al dodo osi, parey Dodo.

Mr Speaker, mon vwar sa *Bill*, pou ganny en Lenstitisyon Nasyonal pou Kiltir, Leritaz e Lar koman en sans pou reponn a en lapel plizyer lannen pase, ki bokou dimoun - sirtou bann artis, pour ki kiltir i vin en antite lo li tousel.

Pour ki i pa ganny vwar dan sonm aköz i pe mars dan lonbraz en lot, oubyen i pe

ganny konsidere koman segonder, ou enferyer.

Mon konpran ki, plizyer konversasyon, in ganny fer e konsiltasyon osi in ganny fer avek plizyer *stakeholders* e osi artis, pou ki afen sa *Bill* in kapab ariv dan sa Lasanble ozordi.

Mr Speaker, sa travay in pran preske 1an, si mon, mon kapab mazine. I annan bann bon Polisi ek nide, ki ti deza egziste e ki'n ganny garde.

Me sa *Bill* i osi anmenn nouvot, ki pou vreman adres bann konsern pertinan, nou bann artis. E osi kreasyon en platform ki pou konsistan dan prezervasyon, lidantite kiltir, Kreol Seselwa.

Mr Speaker, sa Lenstiti Nasyonal i pou annan pouvwar pou li kapab, annan bann *assets* li. Aste, oubyen vann dan *d'autre mots* i pou kapab fer biznes. E sirtou sa i ava fer li atraver *Creative Seychelles*.

Loportinite pou la pou eksplwate, si i ganny fer avek bon planifikasyon, e avek lonnekte. Dan sa *Bill*, provizyon pou ed bann artis atraver *Grants*, i ankor egziste.

Me mon pe regard sa en pe pli lwen, Mr Speaker dan le sans ki bann *Grants* i bezwen ganny donnen lo labaz diferan merit, Mr Speaker. Nou kapab kategoriz, bann artis, diferan

form lar dan trwa kategori. Si mon kapab dir li dan sa fason.

I annan bann debitan, i annan bann artis etabli, e i annan bann *Masters*, oubyen *Grandmasters*, si zot anvi dir li koumsa.

Fodre pa ki *Grant* li, i pe ganny konsantre, zis pou fer en debitan fer son premye *CD*, oubyen lans son legzibisyon pou premye fwa. Me fodre sa artis etabli, osi i kapab benefisye li osi, pou anmenn li lo sa lot letap ki neser pou son epanouisman. Akoz sankwa i pou kay lanmenm li.

E li sa *Master* oubyen sa *Grandmaster*, si ou anvi dir li, si li i anvi, kree son Fondasyon oubyen son latelye, oubyen son lekol, oubyen son galeri fodre ki li osi, i annan sa posibilite benefisye Mr Speaker.

Mon dir fer fini avek sa bann dalon, fanmir, faver! Baz tou keksoz lo meritokrasi. E se sa fason ki nou Lenstiti Nasyonal pou an mouvman, an progresyon e se sa ki pou apel sanzman.

Sa *Bill* i osi koz lo, lyezon ant Lenstiti Nasyonal ek tou form medya. Sa mon kontan li bokou Mr Speaker. Medya e kiltir tou lede, i bezwen kanmarad. Sa i neser pou kapab annan konsistan, e pour re-egalize, si nou kapab met li dan sa fason. Lekel ki lekel?

Mon donn en legzanp, ou kapab en bon artis, avek sibstans. Me si ou pa ganny sa promosyon, ki medya parey enn ki mwen bon, oubyen ki en pe pli medyok, i gannye, la bann travay avek sibstans, i ganny touye, dan en serten sans mon kapab dir.

Mr Speaker i pa pou sonn byen, mon pouse lo mwan, i pa sonn byen pou mwan pti zanfan ki'n fek fer en sanson e ki'n vin popiler. I ganny apele en vedet, me alors ki mannyer son granmanman ek son granpapa, ki'n tras lemonn avek paviyon Sesel, ki'n briye, ki'n fer tande lanmizik Kreol, ki'n fer tande son lavwa partou pou Sesel, ki mannyer li i pou ganny apele alors - vedet menm, *I don't know*.

Mon swete ki avek larive sa lenstiti Mr Speaker, en bon konversasyon avek bann medya i ganny arive. Pou nou kapab konplimant kanmarad olye, ki fer sakenn pou li kot i konsern zafer kiltirel ek lar. Akoz sa nou bezwen fer li pou nou Sesel.

An konklizyon Mr Speaker, mwan mon pou donn tou mon lafors, tou mon lenerzi si ou kapab permet mwan lev tou lede mon lanmen anler, pou mwan siport sa, sa *Bill*.

Akoz mon, ozordi mon kontan pou mwan vwar nesans sa Lenstitisyon

Nasyon, pou Kiltir, Leritaz e Lar. Mon pa ti a kontan antann Mr Speaker, partou sanson Patrick Victor ki dir "Ti annan en konplo pou detri tou, nou pa ti pou konn zanmen sa ki pou nou".

Fodre ki nou ofer Patrick Victor, Lanbasader Sesel en nouvo direksyon, en nouvo souf, pou li fer lezot konpozisyon avek lezot lenspirasyon.

Mr Speaker en artis i lib pou li sant "Ah pa file kaptenn", oubyen, i sant "Wavel, Wavel Prezidan pou sa Nasyon". Napa nesesite pou viktimiz person, dezormen, Mr Speaker!

(APPLAUSE)

HON JANY LETOURDIE

Mon anvi vwar rev bann artis lar vizyel, vin vre par letan zot reve pou zot ganny en galeri Nasyon. Fini avek pous bann artis, dan zot bann louvraz aköz son afilyasyon politik Mr Speaker.

MR SPEAKER

12 minit Onorab.

HON JANY LETOURDIE

Wi, mon pe rod Onorab Loze i pa la. Selman *anyway* les li, i pou tann mwan. Mr Speaker nou de Onorab Loze, nou zanmi depi toultan, e nou pou reste touzour byen.

Mon annan en bi pou konstrir en zoli, pti lakaz avek larsitektir tradisyonnèl avek dibwa, ki a *blend* byen dan lanatir. Enn se zour avek lagras Bondye, mon pou envit li. E nou a bag en pti diven, avek en bon kafe anba mon lavarang. Mersi Mr Speaker. Mon siport sa *Bill*!

(APPLAUSE)

MR SPEAKER

Mersi Onorab. Nou a ekout Onorab Aglae.

HON EGBERT AGLAE

Mersi Mr Speaker. Bonn apre midi *VP*, *Mayor* avek Ms Cecile. Mr Speaker nou pe koz lo en *Bill* ozordi, ki annan pou fer avek kiltir, leritaz, e lar kot i konsèrn Kreol Seselwa.

E Mr Speaker, nou tou nou konnen lepanouisman kiltirel Sesel, Seselwa i ti komanse, an apre ki nou ti ganny nou lendepandans mon kapab dir '77. E la nou ti vwar diferan levolisyon kiltirel.

E sa moman letan Mr Speaker, in evolve, in evolve ziskan nou'n ariv ozordi. Menm si i annan dan lepase ki poudir, kiltir ler ti komanse, ti annan son *connotation* politik par deryer. Me se sa ki ti pe diriz la bar. Ki ti pe anmenn sa levolisyon kiltirel.

E ozordi letan, in sanze e mon krwar nou bezwen get

keksoz, dan en lot fason. Mr Speaker, en pei ek son dimoun ki napa nosyon, son zistwar son lepase, son lorizin, son kiltir. I pou en Nasyon, parey dikton i dir, ki napa en rasin.

E ozordi mon santi poudir, nou pe rat en sans dan li menm avek en *Bill*, ki pou mwan ti pou en bon *Bill*. I zis parey, nou dan lasemenn, nou pe al antre dan lasemenn Kreol, Festival Kreol. Nou pe kwi en bon kari koko pwason sale, e apre nou vini, nou le met *pasta* ladan. Se sa ki pe arive avek sa *Bill*.

Mon pou eksplike apre, akòz mon pe dir sa. Bann artis ki mwan mon'n zwenn avek, malgre i annan ki'n dir i annan konsiltasyon ki'n ganny fer. Bokou artis pa pe neseserman konnen ki annan dan sa *Bill* ozordi.

E mon konnen poudir, petet serten rezon, i *COVID* pou fer bann gran miting, bann gran konsiltasyon. Me selman, mon santi ki nou pe tay ek en keksoz, ki devret, ganny get a pli profon. E nou bezwen fer li byen, pou kapab devlop nou lar, nou kiltir.

E Mr Speaker, souvandfwa zis serten kous artis ki ganny gete, ouswa ki ganny konsilte akòz petet sa ki dirize li i krwar dan en kalite form lar. Ki fer ki presedans, i ganny mete, dan sa lar ki i krwar ladan.

Me lar li menm li, i en keksoz ki vivan. Me nou kiltir, i bezwen en keksoz ki vivan e kiltir se dimoun dan lavi toulezour li menm. E bann diferan pwen ki fer resorti Mr Speaker, ki kouven sa bann kalite aktivite ki tonm anba nou kiltir, nou leritaz.

Par egzanp, nou annan teatral, nou annan literatir, nou annan lapentir, nou annan lanmizik, nou annan skilptir, nou annan lapoezi, nou annan ladans e nou annan la, nou kiliner Kreol.

Mon kestyon, eski tou sa bann domenn ki mon'n nonmen in ganny en konsilte ladan, pou zot kapab annan zot *input*? E ler mon pe get, dan zot *Objects and reasons*, zot in mete ladan ki "*the arts from a perceived and actual politicized nature of Government*".

E ler mon get lafason ladministrasyon, sa lenstiti li menm, pe ganny konpoze. Depi son nominasyon, depi son kreasyon son Konsey, ki pe ganny met devan pou nou ozordi. Mon pe vwar politik ladan.

Akoz mon pe dir sa Mr Speaker? Letan Gouvernman ti pran serten desizyon, pou aboli serten *post* dan Gouvernman, zot ti vin avek bann rezon ki swadizan dan zot bann sanzman, pou anmenn plis efikasite.

E ki la ozordi apre nou pe vwar, bann serten *post similar* ki pou ganny donnen, ki pe al kont sa bann menm desizyon dan ladministrasyon, ki zot in pran.

En eleman enportan, Mr Speaker, ler mon pe koz, lo sa antite sa lenstiti, ki zot anvlop tou depi son *Art Council*, zot pe kree sa ankor, zot in nonm *Creole Academy*, ki sa pour mwan zot in sanz non en pe.

Nou pou annan, nou bann lezot antite ki konsern kiltir, ki pou tonm anba la, parey mize, nou pou annan nou arxiv, nou pou annan bann lezot antite ki deza egziste.

Me ki apre zot bann Lalwa pou sorti li menm. Pou mwan Mr Speaker, i kree parey Onorab Cosgrow en *super* antite.

E mon pa konvenki, ki ler pou'n apwent sa Sekreter Zeneral ki pou dan en laform SS. Pou kapab annan en lanmen, lo desiminasyon travay ki sa lenstitisyon li menm i bezwen fer.

E *the box*, dapre Lalwa, i pou tonm ek Prezidan, aköz i annan sa Konsey li menm li. I pou ganny apwente an konsiltasyon, e dapre mon konpran zot in dir pou konsilte avek *Leader* Zafer Gouvernman.

Si mon byen, si mon mal koriz mwan. Kan annefe, ler

zot ti dan Lasanble, bann keksoz ti ganny konsilte ansanm avek *Leader* Lopoziyon. So i sa direksyon parey ki fer mwan annan dout, lo bon lentansyon ki sa *Bill* i kapab annan li menm.

E nou konnen poudir, Prezidan i en *political figure*, e byensir artis, i en zouti parfwa. Sirtou kot i konsern lanmizik, i ganny servi lo tou kote dan politik. Eski ler pou ariv bann moman kanpanya li menm li, nou pa pou kree, serten konfizyon politik, ki nou pou anmenn anba sa lenstitisyon li menm?

Sa i enn bann keston, ki mon pe demande. Lot eleman se ki mon ti a kontan swete vwar, Sesel i annan bon bokou artis, ki'n fer perse, ki'n fer rekonnet, ki'n anmenn lafyerte pou Sesel li menm lo nivo rezyonal e enternasyonal.

E mwan mon ti a swete ki se sa bann dimoun parey in fer, byen mon pa anvè nonm non pangar mon mank enn - i devret pe *lead* sa Konsey *non-political*, dan en fason ki zot travay, dan en fason enparsyal.

E Gouvernman atraver son Sekreter Zeneral, e ladministrasyon, zot konsantre lo Polisi, e regilasyon ki pou promot kiltir Sesel de lavan.

E nou'n met pouvwar ki pou anmenn, nou kiltir pli

devan, atraver sa bann lezot departman anba sa lenstitisyon, dan lanmen sa bann artis zot menm.

Bokou in fer bann letid avanse, bokou i swete ki zot kapab pran, sirtou bann groupman, travay avek. E devlop kiltir lo nivo lokalite.

E mon mazin byen, Minis pou Touris dan son *Statement* ki i ti fer, se anmenn en valer azoute kiltirel pou Lendistri Touris lo nivo distrik. E sa i kapab ganny arive par, annan nou en Konsey en lenstitisyon ki get kiltir avan, ki i get dan en fason bann dirizan politik.

Akoz kiltir li menm i pa VP, i pa Mr Andre, i pa Prezidan. I nou tou, nou tou nou annan en par pou nou kapab zwe ladan. E mon pa krwar poudir, bann desizyon, i devret ganny pran zis par en pti group dimoun.

E Mr Speaker ...

MR SPEAKER

Ou pe al lo 12minit Onorab.

HON EGBERT AGLAE

Mersi Mr Speaker mon pou *wrap-up*. En keksoz ki'n sorti byen avek bann artis ki ler mon'n konsilte, zot, se ki mannyer, nou bezwen anmenn kiltir lo en baz lendistri, biznes? Anmenn reveni pou pei?

E sa i a vini avek, anmenn bann valer azoute.

Mon ti a swete al dan detay, me letan pa permet Mr Speaker. Ozordi en kantite keksoz i ganny deroule, dan la kiltir, menm dan lanmizik, menm dan lar.

Me sipor, artis i mizer. Artis, pa tou artis ki annan. E la kot Gouvernman bezwen antre, koman sa fasiliter, sa kreater li menm, pou donn akse avek resours. E fer ki, bann artis i ava ganny sans prodwir, sans anmenn sa valer azoute. E la nou a vwar sa lendistri, devlope parey dan bann lezot pei, ki'n vin en pilye pou lezot, pou lekonomi.

E avek sa Mr Speaker, mon santi poudir, nou devret get en pti pe pli lavan lo sa *Bill* li menm. Annou pa tay ek en keksoz, aköz i annan en levennman ki pe vini.

Annou asize, aköz mon konnen pli tar apre, zot pou bezwen pe al fer plis konsiltasyon avek sa bann akter, ler zot pe komans pran lezot desizyon, dan lenplimantasyon sa menm Lalwa.

E i riske, lev en ta melimelo aköz nou konnen poudir artis i difisil travay avek, aköz artis sakenn i annan son domenn. Avek sa Mr Speaker, mon anvi ki nou reflesir byen lo sa ki nou pe fer. E annou fer li byen. Mersi.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker, bonn apre midi ankor enn fwa *VP* avek ou delegasyon ek tou dimoun ki pe ekoute.

Mr Speaker letan nou pe koz lo kiltir apre midi, mon profite pou mon mazin nou ser Marietta Matombe, en fanm ki ti annan en lenerzi enorm an relasyon avek kiltir, sa lenerzi ki Onorab Henrie ti pe koze taler.

Se sa bann dimoun ki'n ede pou promot nou kiltir, se sa ki mwan mon anvi ankor. Ler nou pe koz li kiltir, mon mazin Norville Ernesta, enn mon santer prefere ki mon kontan, me la pou le moman pou en rezon medikal, i pa pe tro kapab *perform*.

E mon ti a kontan onor li. Parske se Norville Ernesta ki'n reviv moutya dan lakominote e dan Sesel an zeneral.

Ler mon al Bel Ombre par egzantp, mon mazin Rodolfin Marie Therese, en madanm alaz *almost* 95an, byen koni koman Pti Dol, an madanm ki'n aktiv lo kote danse, lo kote bann sanson kiltirel, bann sanson moutya.

E an madanm ki annan en zoli lakadans danse. E letan mon mazin en zonm Bel Ombre, mon annan Marslen

Monnaie, en dimoun ki pandan son lanfans li osi in kontribye dan kiltir Sesel.

Letan nou pe koz lo kiltir, i enportan pou nou toultan rekonnet poudir kiltir i pa en zafer zis nou vini nou anmenn en *Bill* Kiltir, apre otomatikman demen, i vin efektiv. Non!

Kiltir nou bezwen annan bann dimoun ki kontan kiltir. Nou bezwen annan bann dimoun ki kapab pratik sa kiltir. Nou bezwen annan bann dimoun ki kapab demontre sa kiltir.

Mr Speaker, kiltir i pa zis neseserman danse, sante, kiltir ozordi nou fason fre, nou fason viv, nou sanze, nou penneyen, kalite manze ki nou'n abitye manze.

Sa osi i form parti nou kiltir ki nou, nou'n abitye viv avek. Mwan sel keksoz ki mon anvi avek sa nouvo lenstitisyon ki pe ganny kree la, sa lenstiti pou Kiltir, mwan mon anvi zis en keksoz senp.

Bann Manm in dir fodre retir politik, lot in dir fodre retir sa. Mon krwar i annan tro bokou konplent kot kiltir dan lepase. E fodre pa kiltir i vin en landrwa kot i annan tro bokou konplent.

Kiltir i bezwen en landrwa kot letan nou koz lo kiltir, nou koz avek gou. Nou dir e, Vandredi pou annan Bazar Labrin, pou annan bann

sanson, bann santer pou vini, annou ale, nou ava al detann en pe.

Lontan ou ti al kot *National Library*, ti komans kot *National Library* deryer dan pti zarden. Mon rapel Onorab Jany De Letourdie avek defen Marietta Matombe ek lezot bann *staff* ankor, ki ti organize.

Apre in sorti, in al kot *Marine Charter* laba lo bout, kot ozordi *La Passerelle* i ete. Apre in sorti in al kot Zarden Zanfana, lo bout ek *Maison Du Peuple*, ziska in fonn net.

La in sorti, in al en kou Beau Vallon ;- Beau Vallon i annan son kalite problem ki i vin avek, e mwan se tou ki mon anvi Mr Speaker. Si mon pou vot lo sa *Bill*, mwan mon anvi dir avek Vis-Prezidan, si mon vot lo sa *Bill* aswar, mon anvi vwar en keksoz nouvo Mon anvi vwar poudir lavil i bezwen annan bann aktivite, an mezir *COVID* i refer, *COVID* i desann, *Airport* in ouver, touris pe rantre, nou bezwen annan keksoz diferaman, vivan.

Dan distrik mon kontan letan i annan en pti aktivite wikenn *in regards to* sa lasosyasyon ki'n kree pou kree bann aktivite. Beau Vallon, pas an direk lo televizyon, tou dimoun in *happy*.

Be eski nou kontinyen annan bann fason fer zis pou

lokazyon? Si napa Festival Kreol, nou pa war en sapo Kreol, nou pa war bann dimoun pe bwar en pti kalou, nou pa war en bout gato maspen.

Eski zis sa bann moman letan? Mwan mon krwar si mon pe vot pou sa nouvo lenstiti, i bezwen annan en nouvo fason fer. Prezan ki mon ti a kontan dir Mr Speaker.

Ou konnen, i enportan pou nou, letan mon pe koz bann kritik, an relasyon avek kiltir, par egzanp letan ou ganny en mesaz ozordi, ki dir avek ou, i annan bokou labi, *CEO CINEA* in al *Dubai, EXPO 2020* pou 3 mwan, i annan 40 dimoun sorti kot Kiltir in ale osi, pou fer kwa?

I annan zis en *National Day* ki pe fer le 28 Oktob, akfer *CEO* i bezwen laba pou 3 mwan? Eski napa louvraz dan son lofis? Fodre met lord, tousala *taxpayers money*.

Sa ki mon pe dir, fodre pa nou kontinyen ganny sa bann kalite mesaz. Fodre nou kontinyen, fodre bann Minister, bann Departman, sirtou la anba nouvo ladministrasyon, sa bann kalite mesaz negativ i sorti.

Sirtou lo kiltir, parske kiltir i reprezant nou pei. Letan touris i rantre, nou vwar Margaret Ve Beau Vallon avek son lekip, zot ki pe *entertain*,

zot pe ankouraz sa touris pou vin Sesel, aköz nou pe entrodwir li avek nou kiltir.

Ler Mrs Sherin Francis i sorti Sesel i al *La Chine*, i al lezot pei, zot anmenn nou liv pou montre anba nou delo mannyer i zoli, anba nou lanmer.

Ki mannyer nou bann zil i ver, ki mannyer napa polisyon, se sa ki mon krwar dan kiltir. Alor Mr Speaker mon pou donn *full* sipor sa *Bill* mwan.

Selman mon annan serten rekomandasyon mon ti a kontan dir avek Vis-Prezidan, avek *Monsieur Le Maire* ki asiz la, Mrs Kalebi osi ki asiz la devan. Ou konnen, parfwa bann zenn zot santi zot ganny kit deryer dan tou devlopman pei.

Nou annan en kantite zenn ki'n al etidye kiltir nou. Kantite nou bann zenn, ki'n al rod son degre pou li, pou kiltir. Eski Vis-Prezidan ou kapab dir ek nou taler, kote sa bann zen pe antre, dan sa nouvo remaniman lenstiti kiltir la, Kote zot, zot antre?

Bann zenn i santi poudir toultan se bann vye ki'n la pandan letan pase, ki'n ganny promosyon. Aköz i ti byen ek sa enn, ek sa enn.

Prezan li menm ki pou la e li i pou mor lanmenm. Par egzanp, zot donn mwan 2 legzanp. Kot Kiltir i annan en

technical advisor avek en *Special Advisor*.

Bannla pe demande, be ki zot fer sa 23 dimoun, ki vreman zot rol? Eski anba sa nouvo lenstiti, zot pe revwar? Mon ganny dir poudir kot Kiltir i annan en pe dimoun ki asiz dan lakour, ki pa pe vin travay selman i ganny peye.

Eski i normal sa, i korek sa lenformasyon ki mon'n gannyen? Mr Speaker, kekfw VP ou a kapab eksplik nou. Ou konpran, i annan tou sa bann zafer ki fodre i sorti, i arete.

Nou bezwen swiv, nou bezwen gete, poudir sa ki nou pe prezante, menm letan i vin dan Lasanble Nasyonal, ler i sorti deor, i bezwen parey sa pti baba, ki sa msye ek sa madanm zot in fer li dan lanmour.

Prezan ler sa pti baba i komans grandi, nou pa kapab zis abandonn li nou. Si i tonbe, nou bezwen swiy son pti zenou, si son lanmen i sal, nou bezwen pas en pti *wipe*.

Zour i komans koze, nou a dir li 'ba', nou a dir li 'ka', nou a dir li 'da.' Nou anmenn li, nou anmenn li ziskan i kapab debout lo son 2 lipye. Set egzakteman sa ki nou pou fer avek sa nouvo lenstiti.

I en nou komansman, parey nou sanson ti dir, nou kapab reve, me sa moman in arive Mr Speaker. Nou tou

ansanm annou leve e annou fer nou rev vin vre. Zis mazin, si nou ganny en nouvo lenstiti pou nou kiltir, kote nou pei i pou ete, ki mannyer nou, nou pou santi nou koman Manm Lasanble Nasyonal? Kote nou bann *constituent* pou santi, konstitye zot dan sa nouvo lenstiti? Mwan sa ki mon pe rode mwan.

Mon pa anvi zis pas en *Bill*, donn sipor detrwa dimoun ki pou vin Komisyoner, oubyen ki pou vin Asistan Komisyoner, oubyen ki pou vin Sekreter Zeneral.

Mwan mon anvi ki si mon pe vot pou a nouvo lenstiti, distrik Bel Ombre i santi li site ladan. Lavil i santi li site ladan e Lepep Seselwa i santi li site dan sa nouvo lenstiti.

Mon pou donn sipor Mr Speaker, e mon pou donn sipor VP, anvi ki ou'n prezant sa *Bill*. Be mon swete tou sa bann keksoz ki mon'n fer resorti, espesyalman nou zenn, ki'n lekol, ki'n etidye, kote li i site li ladan.

E pa bliye, letan nou pe koz kiltir, i annan plizyer nou bann zenn, ki zisteman, zot in travay, zot pe espere kan zot pou ganny en promosyon an relasyon ek kiltir.

Me la zot santi poudir dan sa nouvo remaniman,

kote zot, zot sitye zot lekor an relasyon avek tousala.

E si i annan bann dimoun ki pou, ki pe al lo laz *retirement* ki byento zot pou *retire*, zot santi poudir i bezwen annan bann *proper handing over* ki ganny fer parey i pa'n le ka dan plizyer Minister.

Mwan se tou mon bann pti konsern Mr Speaker. Mon ti a kontan raport mon sipor pou sa nouvo Lenstiti pou kiltir. Parske mwan mon krwar dan kiltir, si napa kiltir dan lavi en dimoun i pa gou.

Dan maryaz i bezwen annan sanson, menm dan lanterman Mr Speaker, i annan kantik ki ganny sante, menm dan en lanterman.

E menm letan ou'n met sa dimoun dan trou Mont Fleuri, ou'n fini kouver li ek later, ou'n met son lakrwa, nou kriye, non nou pa kriy o syel, "*Au Croix*", nou tou nou sante. Parske nou *believe* dan kiltir e nou krwar dan kiltir. Menm letan nou byenneme in mor. Mersi bokou Mr Speaker.

MR SPEAKER

Mersi Onorab. Onorab Pillay.

HON SEBASTIEN PILLAY

Mersi Mr Speaker. Mr Speaker ler in ariv 5 er 48. So mon pou sey fer mon lentervansyon ase kourt, me

direkteman lo sa Prozedlwa la devan nou.

Mon'n pran bokou letan pou pas dan sa Prozedlwa e regard bann diferan eleman sa Prozedlwa. Mon bezwen dir mon ti rankontre Mer Laval, *regarding* sa Prozedlwa.

E mon bezwen dir, mon ti enspire lo komansman par lentrodiksyon ki ti pe ganny fer vizavi *communalism* e vizavi, i annan 3 diferan kiltir dan en pei.

Me apre mon'n vwar soudennman ki tou keksoz in dezentegre e al dan en sel direksyon. E pou mwan mon dezapwente prezan.

Mon dezapwente, akoz ler mon'n retourn dan sa Lalwa e mon'n regard tou son bann eleman ladan, sa ki'n fer mon realize, se ki enn, se ki i annan en *attempt* atraver sa Prozedlwa, pou *load* en lenstiti avek en kantite responsabilite.

San vreman regard preset, oubyen sa keksoz ki mwan mon krwar senserman ladan. Mon santi poudir i annan en *clear and imminent and present danger* lo nou kiltir Sesel.

I annan, sa ki pa oule war pa war, sa ki oule war konotasyon politik ladan, war, me mwan mon santi i annan. E mon santi poudir si nou pran tou konsiderasyon politik nou met a kote, sa lenstiti pa pou rezourd sa problem.

Premyerman nou bezwen regard kwa ki nou oule *achieve*. Nou oule *achieve* en depolitizasyon kiltir. Be ki mannyer nou pou *achieve* en depolitizasyon kiltir, kan anba seksyon 5 sa Lalwa, se Prezidan li menm ki a pwent tou dimoun?

Prezan i apwent tou dimoun, e sa Konsey i fer desizyon lo vot. E tou bann dimoun ki Prezidan in apwente pou fer desizyon lo la. Be nou pou ganny en desizyon ki Prezidan i anvi gannnen. Se sa.

Akoz dan bann konteks kot nou annan depolitizasyon, set en *body* an deor sfer politik ki fer bann lapwentman. E prezan kot mon santi, mon war li en pe pli drol e mon regard lentansyon e mon koz lo lentansyon kot i anmenn nou.

Mon vwar poudir ki nou pe menm propoze ki i annan konsiltasyon avek Dirizan Zafer Gouvernman lo bann apwentman ki sipoze ganny fer. *Now*, mon pa konnen si sa i en *oversight* oubyen si sa i en fot.

Me menm si i vin Dirizan Lopozisyon dan Lasanble Nasyonal, pou mwan mon vwar li nou pe donn en politizasyon sa Lalwa.

E pa sa lentansyon. E mon tous lo en pwen ki fer mon realize alors, ki lakantite

thinking ki'n ale dan sa Lalwa, in zis annan en *morphosis* diferan preset sa Lalwa avek lezot Lalwa pou kapab satisfere en demann.

Annou pran en legzanp senp Vis Prezidan, annou pran *Notaries Act*. *Notaries Act* i fer referans avek en *Curator of National Archives*. Be nou'n retire sa pozisyon ki nou ete *at National Archives*.

Reentrodwir en pozisyon *Principal archivist*. Me i annan en *consequential amendment* ki bezwen ganny fer. E dan bann sanzman *consequential* ki bezwen ganny fer pou satisfere.

E mon ti krwar poudir ler mon pe get sa fe *Curator of National Archives*, si, son referans i zis en referans banal. Be mon'n menm war poudir en referans ki ganny servi dan bann ka Ankour, kot en dimoun i bezwen *actually*, mon pa en *expert* legal.

Me aparaman ou bezwen *actually* al - i annan en rol enportan dan sistenm Zidisyer, dan sistenm legal. E son apwentman sa *Curator of National Archives* ti ganny fer par Prezidan Larepublik, ki byensir Minis Faure, *Minister for Legal Affairs*.

E kot mon dir poudir sa Lalwa pa'n ganny byen *thought out*, oubyen pa'n al *in-depth* pou ganny konsidere ki bann

eleman dan sa Lalwa i sipoze antre.

Se kot i annan menm referans avek en *appeal* ki ou fer avek en Minis. Ou fer en *appeal* ek en Minis, kot in annan en *request* pou ou get serten *archive* ki pa'n ganny aprouve.

Be napa okenn referans avek okenn Minis dan sa Lalwa. Ki fer mon krwar ki *liste ultime dirigeant des affaires legale* gouvènmantal in fer en *morphosis* plizyer Lalwa pou satisfè sa ki le *Chef D'Etat* i anvi vwar.

E mon kontan ler ki Onorab Aglae i fer referans avek sa pozisyon Sekreter *D'Etat*, ki Vis-Prezidan li menm in koz lo la e dir ki i en pozisyon ki *phase out*.

Me ou fer referans avek en pozisyon ki pe *phase out*, pou eksplik en lot pozisyon ki ou pe kree. Vis-Prezidan nou en Lasanble serye, nou vwar kot ou pe vini Vis-Prezidan e mon dezapwente avek en tel largiman.

Pou mwan, nou ti kapab annan en komansman ki ganny fer avek serten preset dan sa Lalwa, ki ti ava anmenn nou en lepa annavans.

Me kot zot in ale, zot in al tro lwen, tro anbisye, e ki mon pa krwar poudir avek sa ki mon pe gete la, lakantite keksoz ki pe ganny mete ladan

- *mind you*, mon'n ganny forse en semenn edmi pou get sa Lalwa.

En Lalwa ki i annan lakantite paz ki i annan, ki en Lalwa konsekan e serye, ki mon ti ava'n apresye ganny li pli boner dayer. Ki mannyer nou kapab formil? Lasanble Nasyonal i kapab dir mwan sensèman, zot pe formil en lopinyon serye lo sa Lalwa!

Nou pa kapab annan sa kalite lapros travay. Nou bezwen annan letan pou nou regard bann eleman bann Prozedlwa ki vin devan nou. E regarde si bann preset, bann gran laliny dan sa bann Prozedlwa in ganny byen armonize.

Nou al pli devan, e ler nou regard bann diferan sapit dan sa Lalwa, ki zisteman anmenn bann diferan lenstitisyon anba sa lenstiti, anba kontrol en *superman*, en Sekreter Zeneral ki annan *the power to hire and fire without checks*. Akoz se sa Lalwa i donn li.

E mon pa pe koz pou Mer Lavil la byensir non. Mon pe koz pou sa Lalwa, mon pa pe koz pou okenn endividi. Mon pe koz pou sa Lalwa.

E sa Lalwa, demen *Monsieur Le Maire* i kapab, mon pa konnen si ou, nenport endividi, me i kapab ganny servi pou al dan en fason, par en endividi pou vreman *stump*

Mon ti a espekte en referans avek Patrick Victor, David Philoe, Raymond Lebon, parey Onorab Arissol in fer - wi. Selman i pa'n tro fer referans li. Menm Onorab Henrie, atraver ou Mr Speaker, son referans ti avek Alpha Blondy, me i pe koz lo nou kiltir Seselwa.

Onorab Samynadin, atraver ou Mr Speaker, son referans ti avek en poet Franse.

Mon pwen, se ki L' Egzekitiv pa'n kalkile lenportans sa ki zot pe vin fer devan Lasanble e avek ban nreferans ki zot pe fer, i montre ou ki kalite *thinking, top process* L'Egzekitiv i annan anver sa Lalwa, ki zot pe anmenn devan nou dan Lasanble ozordi.

E mwan mon krwar senserman, si zot vreman anvi, si zot vreman anvi reform, oubyen dir avans kiltir parey nou anvi avans li, e zot anvi vreman de politiz li, sa Lalwa ki mannyer zot pe prezant li ozordi, avek sa kantite keksoz ki i annan ladan, avek tou sa bann eleman ki pe anmenn plizyer *moving parts* ansanm, ki bezwen administrativman dan en fason *cohesive*, mars ansanm.

Mr Speaker mon pe al terminen, mon *mindful of* letan, i pa lafason ki nou

devret fer li. So, an konklizyon Mr Speaker, Onorab Aglae in fer en *statement* enportan.

In dir, nou *basically* annan, e ler ou pe koz lo kiltir, toultan ou pou annan bann eleman ki ou tonm dakor lo la. Prezervasyon nou kiltir i en keksoz ki mwan mon krwar bokou ladan, mon pa en nasyonalis, be mon annan serten preset ki mon krwar ladan.

Me lafason ki Lalwa in ganny *design*, i pa pou ed nou *achieve* sa. E mon krwar a sa moman Mr Speaker, i pa en keksoz ki mon pou kapab siporte. Mersi Mr Speaker.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Bonn apre midi zot tou. Mr Speaker, zis avan dernyen entervenin in koze, mon ti anvi komans mon lentervansyon apre midi, an dizon ki mon kontan ki lafason ki sa deba in ale ozordi.

E mon ti anvi felisit lopozisyon pou sa pozisyon ki zot in pran, en pozisyon responsab anver en Lalwa ki nou konnen zot pa pou siporte.

Me *at least* zot in azir koman en Lopozisyon responsab e zot in met zot

bann pwen devan dan en fason kalm, dan en fason etidye, dan en fason onorab, tel parey zot devret fer.

E mon ti a kontan felisit zot tou, sa 9 zot, apard sa enn ki fek koze avan zot, pou lafason ki zot in antreprann sa deba ozordi.

(APPLAUSE)

HON BERNARD GEORGES

E zot in fer li aköz zot in rekonnet. E la mon ava servi parol Onorab Aglae, zot in rekonnet ki kiltir i pou nou tou. I pa zis pou nou, oubyen zis pou zot, i pou nou tou koman Seselwa. E zot in azir koman en Lopozisyon responsab, dan rekonesans sa.

E malgre ki zot pa dakor, neseserman avek striktir ki pe ganny mete la ozordi, zot in fer konnen zot lenkyetid dan en fason responsab e rezonnab. E pou sa mwan mon ti a kontan felisit zot.

Pou sa dernyen entervenans, Mr Speaker mwan mon ti a kontan fer nou Lasanble mazin 2 keksoz.

Si nou'n servi en *quotation* sorti kot en *salesmen* Endyen oubyen kot enn Franse, se aköz, parey nou'n ganny rapele apre midi, e parey Moniman Bisantener dan milye nou lavil i fer nou

rapel nou sorti Lazi, Lerop ek Lafrik.

(APPLAUSE)

HON BERNARD GEORGES

E se sa nou kiltir Mr Speaker. Me mwan mon ti a kontan servi en *quotation* ki mon krwar i apropiye e ki ganny servi isi, e ki'n ganny servi isi par enn nou bann dokter seleb dan sa peryod COVID.

E sa *quotation* se "si ou napa *nanryen* pou dir, pa dir *nanryen*!"

(APPLAUSE)

HON BERNARD GEORGES

Aköz, Mr Speaker, sa pa anmenn nou okenn par. Tou sa ki nou'n konstri la apre midi, dan en deba Onorab, malerezman i fini parey Franse i dir en *queue de poisson*.

I fer mwan triste, i fer mwan triste. Aköz olye kree en keksoz pou nou lavenir demen, sa ki nou'n vwar se en dirizan ki i'n kapab dan sa semenn ki'n ekoule parey mwan mon'n fer, anmenn lamannman pou *improve* sa *Bill* ki i pa kontan, e ki in fer nou konnen i pa kontan, in satisfere son lekor zis kritike, san anmenn en lamannman,

ni en virgil i pa'n anmennen pou mete dan sa Prozedlwa.

Alor Mr Speaker, mon krwar ki nou bezwen apre midi, konsantre lo sa ki bann lezot Manm lopoziyon in dir. E fer krwar ki entervenans ki'n koz zis avan mwan, pa ti'n pran laparol.

Mr Speaker, permet mwan silvouple, tous lo enn de pwen ki mon krwar nou devret rektifye. Enn bann keksoz ki'n ganny dir, se pa'n annan okenn *thinking* ki'n al dan sa Prozedlwa.

Sa set en keksoz ki'n vin vit. Set en keksoz ki radikal, set en keksoz ki pa'n annan sifizaman konsiltasyon. Eskiz mwan Mr Speaker, me annefe sa Prozedlwa i annan lan i pe ganny konstri. Depi ler Gouvernman Ramkalawan in vin o pouvwar.

I ti fer nou konpran Prezidan, ki pa pou annan en Minis Kiltir e ki zot pe travay lo en lot striktir, aköz kiltir i pou nou tou, kiltir i permanan, i pa devret antre dan politik. I ti dir sa, alor nou pa kapab dir ozordi ki sa keksoz in ganny fer vitman san konsiltasyon.

Akoz i annan lan, ki sa lekip ki'n travay lo sa *Bill*, pe travay lo li pou anmenn li dan sa konteks ki i ete dan sa konzonktir ti ki i ete ozordi. Dezyenm keksoz ki mon ti a kontan tous en pti pe lo la ozordi, se sa persepsyon ki sa

ki sa *Bill* pe kree set en antite enorm. Set en *superpower*, set en *superman*.

Set en lenstitisyon ki pou anglob tou bann lezot lenstitisyon ki i annan pou fer avek lagrikiltir isi. Eskiz mon Mr Speaker, mwan mon'n lir sa *Bill*, e se pa sa ditou ki i dir.

Sel keksoz ki pe ganny kree ozordi, set en lenstitisyon ki pou en parasol, par lao tou bann lenstitisyon ki pou reste koman bann antite egzaktaman parey zot annan ozordi, parey zot ete ozordi. Napa nanryen ki pe sanze.

Kekfwa en non isi laba, en lenstiti i ava ganny ranplase par en lakademi. E la mon ti a kontan profite pou dir, annou pa per sa mo lakademi e retourn lo lenstiti.

Akoz en lakademi, annou pa krwar se lakademi se Lakademi Lapolis, oubyen se Lakademi Touris parey nou annan isi. En lakademi se en lenstitisyon ki promouvwar devlopman en langaz, e ki prezerv en lidantite.

En legzanp se Lakademi *Française*, ki nou tou nou konnen i en gran sofgard kiltir ek lalang Franse dan lemonn. Ok, alor i annan, nou pa kapab, annou pa reste lo nou pti Sesel.

Akoz nou viv dan en lemonn ki bokou pli gran e nou bezwen anbras, lefe ki i annan en lemonn laba deor,

avek lekel nou bezwen enterakte kiltirelman parey nou fer li ekonomikman.

En lot kestyon ki'n ganny demande, se tou sa *staff* ki pou arive avek tou sa bann dimoun ki travay dan tou sa bann landrwa? Sel keksoz ki mwan mon bezwen dir se, ouver zot *Bill*, al lo *Clause 71* e zot ava vwar larepons.

Larepons se, napa en manm *staff* ki pou ganny met deor. Tousala zot pou ganny rebran, aköz zot pou reste dan sa bann antite, e zot pou vin prezan anba lenstiti. Alor pou napa okenn dimoun ki, aköz sa remaniman ki pou perdi zot lanplwa.

HON SEBASTIEN PILLAY

(Off-Mic)

MR SPEAKER

Onorab Pillay ou obzekte ler dimoun i entervenir e aprezan ou ki pe enteronpe, mersi. Onorab Georges kontinyen.

HON BERNARD GEORGES

Mon remersye ou Mr Speaker. Mr Speaker sa ki'n ganny dir apre midi, ki en pwen ki tou lede kote in fer sorti, mon krwar set en keksoz ki a labaz sa remaniman ki pe ganny fer.

E sa se ki kiltir zanmen in annan son plas dan

konsanti politik sa pei. Zanmen in annan premye plas. Toultan in pti frer en lot lenstitisyon. *Tourism and Culture, Community Development and Culture or Local Government and Culture. Education and Culture.* Toultan se *and Culture, Sport and Culture.*

E menm ler nou al dan nou Konstitisyon e nou al dan sapit 3, ki nou *fondamantal, Charter of fundamental rights and freedoms*, kot i annan 24 drwa, komansman limero 15 ziska limero 39.

Kiltir i 39 lo 39, 24 lo 24 dernyen dan sa lalis. E se la kot nou'n met Kiltir. Malgre ki dan nou Preamble parey VP in koz lo la taler dan son lentrodiksyon, i *still* limero 39, dernyen de dernyen.

E se sa ki fodre nou sanze dan sa, aköz bann politisyen ki'n ekrir sa Konstitisyon pa'n fer li, nou sa Gouvernman pe fer li. Pe vin anmenn met kiltir dan son plas kot i devret ete.

Tir li anba politisyen, met li anba en Konsey, anba en lenstiti, kot pou annan, e mon sir i pou annan, pa mwan ki pou al apwent sa bann dimoun.

Me mon sir ki i pou annan bann dimoun valab dan kiltir, bann dimoun ki'n demontre ki zot konn sa travay, bann dimoun ki pa

bann *civil servant* anba en Minister, anba en Minis, eskiz mwan.

Me bann dimoun ki met lanmen ‘*à la pâte*’ parey Franse i dir. Ki dan kiltir, ki konnen ki zot pe fer, ki pou *advise* sa lenstiti, e ki pou fer ki sa ki nou tou nou anvi vwar koman bann Seselwa, setadir promouvwar, promosyon kiltir pou arive dan nou pei.

Alor Mr Speaker, pou mwan pa pran letan apre midi, mon ti a kontan zis avek ou permisyon, demann avek sa lenstitisyon ki nou pe al, ki nou pe kree la ozordi pou vin en lenstitisyon proaktif. Zot montre zot kapab fer li.

Nou annan par egzanp Mize Nasyonal ki’n ganny refer e bravo zot in fer en travay eksepsyonnel. E nou annan en Mize ozordi ki nou kapab *proud*! I en Mize ki son nivo i enternasyonal.

Ki kapab debout ansanm ek bann Mize ki nou vizite dan bann lezot pei. Fer parey silvouple avek en Mize *de la marine*, ki nou bezwen, nou en pei maren apre tou. Fer parey avek en *National Art Gallery*, kot tou nou bann artis, nou ava kapab aste en tablo, sakenn sa bann artis, e met li la pou nou bann zenerasyon fitir. Nou bezwen sa.

Vin - an dot mo - revaloriz, en lenstitisyon ki pou revaloriz redinamiz, reset

nou kiltir, donn li en nouvo souf. E Mr Speaker mon napa okenn dout ki anba sa lenstiti ki nou pe al kree la ozordi ler nou pas sa *Bill*, se egzakteman sa ki pou arive. Mersi Mr Speaker.

(APPLAUSE)

MR SPEAKER

Mersi Onorab. Mon apel Vis-Prezidan pou fer larepons lo deba.

THE VICE-PRESIDENT MR AHMED AFIF

Mersi bokou Mr Speaker. Bonn apre midi ankor, tou bann Manm Lasanble. Tou dabor permet mwan remersye tou dimoun ki’n koz dan en fason ou en lot, pou eksprim zot lopinyon lo sa *Bill* ki devan nou.

E pou met zot bann pwen, bann pwen serye dan laplipar bann entervenans ki’n koze, mon’n tande. E mwan mon ti a kontan fer zis detrwa pti remark, pou reponn petet a bann konsern, bann keston ki’n leve pandan deba lo merit.

Premyerman lo konsiltasyon, Onorab Georges in dir tre korekteman, poudir lentansyon sa *Bill* in deza ganny eksprimen, i pa fek vini semenn pase, ki nou annan 7 zour, 8 zour pou nou pans lo en nouvo lide.

Sa lide ki par deryer e lafason in ganny eksprimen dan sa *Bill* ti ganny eksprimen avek pep Seselwa preski lan pase.

Ki nou anvi anmenn kiltir dan en fason kot ou pa pou zanmen elimin enterferans, me pou annan lenterferans minim dan lafason kiltir i ganny zere dan Sesel.

Konsiltasyon ti komans toudswit apre, e in akselere pandan sa dernyen 6 mwan. Kot Mr Andre, son lekip ki'n fer en gran travay pou drafte sa *Bill* ansanm avek Biro *Attorney Zeneral*, zot in zwenn avek preski tou sa 7 lenstitisyon ki'n ganny nonmen dan sa *Bill*.

Zot *Board* ek zot *CEO*, avek bann artis, e plizyer lezot dimoun konsernen, zisteman pou zot diskit lo merit annan en tel lenstitisyon. E mon kontan lafason Onorab Georges in fer referans avek. In dir i vin parey en parasol.

Savedir, i pran tou sa bann lenstitisyon ki deza egziste, e li i anmenn plis lefikasite. I retir bokou bann birokasi, tel ki diferan *Board* partou, ki anmenn en serten mank dan direksyon, ler ou annan tro bokou dimoun ki pe fer menm keksoz.

E i plito fokaliz tousala anba en Sekreter Zeneral. Napa nanryen ki pou perdi an

term vizyon pou kiltir, an term, travay sa bann diferan lenstitisyon.

Savedir pou zot fer promosyon kiltir, pou promosyon lar, prezervasyon nou kiltir. Nanryen ladan pa perdi anba sa *Bill*. Sel keksoz ki i fer, i met tou sa bann lenstitisyon anba en parasol e annan meyer zesyon finansyel.

Bann Manm Onorab a rapel, i annan plizyer lenstans, e rapor Oditer Zeneral in montre plizyer fwa, ki aköz i annan sitan lorganizasyon, sakenn pe annan son *accounting officer*, setaki pe sey kordin en proze.

Ki finalman ou fini avek move kordinasyon. En legzanp *Music Stadium*. *Music Stadium* ti komans avek en lide, si mon pa tronpe par *Arts Council*, zot ti trouv en Bidze R5milyon.

Evantyelman departman Kiltir ti *involve* ladan. E finalman proze ti fini avek 22 milyon. E si bann lezot konponan ki zot ti anvi mete ladan, ki diferan dimoun ti pe redi sakenn son kote, si ti met tou ansanm, ti pou fini avek 44 milyon.

Mank kordinasyon, sakenn pe redi en kote e ou annan en proze ki fini avek en kou bokou pli o ki i devret. Mon annan lezot ankor dan rapor Oditer Zeneral, i fer plizyer referans avek bann

lenstitisyon ki mansyonnen isi.

Enn bann rezon ki ti ganny donnen souvandfwa par sa bann lenstitisyon, pou eksplike akòz in annan defayans dan zot sistenm, se mank resours, dir en *CEO* i kapab dir ek ou, be ou konnen, mwan mon ti napa *accounting officer* mwan, i annan en lot lenstitisyon ki i annan, mon pa'n kapab servi pou li.

Solman tousala i dan kiltir menm. Nou en pti pei avek resours minim. E i enportan ki nou annan en parasol ki nou met zot tou pou zot kapab servi menm resours e azir dan en fason ki bokou pli efikas.

Lo kote lenterferans, e si i annan lenterferans politik. Mon kapab konpran sa largiman ki si ou annan Prezidan ki pe apwent en dimoun, i kapab ganny vwar konmsi i pou apwent en dimoun, ki prezan i bezwen vin en dimoun politik e swiv son lord.

Be eski sa i en keksoz ki lozik, neseserman? Petet i annan ki mazin koumsa, akòz sa sete fason ki in ganny fer pandan bokou letan. Me ozordi, ou annan Prezidan ki apwent Sef Ziz, byensir lo rekomandasyon.

Eski i vedir, e ki apwent tou Ziz, eski i vedir poudir

Zidisyer i pa endepandan? Non. Ou annan Prezidan ki apwent Komisyoner Lapolis, eski Komisyoner Lapolis i vin en zouti politik?

Petet ti annan en lepok i ti ganny fer koumsa, e i difisil pou nou divors nou lekor ek sa. Me ozordi, avek sa mo ki zot menm zot in mansyonnen, mon pa konnen si zot kontan ler zot dir.

Me selman sanzman, ozordi tousala i ganny met de kote. Ozordi si ou met dimoun an plas, ou met en lankadreman otour li, ou donn li sa bataz pou li naze, me i pa naz dan en latmosfer e en lanvironnman politik. Se sa ki nou anvi promouvwar dan Sesel. E se sa ki nou pe fer.

Si ou annan ou en Sekreter Zeneral ozordi, i annan en konsern ki ganny dir, be i kapab *hire and fire*, e sa i danzere. Be eski sa Sekreter Zeneral ler i *hire and fire* i pa swiv *Employment Act*?

Konmsi nou'n dir ladan poudir i ganny *exempt* li? Nou dir sa dimoun pa kapab al kot *Public Service Appeal Board*? Eski nou'n dir sa dimoun pa kapab al devan en Lakour? Nou pa'n dir.

Tou bann Minister ozordi ki i annan en Minis ek en *PS*, zot pa kapab *hire and fire*? Alor ki diferans ki - Akòz sa i en konsern, mon pa vreman konpran.

I annan sa lenportans ki'n ganny donnen par serten Manm, ki ozordi nou devret fer sir ki, bann zenn, sirtou bann zenn ki'n *train* dan kiltir, ki santi zot annan en plas pou zot kontribye.

Zot devret ganny sa plas. Mon ti a kontan reasir bann Manm e sirtou Onorab Henrie, Onorab Arissol, ki'n dir poudir i ti a kontan vwar sa e ozordi in fer referans avek serten ka kot i krwar i annan dimoun ki pa pe permet lezot pou kapab vin kontribye.

Mon kapab asir ou Onorab poudir sa bann konsern, nou pou pran li *onboard*, ler nou pe, byensir etabli sa lenstitisyon si zot aprouve. E i en keksoz ki nou, nou krwar, pa zis dan sa lenstitisyon, me partou dan Sesel.

Partou dan Gouvernman sirtou. Nou devret fer sir ki tou dimoun ki annan son drwa, ki annan son kapasite pou fer keksoz, i kapab fer li. Mon krwar mon'n fer en pti pe letour.

Me ti annan enn de pwen ki bann Manm in souleve, sirtou an se ki konsern ki mannyer bann lenstitisyon pou kontinyen fonksyonnen. Enn ladan, sete, par egzanp Lakademi Kreol.

Sa ki mon oule dir ou Onorab, se dan sa Lalwa, si ou al lo sapit 2 paz 15, i etabli

klerman lo Lakademi Kreol. Seksyon 18, kot i donn ou son lobzektif klerman e answit i donn ou tou bann fonksyon sa lakademi.

I donn ou lo seksyon 20 ki mannyer son Direkter Egzekitiv i ganny apwente, ki son rol. E 21 i donn ou lo son *staff*. Ou ti demann spesifikman, si i pou vin, ki i pou arive an se ki konsern SQA, eski li i pou vin en *Teaching Institution*, eksetera? Pa neseserman.

Akoz li ki pou fer, si ou pou get lo paz 16, 18(1)(2) i dir pou "*provide active support to the teaching and learning of Seychellois Creole language.*"

Alor li i azir parey en lenstitisyon ki donn sa sipor bann dimoun ki deza la, pou montre Kreol. Onorab par egzanp mwan, tou dilon ler mon'n lekol, mon pa'n aprann Kreol mon.

Be selman ler mon ti ariv, nou tou nou ti koz Kreol. Ler mon ti ariv Politeknik, mon rapel ti annan Mr Rosette ti vin montre nou Kreol. Mon pa konnen ki lenstitisyon ki ti anvoy li.

Selman mon ti aprann Kreol ler mon ti dan premye lannen Politeknik, mon santi mon koz Kreol byen, mon kapab ekrir Kreol byen.

Me selman, sa ki mon pe dir ou Onorab sa lenstitisyon, anba Lalwa, i ganny son

responsabilite, se fer sir sa bann promosyon ki devret ganny fer, pou fer sir lalang Kreol i annan son plas dan ledikasyon, dan laprantisaz i ganny fer anba sa Lalwa.

Si zanmen demen li i bezwen fer sa li menm, mon pa krwar i anpes li fer. Me selman nou deza annan bann lenstitisyon e ti annan en sizesyon ki petet i devret ganny mete o senn Liniversite Sesel. Mon napa okenn problemm avek sa.

Me selman sa i bann detay ki lenstitisyon i a rode. Ti annan en lot ki konsern en lot lenstitisyon, *National Arts Council*, kot bann artis pou trouv zot. Eski zot trouv zot, ler ou met zot an konteks sa ki deza ozordi egziste, *National Arts Council of Seychelles*.

E answit i annan en lot lenstitisyon lo paz 38, sa *Bill* ki *functions of creative Seychelles, CINEA*. Alor parey ou war tou zot bann fonksyon in ganny definir anba sa 2 diferan sapit.

Alor bann artis ki'n trouv zot toultan pe travay avek *CINEA*, zot pou kontinyen travay anba menm lenstitisyon ki ranplas li anba sa parasol. Pareyman, pou bann artis anba *National Arts and Craft*, zot osi zot a trouv zot anba sa menm lenstitisyon anba sa parasol. I sa kordinasyon ki pou vin pli

efikas. Mon krwar mon'n adres laplipar bann komanter ki'n ganny fer. An term si nou pe redwir lenportans kiltir dan Sesel.

Be mon krwar si mon'n ekout deba ki'n al byen, o kontrer, si sa mo '*super*' in ganny servi, in vin en *super entity*, be nou'n elev son nivo. Nou'n fer li vin pi enportan, i ganny pli byen zere, ganny latansyon Prezidan.

E pou mwan sa se en fason ki nou pe promouvwar lenportans kiltir o pli o nivo. E se sa mon krwar ki sa *Bill* in ganny mete koumsa. E annefe ti annan, mon krwar konsern pli enportan se lenterferans politik.

Onorab Andre osi in mansyonn sa koman enn bann konsern. Onorab, parey mon'n dir lo komansman, lentansyon se zisteman pou tir e pou minimiz lenterferans politik.

Par egzanp, parey i ti ete avan, ou ti annan diferan Minis e dan en term ou kapab annan 2 Minis Kiltir. Sakenn ler i vini, i annan son prop vizyon.

Be, eski ler ou retir tousala, i pou anba en Sekreter Zeneral, wi in ganny apwente par Prezidan, eski i pa fer sa lenstitisyon vin bokou pli stab

Mwan mon rapel bann letan, petet Mr Andre i kapab

dir ou, kot li i ti dan lekol lanmizik, i pe etabli son standar, i pe etabli son fason montre lanmizik.

E i ganny *phone call* avek en Minis pou dir li lafason ki i pe fer i mal. Finalman enterferans politik i kite i ale. Tousala ti annan! Ozordi Minis pa ladan.

Mon pa krwar Prezidan avek tou son responsabilite i pou oule tou le zour telefonn Lekol Lanmizik pou al gete lekol pe ganny fer lekol, piti lekol ki laba, e ki *curriculum* ou annan. Nou pe tir sa lenterferans dan sa lenstitisyon. E sa se enn bann fason pou fer li.

Mr Speaker, an gro, vwala, nou pe vin pli efikas, nou'n met tousala anba en parasol. Nou anvi ki kiltir i reste avek bann dimoun ki solid, bann dimoun ki konn kiltir. Prezidan byensir i konsilte avan i apwente, avek bann artis e tou bann parti prenon enportan.

E mon espere ki avek sa nouvo striktir ki nou mete, nanryen pa pou parfe. I ava, parey Onorab in dir, en pti baba i komans marse, Onorab Arissol in dir sa.

I annan diferan son ki i fer, 'ba', 'ta', eksetera. Vwala i pou arive, be lentansyon se fer li marse. Fer li vin pli byen, pli efikas, e fer sir ki kreolite Seselwa i ganny prezerve a tou

moman. Mersi bokou Mr Speaker.

(APPLAUSE)

MR SPEAKER

Mersi Vis-Prezidan Prezidan. Avek sa nou a kapab envit bann Manm pou vot lo merit zeneral sa *Bill*. Manm ki an faver lev lanmen silvouple. Okenn Manm ki kont? Mersi.

Vot lo *general merit on the Seychelles National Institute for Culture Heritage and the Arts Bill, 2021*, 24 Manm in vot pour, 8 kont e 0 abstansyon. Madanm Clerk ou a reviz vot silvouple, en abstansyon.

Alor vot lo *general merit* sa *Bill*, 22 Manm in vot pour, 8 kont e 2 abstansyon. Alor Lasanble in aprouv sa *Bill* lo *general merit*. Madanm Clerk ou a fer *Formal Second Reading*.

MADAM CLERK

Mersi Mr Speaker. *A Bill for an Act to establish a Seychelles National Institute for Culture, Heritage and the Arts as an Institution of policy making in respect of culture, heritage and the arts, and to coordinate for the advancement of, and for preservation, promotion and strengthening of the cultural*

values and identity of the Seychellois people; to establish its constituent institutions and to repeal certain laws relating thereto and for matters connected therewith or incidental thereto. Mersi Mr Speaker.

MR SPEAKER

Mersi Madanm Clerk. Prezan ki mannyer nou pou prosede avek lamannman. Onorab Andre ou pou lead. Nou a pas dan Staz Komite silvouple. Se Chairman, *Scrutiny of Bills Committee* ki pou diriz nou.

HON CLIFFORD ANDRE

Mersi Mr Chair. Mr Chair bann lamannman, parey in ganny dir dan Lasanble, nou'n zwenn avek *Attorney Zeneral*, nou'n pas lo la. E i annan ki'n ganny agree.

Lamannman dan *long title*, dan *Interpretation Section* ki *Clause 2*. Nou ale, nou annan en lamannman dan *Clause 4*, en *insertion*, mon a pas laparol avek Onorab Georges.

MR SPEAKER

Onorab Georges.

HON BERNARD GEORGES

Mersi Mr Chair. Mr Chair sa set en lamannman ki mon'n fer *by notice* e ki'n ganny sirkile mon mazin

par Lofis Clerk. Mon propozisyon se pou azout dan *Clause 4* en nouvo (c), epi (c), (d) eksetera i ava ganny *renumbered*.

E sa se bann fonksyon Lenstiti Nasyonal. E mon pe propoze ki nou azout en fonksyon, ki pou dir *make recommendation*, ki sa lenstiti i a kapab fer rekomandasyon avek Minister ek Departman Gouvernman, '*prior to their adoption of policies, make recommendation*' -

'Ministers and departments of government, prior to their adoption of policies making decisions or taking actions on all matters under responsibility of its constituent institutions, in order to ensure the preservation of the Seychellois identity, culture, arts and heritage.'

An dot mo, sa ki mon pe propoze la, se ki lenstiti i annan en fonksyon pou li fer rekomandasyon avek bann Minister, ek bann Departman, avan ki Minister ek Departman i pran en desizyon ki i annan pou fer avek enn bann *constituent elements* sa lenstiti.

In other words, sa ki Gouvernman par egzanp pa, al fer en keksoz ki pou afekte dizon *Creole Institute*, oubyen en lot lenstitisyon, san ki zot

in ganny rekomandasyon avan sorti kot lenstiti.

In other words, pou ki lenstiti i kapab diriz ek gid en pti pe desizyon Gouvernman lo bann - selman lo bann desizyon Gouvernman pou fer ki annan pou, ki pou tous enn sa bann constituent elements.

MR SPEAKER

Sa wording ki ou'n donner i wording ki ou'n sirkile avan sa.

HON BERNARD GEORGES

Yes, egzakteman parey Mr Speaker.

MR SPEAKER

Ok, so bann Manm i okouran. Onorab Henrie ou.

HON GERVAIS HENRIE

Mersi Mr Chair. Mon oule zis demann *LGB* ki'n *move* sa lamannman, si nou osi azout *agency* la? Akoz Gouvernman souvandfwa i servi *MDAs*. E en *agency* parey *ESA*, ki kapab, akoz i *deal* avek bann zafer *craft* par egzanp.

Si par egzanp napa *agency*, the word '*agency*', eski i pou sanz ou lamannman, *or we can add?* Mersi.

MR SPEAKER

Onorab Georges.

HON BERNARD GEORGES

Mon kapab al lo la Mr Chair. So i ava lir, '*make recommendation to ministries, departments and agencies of government,*' eksetera.

MR SPEAKER

And agencies. Ou pe koriz draft an mezir ou pe fer sa ou? Tre byen. Eski nou vote lo sa lamannman? Ki mannyer ou fer?

HON BERNARD GEORGES

Nou bezwen ganny en segonder.

MR SPEAKER

Wi, ou' fini propoz i la. Ok, nou a ganny en segonnman pou sa lamannman? Onorab Henrie.

HON GERVAIS HENRIE

Lamannman i ganny segonde Mr Chair.

MR SPEAKER

Nou a ganny en vot lo, wi. Mon pa'n war personn lev lanmen. Eski okenn Manm i anvi adres sa pwen? Dan sa ka nou a kapab pran en vot. Manm ki an faver lev lanmen silvouple.

Madanm Clerk ou'n byen, ou'n bezwen kont Onorab ki vot kont, lev lanmen silvouple? Mersi.

Alor vot lo premye lamannman propoze par

Onorab Georges on the Seychelles National Institute for Culture, Heritage and the Arts Bill, 2021 - 21 Manm in vot pour, 0 Manm in vot kont e 1 in *abstain*.

Alor nou'n aksepte sa lamannman. Onorab Andre i a kontinyen. Mr Chair avan mon kontinyen, zis pou rikord, dan *Clause 3(3)*, avek *Attorney Zeneral*, nou'n tonm dakor o sa lamannman ki pou fer ladan.

Lo 4(a) ek 4(b) osi, avan nou al lo 6. E nou osi 4(4)(j), 4(O). E lot ki nou'n agree se dan 5(a), 5(b), 5(1)(a) plito, ek 5(1)(b), 5(2) i annan en *insertion* ki'n ganny propoze an referans avek 5(3).

Kot letan en lapwentman i ganny fer par Prezidan, sa lapwentman pou ganny pibliye e sa i lir koumsa, "*The President shall cause the appointment to be published in the Gazette.*"

MR SPEAKER

Eskiz mon Onorab, ou dir mon 5(b) sa en?

HON CLIFFORD ANDRE

Non, i pou vin 5(3) - 5(3), i pou vin sa nouvo *insertion*. Aprezan i fer ki sa bann ki swiv pou vin (4), (5), ensidswit.

MR SPEAKER

Wi. Onorab Georges.

HON BERNARD GEORGES

Mersi Mr Chair. Mr Chair lo 5 mon annan enn de kestyon silvouple. Premye dan 5(1)(a), *Bills Committee* ti propoze e *Attorney Zeneral* in dakor ki Sekreter Zeneral i vin en *ex officio* Manm *Advisory Council*.

Mon pe demann avek *panel*, si zot anvi nou azout *the Secretary General, ex officio* oubyen *its already taken* ki si i en Manm *Advisory Council* i pou bezwen *ex officio*? Mon bezwen direksyon *panel* lo la.

MR SPEAKER

Wi, *panel*. AG.

THE ATTORNEY GENERAL **MR FRANK ALLY**

Mersi Mr Chairman. Mr *Chairman* dapre *Bill*, se li ki pou prezid *meeting*, alor i - i pa pou - *by virtue of* son lofis i pou form parti. Me si nou get 8(4), "*the Secretary General shall preside over the meeting of the Advisory Council.*" So *therefore, he will form part of the Councils.*

MR SPEAKER

Wi, en *regular member*, pa en - Si Onorab Georges?

HON BERNARD GEORGES

Dezyenm pwen Mr Speaker, lo 5(2), i annan en amannman, mon pe demann avek Lasanble, avek ou pou

permisyon, pou ki nou pran sa amannman koman en *simple amendment*, kot pou lapwentman bann Manm, *Bills Committee*, ti propoze ki Sekreter Zeneral pou ganny apwente par Prezidan an konsiltasyon avek *Leader* Lopozisyon, par *Leader of Government Business* parey i ete la, sa ti en *faute de frappe* ki'n ganny fer par *Bills Committee*. Me an konsiltasyon avek *Leader* Lopozisyon.

Akoz zot pe propoz sa? Se parey nou'n dir, kiltir i pou nou tou, i pa zis pou sa parti ki dan Gouvènmman.

E ler pou apwent Sekreter Zeneral, malgre ki *Leader* Lopozisyon i en politisyen e Prezidan i en politisyen, *Bills Committee* in propoze i meyer fason pou regrop la Nasyon an antye, se pou pran sa 2 dimoun ki diriz Nasyon, ie: Prezidan ki sorti dan parti ki'n ganny eleksyon, e *Leader* Lopozisyon ki sorti dan parti ki pa'n ganny eleksyon prezidansyel.

Donk, pou fer sir ki i annan konsiltasyon pou lapwentman Sekreter Zeneral.

MR SPEAKER

So ou pe dir mon sa i zis en koreksyon, *to the original intention*?

HON BERNARD GEORGES

No, Mr Speaker, *yeah, well, yes*. I en - nou anvi fer i antre koman en *simple amendment*. Akoz nou pa'n donn -

MR SPEAKER

Wi, be ou pe fer sa *amendment to conform to the original intention of the Bill*.

HON BERNARD GEORGES

Yes.

MR SPEAKER

Se sa?

HON BERNARD GEORGES

Yes.

MR SPEAKER

Ok. Dan sa ka mon krwar nou kapab enterpret li koman en *simple amendment*, aköz i en koreksyon. *Any*, okenn Manm ki konteste sa? Ok, mon krwar nou kapab kontinyen.

Eskiz mwan, mon en pti pe, amannman ki Onorab Andre ti'n propoze zis avan sa, eski nou'n fini etabli li? Nou'n - avek *panel*, wi? Onorab Georges.

HON BERNARD GEORGES

E ankor enn fwa Mr Chair, mon krwar pou laform sa nouvo propozisyon *Bills Committee* anba 3, malgre ki panel in aksepte, etandonnen ki i en nouvo *insertion*.

Mon krwar *Bills Committee* pe demann ou egzers ou Lotorite pou aksepte sa koman en *simple amendment*, ie: ki apwentman i ganny pibliye dan *Gazette*.

MR SPEAKER

Wi. Anfen, wi i en, zis en elaborasyon mon kapab dir, lo ki mannyer i devret ganny fer. Byen, *Bills Committee*, nou a kontinyen.

HON CLIFFORD ANDRE

Mr Chair, lo parey mon'n dir, 5(3) i pou vin 5(4) ensidswit, *renumbering*.

MR SPEAKER

Onorab Cosgrow, wi.

HON WALLACE COSGROW

Mr Speaker, *if I may*, mon pa konnen si i apropiye sa ler la pou mon kapab, mon ti'n omit en keksoz taler, petet dan mwan ladres. Si sa Sekreter Zeneral, mon lo 5(3) la.

Si sa Sekreter Zeneral i dan en pozisyon *administrative* dan Gouvernman, aköz ki son term i 7an e non pa parey en nenport ki dimoun, par egzans ki lo PSC, ki annan en kontra 3an?

E 7an, pou mwan 7an i, sa Prezidan ki'n apwent li in fini ale apre, i posibelman in fini ale apre 7an. Aköz 7an,

me non pa swiv parey nenport ki PS, nenport ki Direkter Zeneral, 3an? Apre *eligible for reappointment*. Mon pa konnen si i apropiye sa ler la pou mon tous sa.

MR SPEAKER

Well, mon krwar i annord pou en lesplikasyon. Parske mon konpran, dapre prosedir sa sesyon Komite i pou *amendment* e leksplikasyon. Vis-Prezidan.

THE VICE-PRESIDENT MR AHMED AFIF

Mersi Mr Chair. Mr Chair, lesplikasyon i vremen i al anliny avek sa lide ki i annan minim enterferans. Si sa dimoun ki Sekreter Zeneral i konnen, menm si sa Prezidan pa la, son term i fini, li i ankor la li.

So i tant pou li, santi li dan en pozisyon kot son pwennvi, son fason panse i endepandan e i pa kapab ganny enfliyanse par person.

7an, i en term ki desot term Prezidan. Si ankor zis en pti mezir ki nou mete, senpleman pou montre sa bonn volonte, nou ti kapab fer li 5an, aköz i pa ti pou fer diferans anba sa ladministrasyon.

Selman, zis pou donn sa lasirans avek nenport ki dimoun ki vin dan sa pos, ki i en dimoun endepandan, i fer

son travay san lenterferans.
Mersi Mr Chair.

MR SPEAKER

Mersi. Onorab Pillay.

HON SEBASTIEN PILLAY

Mr Chairman, mwan mon ti ava, mon ti ava kosyonn Vis-Prezidan, ou pe al ver en semen ki danzere. *Public service* i annan en kad. E kad lapwentman e lakantite letan ki nenport dimoun i ganny apwente dan *public service* in ganny etabli.

Nenport Gouvernman, nenport Gouvernman ki pou vini, pou bezwen *abide by* serten kad e serten prensip. Par egzantp kontra pou en *CEO*, kantite letan ki i ete. La mazorite *CEO* pa ganny apwente pou 6an, 7an. Mon pa konnen.

I nou rol koman Lopozisyon pou anpese ki Gouvernman i kree bann sityasyon ki kapab afekte. Akoz ler *public service* i ganny afekte, son *delivery* i afekte tou dimoun.

Mon ti ava kosyonn ou pou pa zis get li dan en fason leze, parey mon santi ou pe regard li. Me regard li dan en fason ase serye. Akoz ler ou sanz sa kad ann antye e ou kree bann diverzans dan sa kad, ou pou annan en lenpak. Mersi Mr Speaker.

MR SPEAKER

Vis Prezidan ou ti a kontan adres sa.

THE VICE-PRESIDENT MR AHMED AFIF

Wi, mersi Mr Chair. Mr Chair, se Lasanble ki desid Lalwa. Lalwa i devan zot, in propoz 7an, mon'n ganny demande akoz 7an, mon'n eksplike. Si i annan okenn propozisyon pou sanz sa, zot lib pou zot fer li.

Me mon krwar 7an i en term rezonnab, i dan Lalwa, i dan en lankadreman Lalwa. Mersi.

MR SPEAKER

Onorab Andre.

HON CLIFFORD ANDRE

Mersi Mr Chair. Mr Chair si mon kapab propoze pou nou kekfwa bouz de lavan. Si nou propoz 3an, *renewable*. E sa dimoun i a fer 6an, si sa i pou *cure* sa konsern. Zot a fer 5an.

E parey *VP* in dir, ki menm sa dimoun i a konnen poudir i annan en letan apre, ki si sa Prezidan i ale, oubyen ler sa Prezidan i ale, li i ankor la.

MR SPEAKER

Ok. Okenn Manm i annan en lopinyon lo la? Onorab Georges.

HON BERNARD GEORGES

Mersi Mr Chair. Mr Chair mon ti a kontan pou parsyelman reponn Onorab Cosgrow ek Onorab *Leader* Lopoziyon pou demann bann Manm, regard 5(4), zot napa sa propozisyon devan zot, me zot ava vwar ki sa ki *Bills Committee, Extended Bills Committee* mon devret dir, ti realize se ki, si tou bann Manm ek Sekreter Zeneral i pou 7an e zot tou zot *retire* ansanm, pa pou annan okenn memwar lenstitisyon ki pou reste.

Setadir ki dan 7an, tou dimoun i ale, en nouvo tim i antre e pou napa okenn kontinyite.

Alor pou sey adres sa pwenn, *Bills Committee* in fer en propozisyon ki i annan *rotation of Members*, tel parey i annan dan en lakonpannyen *PTY* oubyen non *PTY*, ki annan *rotation* tanzantan pou annan sa kontinyite ek sa *institutional memory* ki reste.

Alor, dan 4, ankor enn fwa mon pou demann ou permisyon pou mon fer en *simple amendment*. Dan 4 i pou dir, i pou lir koumsa.

"The Secretary General and members shall be appointed through a term of 7 years and shall be eligible for reappointment, provided that, with effect from the end of the third year, one member shall

retire annually on the anniversary of the first appointments and be replaced by a newly appointed member." Setadir ki, en Manm pou servi zis 3an olye 7.

Enn pou servi zis 4an, enn pou servi zis 5an, pou sa premye peryod. Apre sa tou dimoun pou ganny pou 7an. Me i zis ki toulezan, 1 i ava ale, 1 i ava rantre. Pou ki i annan kontinyite ek *institutional memory*.

I pa adres pwenn 7an, me i, aköz sa pa aplik pou Sekreter Zeneral. Pou Sekreter Zeneral mon ti a kontan - Sekreter zeneral i pa vreman, i pa *PS* li, pou annan en *PS* anba li, taler nou ava vwar.

So sa enn kekfw i ava ganny apwente pou 3an, *along with the PSO* eksetera. Me Sekreter Zeneral dan sa kad set en dimoun ki par lao, i en, i nivo en Sekreter *D'Etat*.

E donk se pou sa rezon ki propozisyon se pou gard li pou 7an, pou annan sa kontinyite e pou fer li al *beyond* term sa Prezidan ki apwent li. Mersi.

MR SPEAKER

Me mon a bezwen met kestyon devan bann Manm, eski zot annan okenn pwennvi lo si sa i kapab ganny adopte koman en *simple amendment*, sa adisyon sa *wording*?

HON CLIFFORD ANDRE

Yes.

MR SPEAKER

Bills Committee ou aksepte sa ou?

HON CLIFFORD ANDRE

Mr Chair, as a *simple amendment there is no issue*. Me solman mon pa konnen si ou pou permet Manm diskrit lo la. Me selman i kapab pase koman en *simple amendment, no problem*.

MR SPEAKER

Wi, mon a permet Manm. Wi Onorab Cosgrow.

HON WALLACE COSGROW

Yah. Wi Mr Speaker, mersi. Mon'n ekout byen sa ki Onorab Georges in dir. Le problemm avek sa propozisyon, se ki, ki mannyer ou swazir lekel ki sorti apre 1an, apre 2an, are 3an?

Konmsi ki mannyer ou fer sa desizyon. Pou mwan mon pou vwar li vin en desizyon petet pa *fair*. Apre dezyenm, si sa Sekreter Zeneral i par lao sa Egzekitiv, *then it is a political appointment in disguise*.

Mon pwennvi *by the way, sorry, but I see it as a political appointment in disguise*. Be solman zot lamannman i zot

lamannman. E zot *free* pou anmenn li. Mersi.

MR SPEAKER

Onorab Pillay.

HON SEBASTIEN PILLAY

Mersi Mr Speaker. Mr Speaker *just to*, Mr Chairman zis pou azoute, se ki, *Attorney Zeneral* ek Vis-Prezidan i bezwen pran konsyans ki referans pou ganny fer avek *practice* anba sa lenstiti, par lezot eleman dan *public service*.

Whilst nou, nou annan nou pozisyon lo sa Lalwa, nou osi annan nou pozisyon vizavi *public service*. E a okenn ka, nou pa anvi *public service* i *fail*. Akoz *public service* i deservi nou tou.

So nou pe demann zot pou konsider ramifikasyon bann sanzman ki zot pe fer e lafason ki pou ganny *viewed* dan lezot eleman *public service*.

Zot pou kree en debalansman kot ou pou annan dimoun ki, en dimoun ki kapab ganny apwente pou 7an, ki pou mwan le sel landrwa ki sa bann apwentman, sa kantite letan i ganny fer, se ler bann apwentman i ganny fer lo en baz avek CAA, avek CAA *involved*, oubyen avek bann lezot lenstans ki vin, ki selekte dimoun.

Mon pa war rezon akòz ki zot bezwen enkli sa. E pwen ki Onorab Cosgrow in dir, sa sistenm rotasyon, pou mwan ankor i kree serten konfizyon, si ou oule annan, mentenir en servis piblik ki stab.

Akòz malgre nou dan Lopozisyon, nou *still* bezwen ki dimoun i ganny servis. Mersi Mr Speaker.

MR SPEAKER

So *ok*, nou annan 2 pwen la. Ou pe retourn lo *the number of years*. Onorab Georges eski ou war en fason pou *amend* ou *wording*. Ki i pou evit konfizyon lo lekel. *Attorney General* pou adres sa. Wi AG.

THE ATTORNEY GENERAL **MR FRANK ALLY**

Mersi Mr Chairman. Mr Chairman si Lasanble i pe propoz en lamannman avek *Membership Advisory Council* enn, en propozisyon se ki nou kapab dir ki bann Manm *Advisory Council* i a *hold office for a period of, let's say 3 years, or whatever number of years, from the date* ki zot ganny apwente. Eksepte ki *'half of the number or third of the number, or two thirds shall be reappointed for a further term to ensure continuity and institutional memory'*.

Si sa i parey Onorab *Leader* Lopozisyon in dir, ki i

pou bezwen *institutional memory*, then at least i ava annan, a tou moman en group dimoun, en lot, en group i ale e i ranplase par *only* en parti a sak moman. Mersi.

MR SPEAKER

Be eski sa i reponn kekyon Onorab Cosgrow. *Which staff* ki pou *retire* e *which staff* ki pou reste?

THE ATTORNEY GENERAL **MR FRANK ALLY**

Non, non, be sa Prezidan ler lapwentman i ganny fer, se i pou dan diskresyon sa dimoun ki i apwente ki pou deside lekel. Anfet mon *National Tender Board* e i annan lezot osi bann antite ki zot Manm i ganny apwente dan sa fason.

Pou gard sa *institutional memory*. Mersi. So that napa en depar e finalman i, bann dimoun i komans a zero a sak fwa ki zot ganny apwente. Mersi.

MR SPEAKER

Tre byen. Pou nou ganny li settled. Mon krwar i pou neser ki Onorab Georges i regarde lekel *wording* ki i pou mete la pou bann Manm konpran kor nou pe ale.

HON BERNARD GEORGES

Wi Mr Chair mon kapab fer li. Mon pa konnen lekel ant

sa 2 propozisyon ki nou pou anvi. Eski nou anvi 3an, 3 i sorti, tou le 3an?

Oubyen, eski nou anvi 1 i sorti are trwazyenm lannen e enn ki sorti toulezan? *Thereafter*, sa set en swa ki nou bezwen fer.

MR SPEAKER

Si mon kapab zis fer en komanter. Mon krwar sa propozisyon ki *half* i sorti *midterm* i bokou pli senp pou konpran e pou *manage* ki enn par enn. Me sa i mon lopinyon. Mon pa konnen si sa i, *Bill*, wi Onorab Andre.

HON CLIFFORD ANDRE

Mon osi an faver ki, parey *Attorney Zeneral* e parey ou, ou pe gete. Ki nou fer li en peryod 3an, apre 3an, lanmwatye i gannyen e lot i kontinyen.

MR SPEAKER

Pou mon sa i pli konpreansiv. Mon pa konnen. Eski Manm i oule debat pli lwen lo la, zot oule vote. Oubyen nou kapab aksepte.

HON CLIFFORD ANDRE

Mr Speaker?

MR SPEAKER

Yes Onorab Andre?

HON CLIFFORD ANDRE

At least sa i ava tir sa *fear*, sa dout ki Onorab Cosgrow in dir, parey lekel ki pou sorti e i ava vin parey *Attorney Zeneral* in dir, Prezidan i a deside lekel ki i pou re apwente oubyen non.

MR SPEAKER

Wi. *Attorney General*.

THE ATTORNEY GENERAL **MR FRANK ALLY**

Mersi Mr Chairman. Mr Chairman mon'n anvoy en propozisyon avek *Leader of Government Business*.

E petet ti a bon osi, ki ler ki zot term i ariv sa lafen, e ziska ler ki bann nouvo Manm i ganny apwente, zot kapab kontinyen, *sit* pou en peryod *at least* 3 mwan. sa osi pou gard en pti pe sa- Ki napa en lenpas ant enn ou lot. Mersi.

MR SPEAKER

OK. So lekel *wording* nou pe konsidere la? Yes Onorab Georges.

HON BERNARD GEORGES

Wording Attorney General Mr Chair i *comme swivan*;- 17 (1)

'Members of the Advisory Council shall hold the office period of three years from the date of appointment, except that half a number of members shall be reappointed.' La nou pou annan en problem, akoz

nou bezwen koup en dimoun an de si i annan 7 zot, *unless ki the Secretary General is the seventh number -' except that half the number of members shall be reappointed for a further term of office to ensure continuity and institutional memory.*

E 2. *'a member of the Advisory Council shall on the expiration period for which a member was appointed, continue to hold office until such another member appointed to succeed that member, except the period shall not exceed 3 months.'*

Si tou dimoun i dakor avek sa e ki ou les sa pase konman en *simple amendment* nou ava *cut and paste*.

MR SPEAKER

Well mwan mon pare pou les li pase konman en *simple amendment*, aköz i pe zis sans *term of appointment*. Lot, nou a kontinyen. Onorab Andre.

HON CLIFFORD ANDRE

I annan lamannman dan *sub 5* ki nou'n tann dakor lo la. Apre nou annan lamannman *Clause 7(a)* ki ankör nou'n tonm dakor lo la dan *8(2)* menm zafer nou'n tonm dakor lo la.

I annan en lamannman *Mr Chair* dan *9, 9 (2) (c)* e apre *10 (c)* i dir ki *"a member of the Advisory Council, who*

knowingly contravenes sub section 1, shall be liable to be removed from office.' Sa i en *insertion* ki nou'n tonm dakor *Attorney Zeneral* lo la.

MR SPEAKER

So (c) nouvo?

HON CLIFFORD ANDRE

Yes.

MR SPEAKER

En nouvo seksyon (c) la.

HON CLIFFORD ANDRE

E i pou annan en *10* ki'n ganny *inserted*, *'resignation of members of the Advisory Council.'* I lir koumsa, mon krwar tou Manm i annan devan zot kantmenm *'a member of the Advisory council may resign from his office by letter addressed to the Chairperson'*.

Me selman mon krwar nou bezwen get en pti kou. Si Prezidan ki apwent li, eski letan i *resign* i *address the letter to the Chairperson* oubyen i bezwen *address to Prezidan?*

Sa i en *issue* ki'n vin dan mon latet la. mon ava zis kontinyen mon ava li li parey i ete e apre nou ava debat lo la. *'The Chairperson and the Secretary General shall give 3 months prior notice and any other member shall not give*

less than one month notice of his resignation.'

MR SPEAKER

Sa i en keksoz ki zot in dakor lo la?

HON CLIFFORD ANDRE

An prensip nou ti'n dakor. Me selman zis sa zafer *submission to the Chairman* vi ki Prezidan ki apwente. Mon ti pe zis met sa devan.

MR SPEAKER

Eski i fer en *material difference?* Onorab Georges lo sa pwen.

HON BERNARD GEORGES

Mersi Mr Chair. Mr Chair napa annefe napa en *Chairperson* se sekreter zeneral. So 10 (1) pou lir "*A member of the Advisory Council may resign from the members office by letter addressed to the President*", e "*the Secretary General shall give 3 months prior notice, and a member shall give not less than one month notice of resignation.*"

MR SPEAKER

Ok.

HON CLIFFORD ANDRE

Nou kontinyen. Lamannman, dan 10 (4) nou'n tonm dakor lo la. 13 nou'n tonm dakor lo la Mr Chair.

Nou annan nou 15(2)(a) nou'n tonm dakor lo la. Lot lamannman i dan 19 (1) (c), 19 (1)(2).

MR SPEAKER

Sorry Onorab Henrie.

HON GERVAIS HENRIE

Zis pou nou pa retourn avan aköz nou'n ariv lo 19 la ou. So lo keştyon 17 dan mon entervansyon mon ti demann en keştyon ki pa'n ganny reponn, lo lide pou sanz non Lenstiti Kreol e apel li en 'lakademi.'

Akoz sa in ganny fer, nou konnen poudir Lenstiti Kreol in fini, annou apel li anzandre, dan tou dimoun. I nonm ou Lenstiti Kreol. Apre sa mo 'lakademi' dan konteks Sesel letan mon regarde, nou'n toultan servi li dan bann lenstitisyon ki form en bann dimoun dan en profesyon, par egzanp Lakademi Lapolis, Lakademi Tourizm, Seychelles Maritime Academy. Ouswa Seychelles Business Studies Academy.

So aköz nou'n santi poudir i enportan la ki nou sanz Lenstiti Kreol, ki'n menm renonmen atraver lemonn e pou fer li vin en lakademi. Mersi.

MR SPEAKER

VP oubyen *panel* pou eksplik sa.

MAYOR OF VICTORIA MR DAVID ANDRE

Mr Chair. Mon kapab zis reponn sa *please*?

MR SPEAKER

Wi.

MAYOR OF VICTORIA MR DAVID ANDRE

Mon krwar Onorab Georges in koz lo la. E mon tyer man dakor avek li. Fodre pa nou krwar sa mo 'lakademi' i refer zisteman avek en serten lenstitisyon ki form dimoun.

E lenferans ki Onorab Georges in fer se, par egzanp si nou konpar Lakademi *Francaise* - Lakademi *Francaise* i en lenstitisyon ki en pli o nivo ki sofgard lalang *Français*. E se dan menm lespri ki nou pe met sa mo lakademi. Akoz ou pa kapab annan en lenstitisyon anba en lenstitisyon.

MR SPEAKER

Vwala en lenstiti anba en lot lenstiti.

MAYOR OF VICTORIA MR DAVID ANDRE

Vwala.

MR SPEAKER

Akoz i annan sa nivo, *the top body* i apel en lenstiti, i pou en drol pou apel en *body* ki

anba la en lenstiti li osi, se sa? *Ok.* Onorab Henrie.

HON GERVAIS HENRIE

Anfen mon pa partaz sa pwennvi. Me solman mon pa vwar rezon mon kapab konvenk zot otreman pou sanze. Deza mon'n fer rekomandasyon ki a lavenir mon krwar i bezwen sorti anba lenstitisyon al anba *UniSey*. Mersi.

MR SPEAKER

Thank you Onorab Henrie. Onorab Andre wi ou kapab kontinyen.

HON CLIFFORD ANDRE

Yes Mr Chair. 19 (1) (c), 19 (1)(2), 19 (1)(e) nou'n tonm dakor (g) nou'n tonm dakor, (i) nou'n tonm dakor, (j) nou'n tonm dakor, (k) nou'n tonm dakor.

Lot lamannman Mr Chair i dan *heading of* ki konmans 22 *Seychelles National Arts and Craft Council*. Ladan nou'n tonm dakor bann lamannman ki dan 22, lamannman ki dan 23(a), 23 (f), 23(j), 23(k), 23(l). 24(2)(a), 24(2)(c).

Lot lamannman Mr Chair i *comme* swivan. 30(1) lot lamannman i dan 31 ki nou'n tonm dakor.

MR SPEAKER

Yes Onorab Andre.
Onorab Pillay.

HON SEBASTIEN PILLAY

Mersi i pa konsern sa Lalwa, me i konsern *Notaries Act*, mon oule zis demann *Attorney Zeneral* si sanzman terminoloji i annan en lenpak lo *Notaries Act* ki fer referans avek *curator of National Archive*? Mersi.

THE ATTORNEY GENERAL
MR FRANK ALLY

Mersi Mr Chairman. Mr Chairman mon krwar poudir petet *Leader* Lopozisyon ti ava'n fer en pti pe plis *homework*, dan amezir *Notaries Act* i fer referans avek *curator of archives*.

Setadir tou le lannen bann noter, aköz zot fer dokiman an *double minutes*. Zot bezwen soumet en dokiman avek *curator of archives*.

Anba *Seychelles Archives Act*, *curator of archives is the person in charge, of the archives*.

E anba sa Lalwa i dir ou *the person who will be in charge of the archives will be the Principal archivist*. Set en sel - en matematik legal ki mon krwar i reponn ou kestyon. Mersi.

HON SEBASTIEN PILLAY

Mersi Mr Speaker. Mon byen konpran sa matematik legal. Mon ava espere si i mars byen dan lapratik. Mersi.

MR SPEAKER

Mersi.

THE ATTORNEY GENERAL
MR FRANK ALLY

Anfet se koumsa ki i ete ozordi. E napa gran keksoz ki'n sanze. So sa formil pa'n sanze. Mersi.

MR SPEAKER

Onorab Andre ou kapab kontinyen.

HON CLIFFORD ANDRE

Yes Mr Chair 36 (2) dan Lalwa i met *Minister* nou'n sanz li pou vin Sekreter Zeneral. Aköz Sekreter Zeneral ki tonm anba sa Lalwa. Lot lamannman se dan-

MR SPEAKER

One second please.
Onorab Georges kot ou ete?

HON BERNARD GEORGES

Mersi Mr Chair, mon ti ava kontan aport sa latansyon Onorab *Leader* Lopozisyon aköz i ti fer sa pwen sa taler. Aköz i annan en *appeal to the Minister*, i ti annan parfetman rezon. Donk sa in ganny sanze i vin Sekreter Zeneral. Mersi.

MR SPEAKER

Thank you. Onorab Andre kontinyen.

HON CLIFFORD ANDRE

37 nou'n tonm dakor. Lot lamannman swivan Mr Chair i nou ale i paz 45, 46 i *ok*. 47 non 47 i *ok*. 48 (1)(c) avek (2) nou'n tonm dakor lo lamannman.

Lot lamannman Mr Chair i *Clause 51(m)* nou'n tonm dakor. E (o) i annan mon ava pas laparol avek Onorab Georges ki in prezant sa.

MR SPEAKER

Yes onorab Georges.

HON BERNARD GEORGES

Mersi Mr Chair. Mr Chair sa se dezyenm propozisyon lamannman ki mon ti'n donn notis avek Clerk, ki mon ti pou *move* ozordi, se pou azout en nouvo fonksyon anba sa leritaz Nasyonal e sa fonksyon se ki sa Konsey pou *'undertake an evaluation of all request made to the government, for this establishment of any monument or site on the territory of Seychelles, and make recommendations to the Secretary General for or against this establishment of such monument or site.'*

E sa se prezizeman pou ki i annan en *droit de regard*

par sa par sa Konsey, ki pou fer rekomandasyon ek Sekreter Zeneral ler en dimoun i anvi etabli en sit ; - par egzanp, ou anvi en fer en sit.

E dan konteks kiltir se pou prezerv e sofgard pa neseserman - me mon krwar enn bann keksoz ki nou bezwen sofgarde, se okenn antite *foreign* ki anvi dizon *set-up* en moniman oubyen en lenstitisyon. Oubyen en sit isi, pou fer sir ki i annan en *droit de regard* pou fer sir ki kiltir Kreol i ganny prezerve avan tou. *Basically that's the idea.*

MR SPEAKER

So ou pe poz en *insertion* la?

HON BERNARD GEORGES

Mon pe propoz en *insertion at (o)* ki (o) eksetera i ava ganny *renumber*. Mersi.

MR SPEAKER

Bann Manm in swiv sa? *Ok thank you.* Onorab Andre oule kontinyen?

HON CLIFFORD ANDRE

Nou lot.

MR SPEAKER

Ok, Onorab Georges si nou pou vote mon bezwen demann ou pou repas lo sa *Clause* ki ou pe dir.

HON BERNARD GEORGES

Yes Mr Chair letan donnen ki mon ti'n donn notis mon *move* pou *insert* dan *Clause 51* ant paragraf (1) ek (o) aktyel en nouvo paragraf ki ava vin (o) e tou bann lezot paragraf apre i ava ganny renonmen ki pou lir, "*Undertaken evaluation of all request made to the government for the establishment of any monument or site on the territory of Seychelles. And make recommendations to the Secretary General for or against the establishment of such monument or site.*"

MR SPEAKER

Thank you. Sa lamannman i ava ganny segonde silvouple. Onorab Henrie.

HON GERVAIS HENRIE

Lamannman i segonde Mr Speaker. Mersi.

MR SPEAKER

Onorab Henrie in segonde, *ok*. Onorab Henrie mon'n tann ou segonde, wi *ok thank you*. Nou ava vot lo la silvouple. Manm ki an faver lev lanmen? Mersi. Manm ki kont silvouple? Mersi.

Bon lo vot lo *Second Amendment on the Seychelles National Institute for Culture, Heritage and the Arts Bill*,

2021 - 22 Manm in vot pour zero Manm kont e 10 abstansyon. Alors sa amendment i ganny aprouve.

Yes Onorab Andre ou kapab kontinyen.

HON CLIFFORD ANDRE

Mr Chair i annan *chapter 7. Clause 56* i annan en *proposal* pou tir *Section Creative Seychelles section* ti ete pou met li konman *agency*. E an prensip nou'n tonm dakor lo la.

MR SPEAKER

Onorab Georges.

HON BERNARD GEORGES

Wi Mr Chair mon lo sa pwen mon vwar ki *marginal comment* i dir ki *the AG and the panel will revert*, pou gete si zot dakor avek sanzman non, *should it be Creative Seychelles Section* oubyen *Creative Seychelles Agency?*

Section pou mwan i paret to konmsi i en seksyon i en departman e i fer li retourn parey en Minister, *which is not the plan. That's my only comment*. Me se vreman *panel* ki'n kree sa *Bill* ki pou deside. I en mo apre tou.

MR SPEAKER

Ok. Yes, panel VP.

THE VICE-PRESIDENT MR AHMED AFIF

Mersi Mr Chair. Mr Chair nou *ok* avek si zot oule met li konman *agency*. Nou aksepte.

MR SPEAKER

So, nou pe koz 56 la. Dernyen.

HON CLIFFORD ANDRE

Chapter 7, Creative Seychelles Agency son title.

MR SPEAKER

Wi, me there are references to Seychelles Section e tou bann Section i vin Agency. Thank you.

HON CLIFFORD ANDRE

Mon a kontinyen Mr Chair.

MR SPEAKER

Yes.

HON CLIFFORD ANDRE

Mersi. Seksyon 57. *I mean Clause 57 (b) nou'n agree, nou'n agree. (i) i pou sorti 'prepare and submit to government' pou vin 'to prepare and submit to the National Institute.'* Zis en, ti annan sa fot. Nou'n agree osi lo (k) 57(k).

Lot lamannman Mr Chair, 64(2), 68(1) i vin *Advisory Council* dan plas *Advisory Board* aköz i referans ek *Advisory Council*.

Lot lamannman Mr Chair, i vin bann non anba *schedule 1*. Selman mon ava

les *panel*, aköz nou'n diskrit sa avek *Attorney Zeneral*. So, mon ava les li get en pti pe ki mannyer i pou fer, aköz *proposal* se ki zot ki responsab pou *deal* avek sa.

MR SPEAKER

Schedule 1.

HON CLIFFORD ANDRE

Yes. Apre sa Mr Chair, tou el restan i *Schedule 2*. So, mon ava les *Attorney Zeneral*, aköz in fini. Mon ava al asize Mr Speaker, avek ou permisyon. Mon kapab?

MR SPEAKER

Wi. Ki mannyer, eskiz mwan. Ki mannyer *panel* i sipoze prosed avek bann non dan *Schedule 1*?

HON CLIFFORD ANDRE

Schedule 1. So *Attorney Zeneral* i ava donn detay lo ki mannyer keksoz i ete avek *Schedule 2* ki mannyer i pou vini.

MR SPEAKER

Ok, Attorney General. Yes.

THE ATTORNEY GENERAL

MR FRANK ALLY

Mersi Mr Chairman. Mr Chairman, in annan 3 propozisyon. Enn se dan sa *Bill* nou ofer sa bann amannman avek *Schedule 1*, sirtou avek nou bann

Moniman Nasyonal, oubyen ki nou fer se ki nou senpleman *delete Schedule 1*, e prezan nouvo regilasyon a fer kot nou a pran konsiderasyon tou sa bann amannman posib, e nou pibliye dan pli bref dele pareyman avek *Schedule 2*.

Savedir si nou pas sa *Bill* ozordi - si Lasanble i pas sa *Bill* ozordi, *then* i pa pou pas li avek okenn *Schedule*. E parey propozisyon dan *Bill* li menm, *then* sa bann *Schedule* i a ganny *enacted* dan le fitir. Mersi.

MR SPEAKER

Mersi. Mon'n swiv ou. Okenn komanter lezot Manm. Onorab Georges.

HON BERNARD GEORGES

Mr Chair, mon plito partizan ki nou les sa lenstiti oubyen sa Leritaz Nasyonal fer sa lalis. Definitivman sa lalis is *outdated* e nou bezwen update li. Me mon krwar pa i nou rol. I plito zot rol pou zot fer sa.

Sel problem se si nou pou *delete Schedule 1* nou pou bezwen *deal* avek *Section 54* ki dir, *the monuments listed under Schedule 1 are declared to be national monuments*.

Ki nou anvi fer, nou anvi *delete* li net oubyen ranplas sa par en lot keksoz ?

THE ATTORNEY GENERAL **MR FRANK ALLY**

Mersi Mr Chairman. Mr Chairman, parey anba Seksyon 68, sa bann regilasyon setadir amannman *Schedule* pou bezwen ganny fer par Sekreter Zeneral an konsiltasyon avek *Advisory Council*. So i pou bezwen en keksoz ki ganny fer *simultaneously* amwen ki i annan serten, ler nou *commencement notice* sa Lalwa i pran lefe i pou bezwen, i annan serten parti Lalwa ki pe ganny repeal nou pou bezwen fer serten provizyon.

So petet ti a pli bon pou rezon pratik nou gard *Schedule 1*. Me *Schedule 2* nou kapab vin avek pli tar.

Me kestyon se eski nou pou sanz bann non dan sa. Non, nou a kit li parey. Mersi.

MR SPEAKER

Ok, so schedule 1 i reste, *Schedule 2* i tonbe. *Thank you*. Yes, Onorab Henrie.

HON GERVAIS HENRIE

Zis avan nou fer nou travay Mr Chair. *Theme classification* pou *panel*, eski i ankor egziste. Si i ankor egziste, kot e i pou tonbe. Eski i pou *somewhere* anba sa Lalwa la li. mersi.

MR SPEAKER

Panel.

THE ATTORNEY GENERAL **MR FRANK ALLY**

Mersi. *Theme classification* i anba son Lalwa pou li menm. So petet i en keksoz ki evantyeleman Gouvernman i kapab deside. Akoz i annan son Komite pou li menm. Mersi.

MR SPEAKER

Thank you. Nou'n ariv a lafen bann amannman propoze par *Bill Committee*. E avek *approval panel*, e nou'n vot lo 2 amannman ki nou ti bezwen vot lo la. So, nou a kapab retourn dan Staz Lasanble pou terminen.

Byen mon a kapab apel *LGB* pou fer Mosyon pou *Third Reading*. Sorry, Onorab Arissol ki *owner of the Motion of the Bill*. Onorab Arissol.

HON SANDY ARISSOL

Mersi Mr Speaker. Bonswar tou dimoun lekout. Mr Speaker, an vi ki i 7er 21 aswar, mon ti a kontan anba *Order 76(1) move* ki *Bill Seychelles National Institute for Culture, Heritage and the Art Bill as amended* i ganny lir en Trwazyenm Fwa. Mersi.

MR SPEAKER

Mersi. Mon a ganny segonnman silvouple? Onorab Henrie.

HON GERVAIS HENRIE

Motion seconded Mr Chair.

MR SPEAKER

Mersi Onorab. Nou a ganny *vote* lo *Third Reading* silvouple. Manm ki an faver lev lanmen? Mersi, okenn Manm ki kont? Mersi.

Bon, vot lo *Formal Third Reading of the Seychelles National Institute for Culture Heritage and the Art Bills, 2021 as amended* 20 manm in vot pour, 9 Manm in vot kont e 2 Manm in *abstain*. Alors sa *Bill* in aprouve par Lasanble e Madanm Clerk a fer *Third Reading*.

MADAM CLERK

Mersi Mr Speaker. *This Act may be cited as the Seychelles National Institute for Culture Heritage and the Art Bills, Act, 2021 and shall come into operation on such date as the Director General may, by a notice published in the Gazette, appoint.* Mersi Mr Speaker.

MR SPEAKER

Mersi. Mersi Madanm Clerk. Alors i mon plezir deklare ki *Bill* in pase par Lasanble.

Mon pou remersi tou dimoun, zot bann Manm pou zot kontribisyon e VP avek son *panel* pou zot partisipasyon dan diriz sa *Bill*. Mon swet tou dimoun en bonn sware e bonn leres lasemenn.

Zis en mo lo nou program semenn prosenn. Mon'n ganny en propozisyon

par Prezidan pou li fer en
ladres dan Lasanble, Mardi
5er Mardi le 26 Oktob 5er.

Alors nou'n met s alo
progranm e an rezon sa
Lasanble pa pou *sit* Mardi
apart zwenn pou Ladres
Prezidan 5er.

Me Lasanble semenn
prosenn i a sit pou *regular
business* Merkredi avek Zedi.
Mon remersi zot tou e mon
remersi manm piblik ki'n swiv
nou pou sa lazournen travay.
Nou ava *adjourn* e mon swet
zot bonn rantre. *Adjourn.*

(ADJOURNMENT)